

ASO LUA, 24 IANUARI 2017

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2017.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOGOGA FETALAI

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoao Faitulafono.

E avea ia lenei avanoa taua ou te faatalofa atu ai ma le agaga faaaloalo i le paia o le Fonotaga a le Palemene, o le uluai Fonotaga o lenei tausaga, e i ai le manatu ana le seanoa le Atua ia te i tatou e le maua Lona filemu ma Lona matagofie i lenei taeao.

Ua mavae atu lena tausaga ua tuanai, ua tatou toai taunuu i le tausaga fou lenei e ala i galuega amata o lenei tausaga, ia tatou te faamoemoe i le Atua ma faafetaia le agalelei o le Atua, aua o se foe lava e faaee i le tau lo outou finagalo, pe ana le au le Atua ma i tatou. E i ai le manatu, ia malo le lagi e mama, malo le soifua manuia i le paia o lau Afioga i le Taitai o le Malo i lau Afioga i le Palemia faapea foi le Sui Palemia ma le mamalu o le Kapeneta, e faapea foi i Minisita Lagolago ma lea foi itu o le Maota i le afifio o Taitaifono, e faapea foi i sui usufono mamalu o Komiti Faa-Palemene, aemaise foi le paia maualuga i le tapuai mai a Lana Afioga Mamalu, O Le Ao o le Malo, faapea foi le paia i Sui o le Fono a Sui Tofia, aemaise o le mamalu o le atunuu e le o ni sa e avea pe a le oo i ai sa matou faamatalaga, se i oo lava i le Afaigaluega Totofi a le Atua ma taitai o ekalesia e fia, ia tapuai maia ma se manuia aua le alofaiva o lau Palemene.

E avea foi lenei avanoa ou te faatalofa atu ai i le paia maualuga i Faauluuluga o Matagaluega ma Faalapotopotoga a le Malo, ua mafai ona tatou faatasi i lenei taeao e molimauiina ia galuega a le Palemene i lenei aso fou. E faapea foi ona faatalofa atu i le Susuga i le Failautusi ma le Sui Failautusi, aemaise o le Ofisa o le Fono Aoao Faitulafono.

TUUNA ATU O PEPA

Na faataatia e le Fofoga Fetalai le P.P.2016/2017 Nu. 153, Lipoti a le Pule ma Suetusi Sili i le Fono Aoao Faitulafono i luga o Galuega a le Ofisa Suetusi Sili Samoa mo le Tausaga Faaletupe 1 Iulai 2014-30 Iuni 2015, e tusa ai ma le Mataupu 98(2) o le Faavae o le Malo Tutoatasi o Samoa.

24 IANUARI 2017

Tuuina atu o Pepa

Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P. 2016/2017 Nu. 142, Lipoti Faaletausaga a le Komisi o le Toefuataiga o Tulafono a Samoa, Aokuso 2016.
2. P.P. 2016/2017 Nu. 143, Lipoti Faaletausaga a le Faletupe o le Atiinaaøe o Samoa 2016.
3. P. P. 2016/2017 Nu. 144, Lipoti Faaletausaga a le Faalapotopotoga Faavae Tau Fatugao o Samoa Iulai 2015óIuni 2016.
4. P.P. 2016/2017 Nu. 145, Lipoti Faaletausaga a le Faaputugatupe mo le Lumanai Manuia o Tagata Samoa 2016.
5. P.P. 2016/2017 Nu. 146, Lipoti Faaletausaga a le Faaputugatupe o Faamanuiaga mo Tagatanuu Matutua o Samoa, Faamatalaga o Galuega ma Tala o Tupe 2015-2016.
6. P.P. 2016/2017 Nu. 147, Lipoti Faaletausaga a le Pulega o Malae Vaalele a Samoa 2016.
7. P.P. 2016/2017 Nu. 154, Tali a le Faamasinoga i le Lipoti a le Komiti Suesue Faapitoa a le Palemene i Mataupu tau Faamasinoga o Fanua ma Suafa.

TUUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene ua faataatia i luga o le Laulau a Fono e tusa ai ma T.T. 51(5).

1. P.P. 2016/2017 Nu. 148, Lipoti a le Komiti o Tupe Maua ma Tupe Totogi i le Tala Faatatau Muamua o Tupe Faaopoopo 2016/2017.
2. P.P. 2016/2017 Nu. 149, Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o Galuega tau Leoleo 2016.
3. P.P. 2016/2017 Nu. 150, Lipoti a le Komiti o le Vaega tau le Va Fealoai i le S.R. 2016/5, Tulafono Faatonutonu o le Falepuipui & Toefuataiga 2014.
4. P.P. 2016/2017 Nu. 151, Lipoti a le Komiti o le Vaega tau le Va Fealoai i le S.R. 2016/10, Tulafono Faatonutonu o le Tatalaina i Tua o Pagota i Faaiuga o Vaiaso 2016.
5. P.P. 2016/2017 Nu. 152, Lipoti a le Komiti o le Vaega tau le Tamaoaiga i le P.P. 2016/2017 Nu. 78, Lipoti Faaletausaga a le Matagaluega o Faatoaga ma Faigafai va 2013-2014.

24 IANUARI 2017

FAAALIGA O LAFO

FOFOGA FETALAI: Ou te tapa lau Afioga i le Palemia mo se lafo.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te tulai atu ma le agaga faaloalo e faatu le lafo, *Ina ia faataatiaese Tulafono Tumau 139 ina ia avanoa ai fetuunaiga i le faagasologa o Galuega a le Fono Aoa.*

Faaluaina e le Minisita mo Leipa ma Fefaatauaiga, ma le Minisita mo Galuega, Felauaiga ma Atinae Eese.

Na faamaonia le lafo ma tulai ai Tulafono Tumau 139 ua faataatiaese.

FOFOGA FETALAI: Ona ua faamaonia le lafo e faataatiaese ai le faamuamua e ave i le Tala o le Tupe, o lea ou te tapa ma le faaloalo o Afioga i le Palemia mo lana Saunoaga Faa-Minisita. Tulai mai lau Afioga i le Taitai o le Malo.

FAAMATALAGA FAA-MINISITA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ma sui usufono mamalu o lenei Maota faapea Samoa o lo o faafogafoga tapuai.

O le a taoto ia paia faalupe o lenei Maota ma Samoa aua ua maape tofiga, ua iloga foi le alatanu ma le vatapuia o paia ma mamalu, ae ua ifo foi mea uma i lo tatou Atua, na taitai mai la tatou faigamalaga umi i lena tausaga ua fulitua mai. O lea ua tatou taunuu ai i manu i le amataga o leni tausaga.

O le viiga lea o le Atua aua o Ia na taitai mai, o Ia na puipui mai, o Ia foi na tausai mai. O le tatou Atua foi leni e toatasi e tatou te faamoemoe i ai ma faatuatua i ai e taunuu manuia ai le malaga a Samoa i leni foi tausaga fou e 2017.

Lau Afioga Afioga i le Fofoga Fetalai, ua ou tulai atu ma le ava tele e tatau ai, e fai se tala puupuu i le Lipoti a le Komiti Suesue Faapitoa a lo tatou Palemene.

Na tofia leni Maota e saili ni aualea e faaleleia ai le tatou Faamasinoga o Fanua ma Suafa, ona ua toatele lo tatou atunuu ua le iloa po o fea a sulu i ai i le tele ma le anoano o le faagaulemalie i faaiuga fai. E fia fai foi se tala i Tali mai a le Faamasinoga ua tuuina mai, lea ua faataatia i luga o le tatou Laulau a Fono. Ua ou taua ma faamamafa le tatou Faamasinoga o Fanua ma Suafa, ona o le tatou Faamasinoga o lo o faia ai faaiuga ogaoga o feeseeseaiga i o tatou fanua faaleaganuu ma suafa matai o le tatou Faamasinoga o Fanua ma Suafa, e aofia uma ai lava i tatou uma i ana faaiuga fai, o le tatou faamasinoga e aafia ai foi a tatou fanau e le i fananau mai.

24 IANUARI 2017

Faamatalaga Faa-Minisita

Lau Afioga i le Fofoga Fetalai, o le faamamafa o le tatou Faamasinoga o Fanua ma Suafa, ona o tatou aafiaga e noatia ai i tatou uma nei ma le lumanai i ana faaiuga. Ou te fia sii mai ai se vaega o le Lipoti a le Komiti o lo o tusia i le itulau e 17 o lo o faapea mai ai quote, “o le faamanatu a le Komiti, a maea ona faasala se isi i le Faamasinoga o Soligatulafono, ua saoloto mai i ia faasalaga, ona o soligatulafono. Peitai, o le Faamasinoga o Fanua ma Suafa ma ana iuga fai, a aafia le tagata i faaiuga e le sao, faaiuga piopio, faaiuga le amiotonu, e aafia ai tuua ua lagomau mai i tiasa, aafia tupulaga o lo o soifua i le taimi nei ma i latou e le i fananau mai. O ooooga na ma tuga ma aafiaga o so o se tagatanuu o Samoa i faaiuga a le Faamasinoga o Fanua ma Suafa. O le mafuaaga lea o le faamamafa atu o le upu po o upu, “le tatou Faamasinoga o Fanua ma Suafa, o i manatu maumaututu maua luga o le tatou Faamasinoga e aafia uma ai i tatou uma. O lona uiga, e i ai lo tatou tiute, e i ai la tatou aia, afai e tatou te iloa se mea e mafai ai ona fesoasoani e faaleleia ma siitia ai le tatou Faamasinoga lenei ona e tatou te aafia ai, o le tatou tiute lea o le Palemene lenei, o le faia o le fesoasoani ina ia faaleleia la tatou Faamasinoga, ona e aafia uma ai i tatou i ana faaiuga. E le se aia valea la o le Palemene i le matafaioi tupito tau Faamasinoga, ae o se fesoasoani sili e lagolago ai ia i tatou uma ma tagata uma o le atunuu lenei i le faatinoina o le Faamasinoga tonu.

Lau Afioga i le Fofoga Fetalai ma sui usufono mamalu o lenei Maota, ou te le tau fai atu o le tatou tuuaulafo ma tuufau e le gata o le agasala maoae matuia lea, i le l faia o le mea ua tatou iloa e tatau ona fai ae ua tatou fesoasoani foi e faafailele ma atili faatupulaia se mea sese o lo o faia pea. O le taunuuga lea, ua o tatou taliaina ma le iloa ni faiga maoae sese e avea ma faatinoga sao, ona sao ai lea o se tasi o fuaitau, ‘e tasi le auala e saofaga ai mea leaga ma mea sese uma, o le gugu lea o tagata, the only way for evil to triumph is for men to be silent.’

Lau Afioga i le Fofoga Fetalai, o le lalolagi lava lenei o lo o tatou i ai, e leai se atoatoa. Ae afai e i ai ni agelu tagata e vaaia i le lalolagi lenei, o alii faamasino ma tamaitai faamasino e tatau ona latalata i ai e pei o ni agelu. Aisea? Aua foi o a latou faaiuga e aafia uma ai tatou, e le pei o faaiuga o le Maota lenei, a uma ona pasia se Tulafono ae toe moomia se teuteuga fou e toe poupou ma toe faaleleia atili ai, e faapena foi ona toe tuuina mai i le Maota e pasia ai. E faapena foi le Kapeneta ma lana matafaioi, e fetuutuunai faaiuga i le faautautaga tatau mai lea taimi i lea taimi, e fai fuafua i mea e tatau ona ave i ai le faamuamua mai lea taimi i lea foi taimi. E oo foi i le Aufaigaluega a le Atua, a lauga i lea Aso Sa i se faauigaina o Afioga a le Atua, e mafai foi ona toe lauga ai i le isi foi Aso Sa i se isi foi vaaiga e taua ona molimoli ai le feau mo le Ekalesia a le Atua. O faaiuga ma faauigaga, e i ai le avanoa e mafai ona toe fetuutuunai ai. Ae o faaiuga a le Faamasinoga o Fanua ma Suafa, e i ai ona uiga faapitoa e patino i le Faamasinoga o Fanua ma Suafa e tau i le faaperetania, judgement in rem! O le a le uiga o ia upu faaperetania? O lona uiga, o faaiuga uma a le Faamasinoga o Fanua ma Suafa e aafia ai so o se tagata tusa lava pe sa i ai i se suesuega pe leai.

24 IANUARI 2017

Faamatalaga Faa-Minisita

O se faataitaiga faigofie lea o faaiuga i lo tatou taimi, e noatia ai o tatou fanua e le i soifua mai ma auai i se taimi e fai ai se faaiuga. E pei foi o faaiuga i aso ua tuanai lea ua saisaitia ai ma noatia ai tupulaga o le taimi lenei. O lona uiga, afai e vaivai se tasi e umia le Suafa Sao e tausia le aiga, e soifua mai fanau a le na aiga, ua tafefea uma measina a len aiga pe a le mataala i latou o lo o tausia aiga i lenei vaitau. Ma o nei faaiuga e le mafai ona toe lalagaina, o le uiga lena o le faaupuga i le gagana faaperetania, judgement in rem! Lau Afioga i le Fofoga Fetalai o le mafuaaga lea o lou fai atu, a i ai ni agelu tagata, na o Faamasino o le Faamasinoga o Fanua ma Suafa, e tatau ona tau lalata i ai ona o le natura lea o a latou faaiuga e fai. E noatia ai le tagata o lenei taimi ma tagata e le i fananau mai. O le mafuaaga foi lea e tatau ai ona tofia i le Tofi Faamasino na o tagata faamaoni, tagata e le i molituina i ni uiga mataga, ina ia fai ma le tonu ma le faamaoni a latou faaiuga ina ia atagia ai le faamaoni o le Atua i o latou soifua ma le galuega faa-Faamasino ua valaauina i ai. E mafua ai foi ona moomia le fai ma toe iloilo ia nei tofiga, aua e leai se atoatoa, ae o le tuutalaloa ma tuufau, o tatou lava o tagata e au ina sese ma faaletonu, ae o le Faamasinoga o Fanua ma Suafa, e le tatau, le tatau ona tofia i ai ni tagata e au i na sese.

Lau Afioga i le Fofoga Fetalai, ailoga e i ai se isi o tatou i lenei Maota e le i oo i le Faamasinoga o Fanua ma Suafa, ma e tofu foi i tatou ma faitioga ma le anoano o masalosaloga i le tagofiaina ma le faafoeina o a tatou foi mataupu. Ae mafua, ona e leai ni taiala manino e mafai ai ona tatou mataituina faatinoga a alii ma tamaitai faamasino; po o ogatasi ma ni faiga lelei taualoa e tatau ona limataitaiina ai le faafoega o suesuega. O le uiga o lenei tala, e tele le avanoa e faitio ai tagata pe a le malamalama po o a taiala o lo o faafoe ai se mataupu, ona oso lea o masalosaloga aua o tatou ua naø ni tagata. Ae a manino taiala o lo o faafoe ai faamasinoga, e mafai foi ona tatou mataituina, po o gafea ua faaletonu ai se faatinoga ina ua le mulimulitaia taiala. E filemu foi le loto, pe a iloa o lo o sosolo lava i faiga faavae se faaiuga a le Faamasinoga.

Lau Afioga i le Fofoga Fetalai, e fai lau faafetai i lenei Maota ona o le sapaia o le Lafo a le Malo na faatuina mo le faia o lenei Komiti Suesue Faapitoa, e saili auala mo le faaleleia o le tatou Faamasinoga o Fanua ma Suafa. Aua ana le lagolago e lenei Maota le faataua a le Malo, o le faaleleia o le tatou Faamasinoga o Fanua ma Suafa, e leai se mea e faia.

E faafetai foi i lau Afioga i le Taitaifono ma sui usufono mamalu o le Komiti Suesue Faapitoa, aua e le o se galuega e faigofie aemaise o le sulu mai o le atunuu e fia maua se fesoasoani i o latou mafatiaga ona ua le iloa po o fea o le a sulufai i ai. O se galuega tele e tatau ai le faafetai, aemaise o le anoano o fautuaga taua o lo o tuuina mai i la outou Lipoti. O le faatuina la o lenei Komiti Suesue Faapitoa, na faatupu manatu ai i le Malo i ni auala e mafai ai foi ona faagasolo nisi o suesuega i isi foi Matagaluega ma Faalapopotoga a le tatou Malo o lo o faitioina e le atunuu i le atoatoa o le latou galuega. E mafai ai ona afiio mai le atunuu e faasoa mai ni o latou foi finagalo i ni auala e faaleleia ai le tatou auaunaga.

24 IANUARI 2017

Faamatalaga Faa-Minisita

O le uiga o le tatou Faigamalo, e le mafai e tatou o sui usufono filifilia o itumalo ona aofai uma taofi ma talitonuga o tagata, ae o avanoa faapenei, e mafai ai ona tatou maua. E leai se isi malae e tatau ona suesue ai mataupu faapenei, o le malae lenei i le Maota ma ana Komiti o sui filifilia e tuuina mai iai o latou finagalo. E ui lava foi i le 1 amanaia e Faamasino o le Faamasinoga o Fanua ma Suafa o le faatalauula a le Komiti e afifio mai e fesoasoani i le galuega tele o taumafai i ai i tatou, ia ae faafetai o lea ua aumai le Tali a le Faamasinoga i fautuaga ogaoga ma le taua a le Komiti. Ma o se taimi ona maua foi lea o le avanoa o sui usufono o lenei Maota e saunoa faalauaitele ai.

Ae ou te fia foi i tua i se upu lea na ou taua o le faatalauula. Lea na faatalauula ai le Komiti i Alii ma Tamaitai Faamasino o le Faamasinoga o Fanua ma Suafa, ae latou te le i amanaia. O le upu faatalauula, o le upu e faasino i le faaoioi, o le valaau faaaloalo, o le faaoioi faaaloalo, o le faaoololomaau. Ae mafua ona faatalauula e i ai le vafealoaloai ma le avafatafata. O le vafealoaloai ma le avafatafata lea, na matua solipala e le faamasinoga, e mumusu e omai e fesoasoani i le galuega a le tou Komiti aua le atunuu lale e tapuai mai. E tasi lava le faauigaina, o le mumusu o Faamasino e omai. O le faauigaina, ua fefefe, ua palaaai e tali i le Komiti i le 1 mafaufau o fai pea i totonu o maota faamasino i a latou amioga le taupulea uiga mataga ma le 1 popoi e faaali i itu faamasinoga ma le tele o faitioga faasaga i a latou faatinoga, ma le 1 tapena lelei o suesuega o mataupu na tofia ai latou te faia. E fefefe, e mama, i fesiligia i lo latou faatautala o le fai o mataupu a le atunuu, i lo latou suesue ma le mautinoa e aafia ai i latou ona o piitaga vavalalata i itu o faamasinoga.

Ae ou te le tau fai atu lau Afioga i le Fofoga Fetalai ma le mamalu o le Maota, o lo o i aao o lau Afioga i le Fofoga Fetalai ma Taitaifono o Komiti Faa-Palemene, le malosi e faamalosi mai ai so o se tasi e finagalo ai so o se Komiti a le Palemene. O a tatou faiga na Faa-Palemene. E oo lava ia te au nei o le Taitai o le Malo ma Minisita o le Kapeneta, e matou te savalivali mai lava pe a valaau atu se Komiti, ona matou omai lea matou nonofo lelei i lalo i fafo o potu fonu o Komiti seia malilie sui usufono o se Komiti ma ua avanoa ona faatoa valaau mai lea. Ae faapena lau Afioga le uiga o le faaaloalo o le Kapeneta pe a valaau atu le itutino lenei o le Tafatolu o Pulega a Malo. Aisea? Aua foi, o le faaaloalo. Ae o tatou tu ia ma aga faa-Faigamalo ma aga Faa-Palemene e tatau ia i tatou o Taitai uma o Samoa ona aloaia ma mulimulitaia.

Lau Afioga i le Fofoga Fetalai, e le faatonuina le tofa, ae ou te matua fautuaina lau Afioga ia aua ne'i toe tulai mai se mea faavalevatea faapenei i le lumanai. O le Komiti ua tofia, o le finagalo o le Maota lenei o le Palemene a Samoa, o le Fono sili lenei a Samoa, e leai se isi Fono i luma atu po o tua mai. Ou te le o fai atu i se agaga faualuga, ae a i ai se fonu e tatau ona usitaia e so o se tagata, o le Fono lenei. O le uiga lena o le faalupega, Fono Aoaofaitulafono a Samoa, o le Fono a Sui Filifilia o le atunuu, ua atoa uma i ai mamalu o le atunuu i ona tulaga faalupelupe.

24 IANUARI 2017

Faamatalaga Faa-Minisita

So o se isi la e aitui i le poloaiga e alu atu i le Fono lenei, o se solitulafono aupito matuia, o le contempt of the dignity of this Parliament, ua tatau loa ona fai i ai ma le faaiuga. Atonu e tau manatua e sui usufono mamalu o lenei Maota lau tautalaga Faa-Minisita i le tatou fono o Iuni 2016, na pasia ai le lafo na faatuina ai le Komiti Suesue Faapitoa. Sa ou taua ai le tiute o Itutino Fefaatauagai o Faigamalo, le Palemene, le Faamasinoga ma le Pule Faatonu. E taua ai ona ou toe faamanatu, ona e i ai le manatu foi lele taa ituaiga e faapea, e i ai se itutino e toatasi e le aiaina e le Tafatolu. E faapea e i ai le va e vavae e tai foliga pei se pa-sima e le mafai ona aapa atu i ai se isi itutino. E leai se mea faapena, o le faataitaiga sili ona faigofie, so o se Faaiuga a le Malo e fia faamaonia faaetulafono, e tasi lava le Maota, o le Maota lenei e aumai i ai e pasia ai. E pei foi ona o lea o le a tatou sagai atu i le pasiaina o le Tala Faaopoopo o le Tupe 2016/2017.

O le isi faataitaiga lau Afioga, so o se faaiuga a le faamasinoga i mataupu i Tagi e faasaga i mataupu tau faiga palota pe a maea se faiga palota lautele, e tuuina mai i totonu o le Maota lenei. Aisea? E tatau ona tuuina mai ina ia silasila i ai i tatou o e faia Tulafono, o e fausia Tulafono ma silasila totoa i mataupu o lo o faatauaafia i nei tagi ina ia toe poupou ai tulafono tau faiga palota.

Lau Afioga i le Fofoga Fetalai, o le tulaga e tatau ona agai i ai mafaufauga e faigofie i le fesili lenei, pe taua le tutoatasi, pe taua le fesoasoania? Mo Samoa lava ia, o se atunuu e tau faasoaso tupe o le manulauti tulituliloa, faaoga tatau tupe, ma punitia ai so o se ituaiga opu e masaa ai tupe e tatou te le gafatia. O le manatu laualuga o le tiute ma le matafaioi e mataitu. Afai e faaletonu le lotoifale o so o se itutino, ae paie ma augatata i latou o taitaia le lotoifale o lena itutino. O ai e faamoemoe i ai e fautua ma faatonutonu ma apoapoi? E na o le Atua e tunoa, e le faalagolago i se isi. A o le tagata, o le tagata ola e moomia le fesoasoani i taimi uma. E faapena foi i Faigamalo e i ai i tatou, e mafua ai le taiala faavae, o le pale faafeagai, e faafeagai ai Itutino Fefaatauagai o Faigamalo, e le gata e fesiakiai, ae o le ato e fevailiai. O lona uiga, e i ai ma e taua avanoa e fetufaai ai mo le faaleleia pe afai ua maitau se tasi itutino ua tauau ina pau atu i le malaia le isi itutino. Aua e le o tatou o ni agelu. E i ai foi taimi e faale-tagata ai a tatou faaiuga, ona agai lea ina pau atu i le to e le gata ma toso atu ai ma tagata e leai ni a latou agasala. O le faataitaiga lelei o le ato fevailiai, o lea ua tuuina mai Tali a le Faamasinoga o fautuaga i le Lipoti a le Komiti Suesue a le Palemene. A tagai lelei lenei Maota i le Lipoti, e anoanoai fautuaga taua mo le atinae o le Faamasinoga o Fanua ma Suafa o lo o tuuina mai ai. Ae a outou silasila foi i Tali a le Faamasinoga ua tuuina mai, e tele foi manatu taua o lo o aumai ai. O le uiga lea o le ato fevailiai. E ogatasi ma le muagagana, “*o le tele o sulu e maua ai figota,*” o lea ua tele nei mau manatu taua ua maua i le Lipoti ma Tali e mafai ona silasila i ai le Malo mo le atinae atili o le itu e faaleleia atili ai o le Faamasinoga o Fanua ma Suafa. Ae ana le faamaite mea le Maota lenei na mafua ai ona faatuina le Komiti Suesue, e leai, leai se faamoemoga i le sulufai mai o tagata i le tatou Malo mo se laveai, ae nofonofo lava le Faamasinoga e leai ma se mea e faia i ai.

24 IANUARI 2017

Faamatalaga Faa-Minisita

Ana le taulagalaga nei le Malo, ona o le sai mai o tatou tagata, e leai lava se mea a le Faamasinoga e faia i ai. O lea la ua aumai le fautuaga taua a le Komiti, ua outou silasila foi i Tali a le Faamasinoga. O le fesili, e i ai la se isi faiga e sili atu ona faigofie, malamalama ma tuu avanoa i lo o nei faiga ua aumai? O le taua lea o le tatou malamalama lelei i tiute o itutino ma tuutuuga o le va nonofo o Itutino Fefaatauagai, e le gata ina fesiakiai, ina ia fesoasoaniai ai, ae o le ato fevailiai e fetufaai mo le sailiga manuia mo Samoa.

A silasila i ai lau Afioga i le Fofoga Fetalai i le faataatiaga o Faigamalo, o lo o manino lelei i le tatou Faavae, le avanoa e tuuina atu ai e le Maota lenei i Le Ao Mamalu o le Malo se fautuaga e faatea ai se Faamasino o le Faamasinoga Maua. E le o se malosia faaleiloga, o le malosia o lo o aumai manino i totonu o le Faavae. Ae o le ata vaaia ma le taunuuga, o le tiute o fefaatauagai e le tatau ona faatamala i ai so o se itutino o itutino nei e tolu o le Malo. Ua lausilafia e sui usufono mamalu o lenei Maota, ia le faatautoga o Faamasino e toalua o le Faamasinoga Sili talu ai, ua toafitu ai nei Faamasino o le Faamasinoga Sili, ae na o le 5 potu faamasino o le Faamasinoga Sili, ona totoe lea o le toalua o Faamasino o le Faamasinoga Faaitumalo. Ae o le Malo lenei, e tasi lava le vaai i se faaiuga, iloa loa, iloa vave lava, ua sese i Sini. Ona masalomia lea o mafuaaga na faia ai. O le tiute o le tatou Malo, o le tilotilo lelei i le faaogaina tatau o tupe. E le mafai ai ona tuatalaloa se faaiuga e aafia ai le tupe e mafai ona faaogaina tatau i isi mea e tatau ona ave i ai le faamuamua a lo tatou Malo. E le mafai ai ona tuuulafo le Malo i ni faaiuga e le faavae lelei. Aua e tai tutusa lava le tele o galuega a le Faamasinoga Maua ma le Faamasinoga Faaitumalo, ae o lea ua fitu Faamasino o le Faamasinoga Maua ae na o le toalua Faamasino o le Faamasinoga Faaitumalo. O lona uiga, pe toeitiiti ane foi tofi nisi Faamasino o le Faamasinoga Faaitumalo, ae ua toatele naua Faamasino o le Faamasinoga Maua. Ua foliga ai le tatou Faamasinoga ua maua i le gasegase foi lele o le malnutrition, ua pei o se tamaitiiti, tulou, ua lapoa ese lava le ulu ae mimiti vae.

Ae o lea foi ua taoto le fautuaga a le Komiti ma le talileleia e le Faamasinoga mo le tofia o ni Peresetene Lagolago se toalua e fesoasoani i le Peresetene. Ae o faaiuga uma lava, e fuafua i tupe ua mafai ona maua. E i faia i se manao, aua e anoanoai o tatou manao. Ae o le a le mea e tatau ona ave i ai le faamuamua mai lea taimi i lea taimi? O le mea lena e fai.

Lau Afioga i le Fofoga Fetalai, e i ai fautuaga taua lava ua tuuina mai i le Maota lenei e le Komiti, a o lea foi ua tali mai i ai le Faamasinoga, e taua ona ou afea. E le gata e molimau i le taua o lenei suesuega na fai, ae mafai ona ou fai atu, o se taunuuga lelei o le galuega e ao ona silasila totoa i ai le Malo mo le faatinoina.

O le fautuaga numera 15 a le Komiti o lo o faapea mai; *“ia i le Peresetene le malosia e toe iloiloina ai faaiuga ua matua manino le faaletonu, pe a i ai se talosaga ua fai.”*

24 IANUARI 2017

Faamatalaga Faa-Minisita

O le tali a le Faamasinoga, ua fautuaina ai le silasila i se faatulagaga e mafai ai ona tagofia e le Faamasinoga o Fanua ma Suafa se judicial review e iloilo ai le faaiuga ua feteenai ma sese ae faaoga ai Faamasino ua litaea mai le Faamasinoga Maualuga, ona e le tatau i le Peresetene ona ia toe iloiloina ni ana lava faaiuga.

O le taua tele o lenei faatulagaga ua fautuaina, ona o le judicial review lea e toe talosagaina ai mataupu o le Faamasinoga o Fanua ma Suafa i le Faamasinoga Maualuga e le gata ina matua taugata maoae le tau, ae matua vaapiapi lava le avanoa e toe talia ai se talosaga. O le taufaavalea la ia le fautuaga lenei. E taugata tele ona o loia e faaoga, ae vaapiapi le avanoa e talia ai se talosaga, ona seiloga e mautinoa ua aafia aiatau ma saolotoga o tagata o lo o puipuia i le Faavae, ona faatoa talia lea e le Faamasinoga Maualuga o se talosaga. O lona uiga, e le iloiloina pe sao pe sese le faaiuga a le Faamasinoga o Fanua ma Suafa, o le vaivaiga maoae lena, o le fautuaga na aumai a le Faamasinoga.

Peitai, o le faatulagaga lea ua fautua mai ai i le Faamasinoga, o le a faaoga ai Faamasino o le Faamasinoga Maualuga, ua masani i le iloiloina o mataupu, o le judicial review, o le a faatino lea faatulagaga e le Faamasinoga o Fanua ma Suafa, e le moomia ai ni loia e taugofie mo tatou tagata, o le a mafai ona Iloilo ai ni sese ma feteenaiga i faaiuga a le Faamasinoga o Fanua ma Suafa. Ae e taua foi le faatulagaga e le tau avea ai e ni loia ia itu faamasinoga o aiga, aua e le tutusa le naunau o le loia ma tagata o aiga i mataupu nei. E le silafia foi e loia mea o tutupu i totonu o aiga ma nuu.

Ae o le taunuuga lelei, ia i ai se avanoa e toe silasila ai i faaiuga ua maea, aemaise faaiuga e talitonu tagata, e sese ma feteenai. Ou te iloa e i ai foi nisi o lenei Maota, e i ai mataupu a o latou aiga, o lo o noatia i faaiuga sa faia e papalagi, i le tau amatamata mai o le seneturi na tea nei. E i ai mataupu e finau ai se toalua, ae uma ane, ua avea se faaleleiga ua na o se faaleleiga, ae ua avea ai le toalua ma faaiuga a le Faamasinoga. O isi faaiuga, ua tuu i ai ma le pule o se suafa po o se fanua i lenei toalua, ae le o iloa e le toatele o le aiga. E tele ma anoanoai le faaleiloga o faaiuga a le Faamasinoga o lona vaitaimi a o faafoe e papalagi. E mautinoa e tele le lavelave e moomia ai le tagai totoa i ai i se faatulagaga ia maua le avanoa mo mataupu e tatau ona toe iloilo, ae aua ne'i avea o se faatulagaga e toe talosaga ai uma lava mataupu, ua maea ona faia i ai faaiuga. O lona uiga, e tatau ona manino taiala e mafai ai ona toe talosagaina se faaiuga, aua e leai foi se taunuuga o ni finauga pe faatalaloa taiala. O le luitau lea o le a silasila totoa i ai le Loia Sili e faatalanoa ma saga faatalanoa ma tuuina mai ai se fautuaga i le Malo, ina ia mautinoa e tatou te faatulagaina se isi vasaga i le Faamasinoga e maua ai le fesoasoani mo tatou tagata, e Iloilo ai na o mataupu e tatau ona toe iloiloina, ia aua, aua ne'i avea ma se vasaga e faatupulaia ai finauga ma le mafai ai e le Faamasinoga ona faafoe.

24 IANUARI 2017

Faamatalaga Faa-Minisita

O le taua o lenei fautuaga ma tali, ia i ai se avanoa mo tatou tagata, pe afai ua feteenai tele pe sese faaiuga a le Faamasinoga o Fanua ma Suafa, ona le gata lea ina maua e o tatou tagata le avanoa e talosaga ai i le Faamasinoga Maua pe a aafia aia ma saolotoga o lo o aiaia i le Faavae i se faaiuga o le Faamasinoga o Fanua ma Suafa, ae i ai foi le avanoa e talosaga ai i le isi faatulagaga fou lenei o le Faamasinoga o Fanua ma Suafa, pe a talitonu ni itu faamasinoga ua sese ma feteenai tele ni faaiuga o le Faamasinoga o Fanua ma Suafa ua faia .

O i foi, e taoto ai le Faavae e tuueseese ai le Faamasinoga o Fanua ma Suafa ma le Faamasinoga o Soligatulafono, pe afai, e faatulaga i le isi lenei faatulagaga mo le Faamasinoga o Fanua ma Suafa, e le toe moomia ai e le Faamasinoga o Fanua ma Suafa le Faamasinoga Maua, vagana o se faauigaina o le faavae ma le saolotoga o tagata o aiaia ai.

E ao ona silafia e lenei Maota lau Afioga i le Fofoga Fetalai, o le Malo lenei, o le Malo e le nofonofoai. O lo o tumau pea le faamoemoe e talanoa le Lipoti a le Komiti Suesue ma Tali a le Faamasinoga e lenei Maota, peitai, ua le faatali le Malo ua amatamea le Malo. Au o lo o tatou faatali ma faatuai ae o lo o faia pea ma faagasolo Faamasinoga. O le faatuai foi lena ona maua le fesoasoani mo tatou tagata ua moomia le fesoasoani. O le vave ona foia o faafitauli, o le vave foi lena ona maua le mapusaga o tatou tagata. E mafua ai ona ou faailoa atu i lenei Maota gaoioiga ua amata faagasolo nei a le Malo mo le faaleleia o le Faamasinoga o Fanua ma Suafa.

Muamua, ua amata ona tagai le Ofisa o le Loia Sili mo le tuufaatasia o se Tulafono fou mo le Faamasinoga o Fanua ma Suafa, e aofia ai fautuaga taua a le Komiti Suesue faapea nisi manatu lelei e maua i le iloiloga ua faagasolo.

Lua, ua amata vaai le Ofisa o le Loia Sili mo le tuufaatasia o Tulafono Faafoe a le Faamasinoga o Fanua ma Suafa, e faagasolo ai mataupu e toai i le Ofisa o le Resitala ma faafoe ai tualumaga a le Faamasinoga.

Tolu, ua amata tagai foi le Ofisa o le Loia Sili i le fautuaga e tuueseese ai le Faamasinoga o Fanua ma Suafa ma le Faamasinoga o Solitulafono ina ia mautinoa ai le faataua e tataua ona ave i le Faamasinoga o Fanua ma Suafa.

Fa, ua amata tagai foi le Ofisa o le Loia Sili mo le faatuina o le Komiti o le Faamasinoga o Fanua ma Suafa e faafoeina le Faamasinoga o Fanua ma Suafa, aemaise o le tofia ma le iloiloina o le tofiga o Faamasino.

Ma le lima, ua amata silasila foi le Malo i ni faamanuiaga talafeagai mo Faamasino o le Faamasinoga o Fanua ma Suafa, ina ia atagia ai le faataua aemaise o le faatosina atu o ni tagata lelei ma agavaa e ave ma Faamasino.

O lea ou te tilotilo atu, o lo o silasila totoa mai le Minisita o Tupe ia te au, aua e moomia tupe i mea uma lava ia. O lona uiga, o lea o le a matua pisi le Minisita o Tupe ma le Minisita mo Tupe Maua, e silasila i ni auala e mafai ai ona faatino ia nei fautuaga taua ua aumai i le tofamamao a lau Afioga i le Taitaifono ma lau Komiti.

Lau Afioga i le Fofoga Fetalai, ua taoto atu le Lauga Faa-Minisita e aofai ai se lagona o le Malo i le Lipoti a le Komiti Suesue faapea le Tali mai a le Faamasinoga. O le Tali foi lea tusitusia e tau ona e le i auai mai le au fala ia i suesuega.

24 IANUARI 2017

Faamatalaga Faa-Minisita

O le mea sili ona taua lea ua lagona mafatiaga o tatou tagata i le Lipoti. Ua tali mai foi le Faamasinoga i mataupu o lo o tuuina mai i Lipoti ma o le a sagai atu loa le Malo e faatino itu taua e tatau, ma mafai ona ave i ai le faamuamua i le taimi nei. O lenei foi suesuega na faia e le Komiti e manatu ua tele le aoga mo Faamasino o le Faamasinoga o Fanua ma Suafa latou te silafia ai faitioga ma mafatiaga o tatou tagata ma iloa ai foi, e le o latou o ni Atua, ae o latou o auuuna a Samoa na tofia ma valaauina, e auuuna ma le faamaoni ia Samoa ma fai le faamasinoga tonu a le Atua.

O le mea moni, e le o Faamasino uma lea e tauleagaina ai le Faamasinoga o Fanua ma Suafa. E i ai lava se vaega e toalaaiti o lo o tauvaea ai ma atagia ai le faamasinoga e tatau ai ona faamalolo loa. E le mafai ona utu le tagi a tagata, pe afai e tumau ai pea i latou ia le agavaa, le faamaoni, faatautala ma soona fai o tatou tagata, ma tauleagaina ai le Faamasinoga a Samoa, ma i tatou uma lava ua taua o Taitai o lenei atunuu. Aua e le taofia upu a le atunuu, e tutupu nei mea, ae o fea ea a matou Sui na faatutu atu i le Palemene? E mafua ai le fuafuaga a le tatou Malo, mo le Tulafono fou ua amata faatulagaina nei, mo le Faamasinoga o Fanua ma Suafa. O le aso e pasia ai e lenei Maota, e toe faasalalau uma ai avanoa Faamasino o le Faamasinoga o Fanua ma Suafa, ae faatulaga se filifiliga e mataituina lelei ai le faiga o tofiga ina ia mautinoa, e na o tagata e tatau ma agavaa faamaoni i le tofi Faamasino filifilia, e avea ma Faamasino o le Faamasinoga o Fanua ma Suafa.

O le a faatulaga ai foi le Komisi o Faamasinoga o Fanua ma Suafa e mataitu ma iloilo faavaitaimi le faauuina o tofiga o Faamasino, ina ia mautinoa tagata o lo o faia a tatou faamasinoga, o ni tagata e tatau ona faia a tatou faamasinoga. E le mafai ona tatou faamoemoe e lelei ni faaiuga a le Faamasinoga ae faaletonuga ma le agavaa tagata tatou te nonofo ma tofia i ai e faia a tatou faamasinoga. A lelei Faamasino e tofia, e lelei foi faaiuga a le Faamasinoga. A faamaoni ia Faamasino tofia, e amiotonu foi faaiuga a le Faamasinoga.

Lau Afioga i le Fofoga Fetalai ma le mamalu o le Maota, ua uma le Lauga Faa-Minisita a lo tatou Malo, ona ou faatuina ai lea o le lafo, e faagasolo ai le talanoaina e le Maota o le Lipoti a le Komiti ma le Tali a le Faamasinoga.

Lau Afioga i le Fofoga Fetalai, ou te faatu ai le lafo, *Ina ia tagofia loa e lenei Maota le Lipoti a le Komiti Suesue ma Tali a le Faamasinoga i lalo o le Tulafono Tumau 33 ma mataupu faanatinati e taua mo tagata uma, Urgent Public Business. O lea ua maea ona ou tolaulau tulaga faamata silasila i ai le Malo mo le faaleleia o le Faamasinoga o Fanua ma Suafa e taua ai mo le faapuupuuna o le tatou taimi, ona aua le toe afea e ni saunoaga vagana ni isi mataupu taua o lo o maua i le Lipoti a le Komiti Suesue ma le Tali a le Faamasinoga.*

O le lafo lea ma le faaaloalo lava, soifua ma ia manuia.

FOFOGA FETALAI: Malo faafetai. Ua maea le saunoaga a le Palemia.

Faaluaina e le Minisita mo Leipa ma Fefaatauaiga.

24 IANUARI 2017

**Felafolafoaiga i se Mataupu Faanatinati e Taua mo Tagata Uma
(T.T. 33)**

Na faamaonia le lafo. Na faagasolo felafolafoaiga i lalo o aiaiga o le Tulafono Tumau 33.

**FELAFOLAFOAIGA I SE MATAUPU FAANATINATI E TAUA MO
TAGATA UMA (T.T. 33)**

FOFOGA FETALAI: Ua faafofoga le Maota i le lafo ua tauala mai i le Saunoaga Faa-Minisita a le Afioga i le Palemia. Ua tuuina mai foi e Le na faatuina le lafo suafa o sui usufono e saunoa i Mataupu Faanatinati e taua mo tagata uma e tusa ai ma le Tulafono Tumau 33(2)(b).

E faasilasila atu i sui usufono uma ua na o i latou o le a ou taua o latou suafa e saunoa i le mataupu leni. O saunoaga foi ia le silia i le 5 minute a le tagata po o le sui usufono. E le tatau ona ova atu ma le itula o tatou talanoaina leni mataupu i le usitaia o le Tulafono Tumau 33(2)(a).

O le faasologa la leni o saunoaga e pei ona tuuina mai le lafo e tauala mai i le tusitusiga a le Palemia. O le saunoaga;

1. Tofa **LOPAOO Natanielu Mua** - Taitaifono o le Komiti Suesue Faapitoa.
2. Afioga **Hon Aeau Peniamina Leavaiseeta** - Sui Usufono mo Falealupo/Sui o le Itu Agai.
3. Afioga **Hon FAAOLESA Katopau T.Ainuu** ó Minisita o Faamasinoga.
4. Afioga **TAFUA Maluelue Tafua** - Sui usufono mo Aleipata Itupa i Lalo.
5. Afioga **Hon GATOLOAIFAANA Amataga Alesana Gidlow** - Sui usufono mo Faasaleleaga Nu. 1 Sisifo.
6. Tofa **Hon FAASOOTAULOA Pati Taulapapa** - Sui usufono mo Gagaemauga Nu. 2.

Ua ou taua ia suafa ina ia manino faafofoga tapuai mai a Samoa. Ia o le avanoa mulimuli e tuuina atu i le Palemia e tusa ai ma le Tulafono Tumau 33 (4) (e), o le a i ai i le Malo le avanoa e tali atu ai, pe afai lava, e manaomia nisi mea e faamalamalama.

Afai e maea uma saunoaga e pei ona faatulagaina, ae o lo o lava lava le taimi, ia e ono mafai ona maua nisi avanoa mo nisi sui e saunoa ai le faatagana a le nofoa. A ia le silia lava ma le 60 minute po o le itula, e faaalu i le felafolafoaiga leni. Ma lou faaaloalo, ou te tapa lau Afioga i le sui usufono mo Vaisigano Nu. 1, mo lau saunoaga ia ma e ou te toe fautuaina foi le Failautusi o le Fono Aoa e mataitu le tatou taimi e faatulagaina e pei ona ou tolaulauina.

E tapa ma le faaaloalo lau Afioga i le sui usufono mo Vaisigano Nu. 1.

Tofa LOPAOO NATANIELU MUA (Vaisigano Nu. 1): Faafetai atu i lau Afioga mo le avanoa o le matou Komiti e fai atu ai se manatu puupuu lava.

24 IANUARI 2017

**Felafolafoaiga i se Mataupu Faanatinati e Taua mo Tagata Uma
(T.T. 33)**

E faatalofa atu foi i le Taitai o le Malo, faapea foi le mamalu o le Kapeneta, Minisita Lagolago, ia faapea foi sui usufono mamalu o lenei Maota. Malo le soifua, malo foi le lagi e mama. Ua uma ona e toto le niu i le tuaoi a lau Afioga o le faasaoina o le taimi.

E le tele se matou upu po o se tala e fai atu i lenei ituaso, ae na o le agaga faafetai ona o le tali faaaloalo mai a lau Afioga i le Taitai a le Malo i se matou Lipoti po o se matou galuega vaivai. Faafetai foi le Tali mai a le Faamasinoga, ae na ona faaopoopo atu lava ma o se manatu foi e fai i ai. E le faatonua foi e Laupua Tamafaiga, ae o le matou le tausisia o le tulaga i le valaauina o i latou e omai e feagai ma sui o le Maota nei, e faamalulu atu. Ae i ai foi le tulaga taua o lo o mafai ona aliali mai, ua avanoa nei lau Afioga, o le mamalu o le Kapeneta, e matua fai lau faaiuga i e, po o le e le i usitaia le valaau atu faaaloalo a le Palemene. Ae ui i lea, e pei ona matou tolaulau atu i le matou Lipoti. O lo o ua silafia uma e le Maota nei, a outou Afioga ia le 30 o fautuaga faapea foi fautuaga faaopoopo e 2.

O le manatu autu lena ua uma ona fausia lau Afioga, pau lava se manatu, e le toe asa foi e le matou sa le ogasami ua tea, ae na ona faapea atu, o le lagona lena sa i le Komiti ina ua le tali mai i le Faamasinoga. Ae ona o le tatou Faamasinoga nei, e gafa ma le puipua o tatou measina ma meatotino. E le gata i lea, o le faaolaolaina ma le faatumauiina o le tatou aganuu, o le auala lena na ala ai ona aapa le Komiti i le tatou tu ma aga faasamoa o le faaaloalo, ma le vafealoai, ma o tatou uso i le Faamasinoga. E ui i lea lau Afioga, ia lena ua folasia e le Afioga i le Palemia ia le tulaga e pei ona tuuina atu nei, matou te lagolagoina foi sou finagalo. Ia o le matou upu lea ia manuia lenei aso i le feagai ai o le tatou fonotaga, le tatou Palemene ma le fonotaga, manuia tele le tapuaiga Samoa, manuia foi le tapuaiga a le Faamasinoga, Soifua.

FOFOGA FETALAI: Malo faafetai, ma ua oo mai le faasologa i le sui usufono mamalu mo Falealupo.

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai, e ia te au le ava e tataui ai ma le faaaloalo ou te tulai ai i le pau o le Palemene i lenei taeao. Ua maea foi ona toto le niu i le tuaoi, o le viiga o le tatou Matai, ona ua tatou oaoa i Faleseu filemu, toafimalie i lenei taeao. Ua logona foi le Maota Fono nei i le saunoaga a le Afioga i le Palemia i lenei taeao. Ua o se saunoaga logomalie ma le atoatoa, aisea? Ua outou faafofoga ma tatou maitauina ma ua aafia uma itu uma o le fotuai mai o le tatou Paeaiiga nei i fuafuaga faataatitia a le Malo, ona i ai lava lea o le manatu, o lea ua ta folau, faataatia itu vaega eseese i le tatou savaliga i lenei Paeaiiga. Ona i ai lea o le manatu, o le a matou faatuatua lau Afioga i le Palemia, ua logo i logo a le faafofogaaga a le Palemene i lenei taeao i le faataatitiaina o le faatofalaga o fuafuaga.

24 IANUARI 2017

**Felafolafoaiga i se Mataupu Faanatinati e Taua mo Tagata Uma
(T.T. 33)**

O lou la manatu lau Afioga i le Fofoga Fetalai, e puupuu lava, ave ma lafo le Lipoti a le Komiti lenei, soalupuleina e tatou uma lea ua faataatia le finagalo o le Malo, e faafaigofie ai le tatou galuega. O moomooga ia, ia toafimalie le tatou Fono, faafetai, soifua.

FOFOGA FETALAI: Malo, faafetai. Ia ua tatou see mai i le saunoaga a le Minisita mo Faamasinoga ma Pulega tau Faamasinoga.

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga): Faafetai i lau Afioga i le Fofoga Fetalai. E le toe tele se faamatalaga o lena ua taoto i luma Maota ia le saunoaga malamalama a le Taitai o le tatou atunuu. Pau lava le agaga o lou tulai atu, o le momoli atu o le faafetai ma le faamalo i le Afioga i le Taitaifono o le Komiti mamalu Faapitoa e suesuea le mataupu tau Faamasinoga o Fanua ma Suafa. Faamalo tauivi, faamalo le galulue maea, e leai se tulimanu o le galuega faa-Faamasinoga e le i oo i ai la outou asiasiga, o lea foi e manino mai i le Lipoti ua folasia. O lea foi ua ou taulimaina le talifuaitau a le Faamasinoga. E avea ai le avanoa lenei e momoli atu ai le faamalo i le Faamasino Sili ma le Peresetene o le Faamasinoga o Fanua ma Suafa mo le faasoia mai ma le maitau mai i le galuega o lo o taumafai atu i ai. O le fautuaga, ia taoto mai la le tatou mataupu o le a liuliu ane i ai le Afioga i le Palemia aemaise le Kapeneta o le a faatino ma faataunuu fautuaga ua outou faataatia mai i le Lipoti. O le a taumafai malosi lava i se taumafaiga malosi e mafai ai ona faataunuina ai nei fautuaga ua tuuina mai. O le a i ai se taimi e le o toe mamao ona tuuina mai lea o se ata faataitai aua so outou finagalo.

Ia manuteleina lau Afioga i le Fofoga Fetalai aemaise le mamalu o le Fonotaga, faafetai lava.

FOFOGA FETALAI: Faafetai le saunoa, ou te tapa ma le faaloalo le Afioga i le sui usufono mamalu mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai mo le avanoa, faafetai foi i lenei avanoa faaauuro ua maua e fai ai sina upu o le taeao.

E muamua ona ou faatulou atu i le Maota i le Afioga i le Palemia ma le Kapeneta faapea foi Minisita Lagolago, e le gata i lea e faapea foi sui usufono o lenei itu. E muamua foi ona ou faatalofa atu i le paia ma le mamalu o le Failautusi o le Fono ma le Sui Failautusi faapea le aufaigaluega, ae le gata i lea o le paia ma le mamalu o Faauluuluga o Matagaluega Tumaoti a le Malo faapea foi Matagaluega taitasi, le paia o Samoa o faafofoga mai aemaise le Aufaigaluega.

E maeu foi le agalelei o le Atua i lenei taeao, fai mai se tasi o upu, o le mea aupito sili ona matagofie i le lalolagi, e lagona e le loto ae le vaaia e mata. Sa faalogologo lava ma le totoa faataliga o tufugauli lenei taeao talu ai o le manaia o saunoaga ma fetalai sa faalogologo i ai.

24 IANUARI 2017

**Felafolafoaiga i se Mataupu Faanatinati e Tauga mo Tagata Uma
(T.T. 33)**

E talitonu lou taofi lau Afioga i le Fofoga Fetalai, e mamalu lo tatou atunuu i ana tu ma ana aga, e mamalu foi tatou Tulafono i tatou tu ma aganuu. E vaavaalua la vaega nei aua fai mai le upu, e malu le tagata i lona nuu. O le manaia ia o le folasaga a le Afioga i le Palemia i lenei taeao, ma e le tele foi sou leo e toe fai atu iai, na o le pau a le agaga o lau tuualalo ma lau fautuaga e tuu atu i le tatou Malo. O lea ua manino le Lipoti a le Komisi sa filifilia ua manino foi folasaga o a latou fautuaga pei ona i ai i le Lipoti. O lea foi ua silasila le paia o le Palemene aemaise lau Afioga i le Fofoga Fetalai i le Tali a alii faamasino po o le Matagaluega o Faamasinoga na aumai e uiga i o latou tiute ia ma o latou aia. O au se tasi o sui lau Afioga i le Fofoga Fetalai sa fai lau folasaga i le Komisi ona o mafuaaga nei, i lou lava lagona faasui usufono, e tolu vaega e tutusa o latou tumuai i le tatou Faigamalo. O le vaega lea a le Executive, Judiciary ia ma le Palemene. Sa i ai foi la lou lagona vaivai e tutusa uma vaega ia e tolu ma e le feaiaai foi vaega ia e tolu. Ae talu ai o le manaia foi ia o le folasaga a le Afioga i le Palemia, na ou faalogo ai ma le totoa o faapea mai, o le taua o lenei mea ona e tele itu e fia faaleleia ai le galuega a le Faamasinoga. O le tatou ato, e ui ina tutusa vaega e tolu, a o le ato fevailia'i o tiute faatauagai o tatou Faigamalo lea e tolu. O lea lava la sa talafeagai ma lou taofi na avatu i le Komisi o le Faamasinoga. Pe faamata ua sili ae le maualuga o tatou i lo le Faamasinoga? Pe ua sili foi le malosiaga o le Faamasinoga i lo tatou ia faapena foi ma le Pulega? Ona i ai lava lea o lou manatu lau Afioga i le Palemia ma le mamalu o le Kapeneta aemaise le tatou Malo, o le tagi a le pumate o le faaoololomaau e tuualalo atu i lau Afioga, ou te masalo ua onomea ma lava au saunoaga sa fai nei i alii faamasino talu ai le mumusu e omai ia po o le tetee foi i le finagalo o le Komiti sa avatu, o lea na e saunoa ai ua fefefe, e mama i latou e faatautala i le Fono Aoaio Faitulafono, ia o le faatalauula e pei ona saunoa i ai lau Afioga, e moni e saolele lava le saunoaga, o le faatalauula o le faaoioi atu lea e afifio mai ma talaaao mai. Ia ae talu ai ua mumusu Faamasino e omai. O lou lava ia talitonuga faasui usufono na o au lau Afioga i le Palemia e ala atu i le Afioga i le Fofoga Fetalai, malie ia lau Afioga ua lava ia upu, ua fefefe ma mama i latou e faatautala e tusa ai ma le talo atu a le Komiti mamalu po o le Komisi, sa tatalo atu e afifio mai ma talaaao mai e aumai so latou finagalo.

FOFOGA FETALAI: Ou te fesoasoani atu i le sui usufono, na ona e saunoa e tusa ai o le mataupu leaga o lena o le a e saunoa i le saunoaga a le Palemia, ae saunoa oe ia i sou finagalo e tusa ai o le mataupu.

Afioga TAFUA MALUELUE TAFUA: E relevant a lau Afioga. O lea o le a avatu lou manatu o lea ou te faaoololomaau ma ou tuualalo e ala atu i lau Afioga i le Fofoga Fetalai, tatou faamagalalo ma fai le tatou vafealoai. O le agaga lea o lou tuualalo atu i lau Afioga ma le tatou Faigamalo, ia tatou faamagalalo i Faamasino ma le latou vasega ae aua tatou te matau, e tofu le tagata ma lona sese.

24 IANUARI 2017

**Felafolafoaiga i se Mataupu Faanatinati e Taua mo Tagata Uma
(T.T. 33)**

Na ona ou tuualalo atu ma ou fautua, ua lava ia saunoaga ua e saunoa atu i ai ua palaai i latou e omai, ua mama ma fefefe, i lou talitonuga ua lava lea upu ua tuu atu i ai mo latou ae tatou alo i luma, o le tatou aganuu e faavae i le vafealoai ma le faaaloalo. Ia o le tala lea ia fai i le tatou vafealoaloai, o le ato e feaveai, o le ato e fevailiai ia o tiute ia o le tatou Faigamalo.

Lau Afioga i le Fofoga Fetalai o se upu lea mai Aleipata i le Itupa i luga ma lalo e molimoli atu ai so matou manatu, ae tatou loto faamagalo i lenei aso i le tatou fono amata o le tausaga. Ae faafetai o lea ua manino ma manaia tuutuuga ma fuafuaga na fuafua e le Malo aua le alu i luma o le itu o le faamasinoga, ia manuia le taeao.

FOFOGA FETALAI: Malo faafetai, ia ua see mai le saunoaga i le sui usufono o Faasaleleaga Nu.1 i Sisifo.

Afioga Hon GATOLOAIFAANA AMATAGA ALESANA GIDLOW (Faasaleleaga Nu. 1 Sisifo): Ou te faafetai atu i lau Afioga i le Fofoga Fetalai mo le avanoa mo le itumalo o Faasaleleaga Nu.1 i Sisifo e mafai ai ona faaleo se lagona e tusa ai foi o lenei mataupu taua ua i lumamea i lenei taeao. E talu ai foi ona o le fonotaga muamua lenei o lenei tausaga, e manatau ai e avatu le agaga faamalo ma le agaga faafetai ma moomooga o lenei tausaga fou i lau Afioga i le Fofoga Fetalai, lau Afioga i le Palemia ma le mamalu o le Kapeneta, aemaise foi Afioga i Minisita Lagolago le afifio atu o le mamalu o le Palemene tainane le afifio o Faauluuluga o Matagaluega ma Faalapotopotoga eseese a le Malo.

Ou te faatalofa atu foi i le Afioga i le Failautusi ma le aufaigaluega o lo o vae ma lima i ai le Palemene nei, e faapea foi ona faatalofa atu i le faafofoga mai a Le Ao Mamalu o le Malo aemaise Sui o le Fono a Sui Tofia o le tatou Malo ma o latou Masiofo, faapea foi le faafofoga mai a le Afioga i le Faamasino Sili, le Afioga i le Peresetene o le Faamasinoga o Fanua ma Suafa aemaise o Faamasino o Faamasinoga eseese o le tatou Faamasinoga. Le faafogafoga mai a Samoa, ia faapea ona i ai faamanuiaga ma moomooga i lenei tausaga ae le gata i lena, o le aufaitatalo ma le Aufaigaluega a le Atua o lo o faanonomanu aua foi le faigamalaga a Samoa i lenei tausaga ina ia taunuu i se manuia aua le manuia o Samoa.

Lau Afioga i le Fofoga Fetalai, ou te tulai atu lava ma le agaga faafetai tele. E faafetai atu i le saunoaga a le Afioga i le Palemia, o se saunoaga ua manino, o se saunoaga ua atoatoa ai folasaga e tusa ai ma le Lipoti taua a le Afioga i le Taitaifono ma le Komiti sa latou suesueina lenei mataupu tau Faamasinoga mo le Palemene. E leai se manatu tele o le a oo i ai pau lava le agaga o le fia lagolago atu, lagolago atu i se agaga ua aumaia e le tatou Komiti Faapitoa ma lagolagoina e le Afioga i le Palemia le tulaga lea o le faatauaina o le Faamasinoga a Samoa. Aua foi o le agaga o i o lo o faatauaina ai ma lotea ai tu ma aga a le atunuu o lo o tatou ola ma soifua ai, le aia a le Samoa ma e ao foi la ona ave i ai se faatau ma le faamuamua.

24 IANUARI 2017

**Felafolafoaiga i se Mataupu Faanatinati e Taua mo Tagata Uma
(T.T. 33)**

O le agaga, o faamasinoga mai fafo, e ese foi le agaga e aumaia ai aemaise le tulaga lea o le aiatatau, a tagai ma outou silasila o le tele o faamasinoga o lo o lotea i totonu o le tatou Ofisa o Faamasinoga o Samoa, e aga lava i le aiatatau a le tagata. Ae peitai, a tatou o i le aiatatau o lo o aumaia mai fafo, o le aiatatau a le toatasi. A tatou agai i le aiatatau o lo o faapea ona soifua ai le Samoa, o le aiatatau a le lautele, aiatatau a le aiga potopoto, aiatatau a nuu ma afioaga, aiatatau a le atunuu. Ou te lagona la i le faapitoa ma le faataua o lotea mataupu tau Samoa, o le a mafai ai ona ave foi le faataua lea i le aiatatau a le lautele o aiga ma alaalfaga o lo o faapea ona maua ai le filemu o Samoa atoa. Aua ua aafia ai foi le aia lea faasuli e le o iai ni a latou tautua, faasuli o lo o i ai i totonu o aiga ma galulue ma tutua e atiae aiga ae ua afaina ona o le aia e toatasi a le tagata e le o i ai sona sao, e le o i ai sona aoga, e le o i ai sana tautua i totonu o aiga. Ae peitai e oo mai loa i totonu o faamasinoga, ua loto faatasi, ua aia faatasi ona o le aia faasuli faaletagata e toatasi.

O le mea lea lau Afioga i le Fofoga Fetalai, ua ou lagona ai ma ou faafetaia ai ni fautuaga taua ua aumaia e le tatou Komisi Suesue i le Afioga i le Taitaifono ma i latou uma na gapatia i lenei galuega, aemaise foi le lagalaga a le tatou Taitai o le Malo, faafetai mo nei avanoa e mafai ona toe tagai i ai Samoa e toe fafagu ma toe avae i luga tu ma aga o lo o filemu ai Samoa, na sau ai Samoa ina ia tumau ai pea le mamalu ma tumau ai le viiga o le Atua na tatou faavae i ai.

Ia o le faapoopo atu lea lau Afioga i le Fofoga Fetalai, faafetai tele mo lou avanoa, ia manuia tele le Fonousu a Samoa.

FOFOGA FETALAI: Malo malele i lau Afioga i le tamaitai sui usufono, ia ua oo mai le faasologa i le toe ulutaia o lea itu o le Maota le sui usufono mo Gagaemauga Nu. 2.

Tofa Hon FAASOOTAULOA PATI TAULAPAPA (Gagaemauga Nu. 2): Viia le Atua, tatou te talitonu o le Afioga lea a le Atua ia tatou ave le faamua i le Atua ona fai ai lea o sou finagalo ma so tatou faamoemoe. Ia tatou tatalo i le Atua ia auina Lona Agaga Paia ina ia soalaupule i o outou finagalo ma o tatou faamoemoe ina ia faapena ona tatou vaavaai totoa aua se manuia mo a taeao.

E faafetai atu i lau Afioga i le Fofoga Fetalai, faafetai i le Afioga i le Palemia mo le fofoga malamalama e pei ona tatou faafofoga i ai ma faafofoga i ai Samoa ma lana tapuaiga, faafetai i le Afioga i le Sui Palemia ma le aiga Kapeneta i alii ma tamaitai, sui usufono mamalu o le Palemene ma Samoa ua potopoto pei ona tatou ai i lenei taeao. Ou te mitamita lava ua maua foi lenei avanoa e avea ai le leo o Faasootauloa ma tofa taumolimoli o si ou itumalo o lo o tapuai mai. E momoli atu le agaga faafetai i le Komiti mamalu na tofia i lenei mataupu e pei ona tatou i ai. E faigofie tulaga uma pe afai tatou te talitonu ma faamoemoe i le Alii, o pule uma lava e mai le Alii, o faaiuga foi e mai le Alii.

24 IANUARI 2017

**Felafolafoaiga i se Mataupu Faanatinati e Tauga mo Tagata Uma
(T.T. 33)**

E leai se mea tatou te faasea ai pe tatou te ita ai, pe tatou te faameo ai ae a tatou talitonu i le Alii, lea ua pau le susuga i le Taitai o le Malo ia tatou talitonu, o pule uma o pule mai le Atua. o taitai uma o taitai mai le Atua, pe e te atamai pe e te le atamai po o le a lava le tulaga o e i ai, e faia e le Atua mea sili pe afai tatou te talitonu ma faamoemoe i le Atua. E momoli atu ai le agaga faafetai i le Komiti mamalu pei ona latou saunia lenei Lipoti, e talitonu o lenei mea o le faaiuga e le o se mea e faigofie. O se mea e te fesili ai i le Atua, e te tu i luga ma e nofo i lalo e pei o la le Tusi, -aua ne i o tatou tuua Ieruselema ae se i afio mai le Agaga Paia e faamatala ia te oe ma au ma i tatou le mea e ao ona tatou faia. Faafetai o lea ua tatou faalogologo i le folasaga a le Afioga i le Taitai o le Malo ia tatou vaavaai po o ai lea na te taitaiina le tatou Malo. O le a sou maualuga o le a foi sou tomai, ia tatou te faamoemoe o le pule ua avatu ia te oe ma au ma i tatou uma, o le pule mai le Atua, ia alofa mai le Atua ma fesoasoani mai i tatou mataupu pei ona i ai i lenei aso. Soifua.

FOFOGA FETALAI: Malo, faafetai. Ia ma e ou te tapa lau Afioga i le Palemia, pe i ai se isi ou finagalo i se mea e toe fia faamalamalama.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le auga atoa o le mataupu lenei tatou te talanoa ai o le ave o le fesoasoani i alii faamasino ina ia fofo ai le anoano o le mau mafatiaga ia e sulufai mai ai tagata, ua manatu ua afaina a latou meatotino i le Malo.

Lau Afioga i le Fofoga Fetalai, se ua ta fiu e logo tagata e le o sau matafaioi lena o le matafaioi lena a le Faamasinoga. Ae ua sau, sau, sau tusi, se Tuilaepa se fesoasoani mai ua avea a matou meatotino. Ia ona ou nofo lava lea ma ou mafaufau, o ai e sulu i ai tagata? E i ai le taimi na ave ai lau tusi i tai, se i faamolemole lava se i tilotilo ane i mataupu ia ua sese mai ia te au ae o mataupu a outou. Ae ou faalogo atu i le isi aso ua saunoa le isi Faamasino, ua tele le aia valea mai o le Taitai o le Malo ae leai lava ma sana feau na te aumaia ai mea ia i i le Matagaluga o Faamasinoga. A o mea ia, o lea e saili e le atunuu po o fea le mea e maua ai se fofo, e tasi lava la le tali e maua ai le fofo, i sui o le atunuu lea i totonu o le Palemene lenei. A o lea foi e i ai i totonu o le Palemene lenei i le faavae ia le tiute o tatou e fai le fofo mo latou ia. Ua ala ona ou taua ia mea, ona o le upu lea faapea mai, ia maua tatou i le fefaamagaloi. E le o ni fefaamagaloi tatou mea ia e fai, e tasi lava le mea na tatou omai ai iinei, ia fai le galuega mo tagata na aumaia tatou, fai le galuega lelei mo tagata na latou palotaina tatou. Aisea? Aua foi e tai lima tausaga ma fai tatou suega, oki aku ia ae omai ia, oki aku ia ae omai ia, e le iloa po o i tonu lava i le mea lea o lea e mafua ai le tulaga lea ona ua le iloa e tagata po o fea a o i ai.

24 IANUARI 2017

**Felafolafoaiga i se Mataupu Faanatinati e Tauga mo Tagata Uma
(T.T. 33)**

O lea sa taua ia faamasinoga, oi se le anoano foi o au faamasinoga e fai ae pei e tilotilo mai loa le Faamasino ua tulai atu le faipule faamaati loa ma sapelu ia uma ane lava ua pau le faipule. E ese le agaga lea i ai, ne i faapea ia tagata lautele ai o ai ni mea faapitoa mo tatou ae i ai isi Faamasino ua matua matilatila i totonu o le faamasinoga, e vaai mai loa o saofai atu se isi o outou faamata loa ma le pelu. Po o le a le sese o le faaiuga ae fai lava le faaiuga sese.

Lau Afioga i le Fofoga Fetalai, na iu lava ina aumai ai foi i totonu o le isi talanoaga, e sefulu ma ona tupu itu o le isi suafa na fai i le 30 tausaga talu ai ae le i leva atu ona fai le iuga ae ua ova atu i le 30 tausaga o tolo, tolo, tolo e le i leva atu nei na fai le iuga. E lima iuga, lima talosaga na suesue ae fai le iuga ua lava lea ae soloa i le aufuefue ia le matou itu.

Lau Afioga i le Fofoga Fetalai, o le tulaga lena ua oo ina le mafaufau nisi o Faamasino. E pei la o le tulaga na ou taua le tulaga lea i le 1 omai ona e pei e fou ia latou, ae o fafo i Peretania, Ausetalia ma Niu Sila e fai loa le fonu a le Komiti o le Palemene ae samania faamasino e o atu. Ua faafia ona samania au e le Faamasinoga o Fanua ma Suafa, faatoa ou faitau i le faaupuga e saina e le tamaititi ou te le iloa po o le a lona tulaga ae saina aumai i le Palemia, ua valaauina oe ia e sau ae le i oo mai i le aso lea, o le a o atu Leoleo e loka mai oe, pe molia i le faamasinoga po o se mea faapena. O le mea la e fai atu ai, o le valaau mai lava o le faamasinoga tuu au mea ou alu, valaau atu le Komiti o le Palemene tuu a matou mea Faa-Minisita ae matou omai. Ae pei o se taimi muamua lea o lea ua valaau atu ai le Komiti o le Palemene, ua tetei ai ae ua galo ai ia tiute tauave ia e i totonu o le faavae. E leai ma se isi e faatautee i le malosi o le Palemene pe a alu atu lana valaau po o le Faamasino Sili po o ai lava, e tuu uma ana mea ae sau i i. O lea la ou te faamalie atu i sui usufono, e pei ua tau le pua ma lafo mai, ia maua tatou i le loto faamagalalo, e le o ni faamagaloga mea ia tatou te omai e fai i totonu i i. O mea ia tatou te omai e fai i i e fai le tatou galuega ia tali mafatiaga o tagata la e faalagolago mai ia tatou, a tatou le mafaia ia ua sili ai ona tatou faamavae ma o tatou tofi leaga o i tonu lava e faamasino ai tatou e tusa ma le tatou tautoga. O le tautoga na fai ina ia avea oe ma faipule e te faia le faamaoni e aunoa ma le fefe.

Lau Afioga i le Fofoga Fetalai o toe upu na, e le o ni tulaga o le fia lelei i Faamasino po o le fia lelei i ai, ae o le tatou tautoga lea na fai e tatou te faia mea lelei ma mea silisili mo tatou tagata. Ia lau Afioga i le Fofoga Fetalai o le toe tali atu lena.

FOFOGA FETALAI: Malo faafetai, ia lau Afioga e na ona faamanatu atu lou finagalo i le lafo ina ia tuuina atu le Lipoti mo se finagalo o le Malo. Ia o lea ua faagasolo le tatou galuega ae onosai mai le sui usufono se i saunoa mai le Palemia.

24 IANUARI 2017

LAFO A LE MALO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia tuuina atu nei loa Lipoti nei e lua(2) i le Malo mo sa latou faaiuga.* O le lafo lea ma le agaga faaaloalo.

Faaluaina e le Minisita mo Pisinisi ma Alamanuia, le Minisita mo le Soifua Maloloina, ma le Minisita mo Tagata Tafafao Maimoa Mai Fafo.

Na faamaonia le lafo ma tulai ai Lipoti e lua(2) o le a tuuina atu i le Malo mo sa latou faaiuga.

LAFO A LE KOMISI FAA-PALEMENE

Tofa NAFOITOA TALAIMANU KETI (Sui Taitaifono): Ua logoitino ua logo i ivi, ua logo foi i loto saunoaga taua ma le matagofie o lenei taeao ona manatu lea e le toe vaea le falaooto i le mamalu o lenei Maota aua o paia lava e le avea e tumau e oo i le faavavau.

Lau Afioga i le Fofoga Fetalai, ou te tulai atu ma le agaga faaaloalo e faatu le lafo, *Ina ia faamaonia e lenei Fono Aoao le Polokalame o Fonotaga mo le Tauaofiaga o le 2017/2018 ua tuuina atu i inei e pei ona faamaonia e le Komisi Faa-Palemene.* Tuuina atu le lafo ma le faaaloalo i lau Afioga i le Fofoga Fetalai.

<i>Masina</i>		<i>Aso</i>
<i>Mati</i>	-	07
<i>Me</i>	-	30
<i>Iuni</i>	-	20
<i>Aokuso</i>	-	22
<i>Oketopa</i>	-	17
<i>Tesema</i>	-	19
<i>Ianuari 2018</i>	-	23

Faaluaina e le sui usufono mo Palauli le Falefa.

Na faamaonia le lafo ma faamaonia ai le Polokalame o Fonotaga a le Palemene 2017/2018.

FOFOGA FETALAI: Ia mo le faafofoga tapuai mai a Samoa o galuega fai a le Palemene e le milia faauu a tatou upu ina ia manino ma malamalama i le gagana tuusao, o i ina e faatino ai le tatou galuega i le amiotonu aemaise foi o le faafofoga tapuai mai a Samoa, ina ia faapena ona manino. O le mea la lea ia o le matou fesoasoani atu lena.

Na faataatiaese Taulumaga a le Fono Aoao mo lana malologa masani i le itula 10.41 i le taeao ma toe faaauau i le itula e 11.23 i le taeao.

24 IANUARI 2017

Lafo mo le Suia o Itula Fono

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoao Faitulafono. Ua ou manatu foi ua maua le faaopoopoga o le malosi i le paia o sui usufono mamalu ma le Kapeneta e faaauau ai le tatou galuega. Ou te muamua ona tuuina atu le avanoa i le Afioga i le Palemia mo se lafo.

LAFO MO LE SUIA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga fetalai, e ui lava o le Tala o le Tupe o lo o tatou talanoaina ua na o se Tala Faaopoopo. O le tulaga lava ia o Tala Faaopoopo e na o nai seleni e faaauau ai ia le tatou galuega, se i tau i le faaiuga o le tausaga leni i le faaiuga o Iuni. A o le tulaga lava ia, o la ua i ai uma seleni i totonu o le Tala Autu o lo o faagasolo pea se i vagana ai nai mea laiti e toe moomia ai nai seleni e toe faaopoopo. O lea e manatu ai e moomia lava le suia o tatou itula Fono ina ia vave ai foi ona tatou taunuu i se taunuuga. O le mea lea ou te faatuina ai le lafo, *Ina ia suia Itula Fono i itula nei mai le 9.00 i le 1.00, 3.00 i le 7.00 i le po ma o nei itula e tumau seia pasia le tatou Tala Faaopoopo o Tupe 2016/2017.*

Faaluaina e le Minisita mo le Soifua Maloloina, Minisita o Tupe ma le Minisita mo Tina & Tamaitai, Atinae o Nuu ma Afioga ma Agafesootai.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2016/2017.

TULAFONO TAU FAAOFI O LE FAATATAUINA O TUPE FAAOPOOPO (NU. 1) 2016/2017 – felafolafoaiga i luga o le faitauga faalua

FOFOGA FETALAI: E tusa ai ma Tulafono Tumau o le a faagasolo nei loa felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo Nu.1 2016 i le 2017.

O le avanoa leni o sui usufono e saunoa ai i Tulaga Tau Tupe ma le Tamaoaiga o Samoa faapea Faiga Faavae Tau Tupe a le Malo.

Ou te faamanatu atu foi i sui usufono e le tautalagia i le taimi nei Mea Taitasi e pei ona masani ai ona laga i saunoaga faalauaitetele a sui usufono. E faatoa saunoa i Mea Taitasi o le Tulafono Tau Faaofi i taimi o le iloiloga auililili pe a maea felafolafoaiga i luga o le faitauga faalua.

Ia o le avanoa leni mo se sui usufono muamua e fia saunoa. Tulai mai le sui usufono mamalu mo le Itumalo Tu Taulaga i Sisifo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Afioga FAUMUINA ASI PAULI WAYNE FONG (Itumalo Tu Taulaga i Sisifo): Faafetai lava i lau Afioga i le Fofoga Fetalai, e faatalofa atu foi i le mamalu o sui usufono mamalu o le Palemene i lenei taeao. E puupuu lava se manatu, na o nai manatu lava ia i le aotelega o Tupe Faaopoopo lau Afioga, aua foi le afa o lenei tausaga o le a tatou sauni atu i ai.

E muamua ona momoli atu malu i puega i lau Afioga i le Fofoga Fetalai, a o se manatu e fia tuu atu faamolemole i lau Afioga i le Minisita po o le Afioga i le Palemia, o ia o lo o fitoitonu i ai le Ofisa o le Fono Aoaofaitulafono o Samoa. E maitau lava ma le faanoanoa le tulaga o seleni faaopoopo foi aua foi le faatinoina o galuega a le Komiti aemaise foi o le mamalu o Komiti taitasi o lo o latou faia le galuega fita aua foi le fesoasoani i mataupu o lo o aumaia i Komiti Faa-Palemene. A fuafua i le aofaiga o le tupe o lo o aumai, e 5 Komiti, 22 i matou o lo o faia le galuega, e le taitai lava ona lava. O le agaga lava ia o lo o taumafai e faagaioi Komiti, fai galuega taitasi e ao ona mafai ona matou faia le galuega, pe oo foi i nai malaga ia o lo o ai nai faipule i fafo, e tele lava ina o atu e le lava le seleni o lo o tuu mai ona o atu lava lea tutu i poletito lau Afioga i le Fofoga Fetalai seia oo foi i le taimi e o ai i totonu ma amatalia se usugafono.

O le isi tulaga, o tulaga i taavale o lo o faaaogaina e Komiti lau Afioga i le Fofoga Fetalai. E talitonu le agaga o taavale nei sa faaoga mai e isi Komiti sa i ai, ae atonu sa tafafao Komiti na, a o le tulaga lea ua i ai Komiti i le taimi lenei lau Afioga i le Fofoga Fetalai, e le faapaole le faia o galuega. E tatau ona i ai taavale lelei e afifio ai sui usufono aua foi e tutusa uma lava tatou sui usufono. Pau le mea e eseese ai, o sui usufono la e i o ua o i le Malo, a o sui usufono lea e iinei, ua o i le Itu Agai. Ae talitonu le agaga lau Afioga i le Fofoga Fetalai, se i tagai ifo lava i ai le Afioga i le Palemia po o le Minisita mo le Ofisa o le Fono Aoaofaitulafono, e leai, faatutusa mai tatou i tulaga e fai ai galuega, ona fai fiafia lava lea lau Afioga i le Fofoga Fetalai. O se motugaafa lena i le Ofisa o le Fono.

O lea e tilotilo atu e le o i i se Tala Faaopoopo a le Ofisa o Auala Tetele ae o lo o lavea lava i lalo o le Matagaluega o Galuega Tetele a le Malo. E toe tuu atu lava se manatu autu i tulaga i auala i Falelauniu, e talitonu o lo o i ai le fesetaiga i le Ofisa o le SLC faapea foi ma le Ofisa o lo o vaaia auala tetele a le Malo, ona o le tulaga po o ai e tatau ona faia. Ae na ona taatia atu i ina i lau Afioga i le Minisita o Galuega a le Malo, se i toe silasila ifo i ai, ua lava ia lena misa ae fai le tatou auala leaga o lo o mafatia pea i latou o lo o nonofo ai, ae o lo o tau soalaupule po o ai tonu e tatau ona faia le auala.

Ia, o nai manatu ia lau Afioga i le Fofoga Fetalai, ae taatia Moamoa aua ou te iloa o lo o lavea i le polokalame a le Malo mo le tausaga fou lea o le a faata atu ai lava i i e oo i luga i Malololelei ma maua ai foi se avanoa e asiasi mai ai i latou o lo o afifio mai tua, oso mai Moamoa, tilotilo foi i le laulelei ma le lalelei o lena foi itumalo e le o aliali tele mai totonu o le tatou atunuu.

Ia o se faamatalaga lea, ia manuia lava fuafuaga o le Fono i lenei aso. Ma le faaaloalo lava.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

FOFOGA FETALAI: Faafetai saunoa. Ia, tulai mai se isi sui usufono e saunoa, le sui usufono mo Lefaga ma Faleaseela, ou te maitau atu o e tau tulai mai. Tulai maia le sui usufono mo Lefaga ma Faleaseela.

Afioga TOLEAFOA KEN VAAFUSUAGA (Lefaga ma Faleaseela): Faafetai i lau Afioga i le Fofoga Fetalai mo le avanoa. Lau Afioga i le Fofoga Fetalai, masalo o le a ou le toe aapa i paia ma mamalu o Samoa i lau Afioga i le Palemia ma le paia o le Kapeneta ma le mamalu o lenei Maota.

A o lenei itula, o le a agai tonu loa se manatu e tusa ai ma le Tala Faatatau Faaopoopo o le Tupe. E lagolagoina ma le agaga faaaloalo le Tala Faatatau Faaopoopo o le Tupe. Ua maua foi o lo o lilifa lava i le tulaga tau soifua maloloina aemaise le tulaga tau aoga. E i ai le agaga e fia tuuina atu se talosaga i le Minisita o Aoga, o lea ua agai atu le Tala Faatatau Faaopoopo o le Tupe aua galuega faaii foi o lenei Tala Faatatau o le Tupe, ae talosaga atu foi ma le faaaloalo i lau Afioga i le Minisita, masalo e maua suega ia faatoa uma atu nei a alo ma fanau, masalo o lo o i ai nisi o faaiuga ua faaletonu. E manatu lou sui usufono e tatau ona silasila i ai le Matagaluega o Aoga i tulaga faapenei, aua a faatamala le Matagaluega o Aoga, e toe alu foi tatou tupe aua le toe faatinoina o nei fuafuaga aua le toe faia o recount a fanau ma tulaga faapena. Afai o lea e utiuti le faaso o le tamaoiga o le tatou atunuu, ia se i alofa lau Afioga i le Minisita ma le Matagaluega, faaoga tatau seleni a le tatou Malo.

Ona ou agai mai lea i le Matagaluega o le Soifua Maloloina, e lagolagoina ma le agaga faaaloalo le tupe lea ua faamatuu atu mo le soifua maloloina o le tatou atunuu, aemaise lava i le tulaga lea i le vaegatupe lea ua faamatuu atu mo togafitiaga o tatou gasegase foi nei e faaoo atu i atunuu fafo mo togafitiga, e i ai le lagolago a lenei sui usufono, ua alagatai foi lenei vaegatupe e fesoasoani i le tatou atunuu, aemaise o nisi ua le mafai ona togafitia i Samoa nei i le tatou falemai, o lea ua i ai le vaegatupe lea e fesoasoani mo lea tulaga. Masalo ua i ai le lagolago a lenei itumalo i le Tala Faatatau Faaopoopo o le Tupe, ae o nai motugaafa na aua le Tala Faatatau Faaopoopo o le Tupe.

Ia manuia le Fono. Soifua.

FOFOGA FETALAI: Faafetai. Ia, ua sauna mai le sui usufono mo Vaisigano Nu.1.

Tofa LOPAOO NATANIELU MUA: Faafetai i lau Afioga i le Fofoga Fetalai mo le avanoa. Faamalo foi i le Maota nei le onosai.

Ua ou tu atu ma le faaaloalo lava, e le tele tele ni manatu o lenei itumalo, ae ou te vaai atu i le Tala Faatatau Faaopoopo o le Tupe, e leai lava se mea o sau ai se i fai ai le vai o le matou nuu la e maua ai le siama. Ou te manatu e ala ona augatata le Matagaluega o le Soifua Maloloina e fai le latou galuega, o lona uiga e leai se tupe e fai ai aua o le matafaioi a le Soifua Maloloina, o latou latou te mataituina le lelei ma le 1 lelei o le vai.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O le aso 22 na aumai ai le lipoti, na ou talosagaina le lipoti a le Ofisa o le Soifua Maloloina e vaai le vai o Auala, Vaisala ma Sataua. Peitai ane ua maua mai le lipoti, e le ausia le lelei e tatau ona i ai mo le taumafaina e tagata. A o lea lava e faatalitali mai lava le Matagaluega, po o afea e o atu ai e fai le latou faasalalaua foi lea i le matou itumalo. A feoti lava nisi ona o le latou galuega, ou te lagona o le mea lena e le faia e le Minisita, o le mea lena e fai e le Matagaluega, a o la e foi e faalua lava le Pule Sili o le Suavai ia i lana Matagaluega aua o ia la e faia le vai ae leai lava se mea o faia. A o le manatu ea lau Afioga, o nei tagata e mamai ai tagata o le itumalo? Afai e le o lava tupe, talanoa i le Afioga i le Minisita, aua o le tala lena a le Ofisa o le Vai, fai mai e leai se tupe e faamama ai le vai. Ia, na ona faapena atu lau Afioga, leaga e fai lava si taua o le mataupu lena mo lena itumalo, e tatau lava ona ave i ai le faamuamua. E pei foi ona fai atu lau tala, ua uma foi ona logo le Afioga i le Minisita, ae fai mai e le o se latou galuega, lea e fai, e tatau ona o latou e fai se consultation i Savaii ae fai mai e leai ni tupe. A o mea ia e tatau ona tuu i ai le faamuamua i lalo o le tatou SDGs, o le soifua maloloina ma le ola lelei o tatou tagata, e tatau lava ona ave i ai le faamuamua, ae ua maitauina e le Matagaluega lena, e tatau lava ona ave i ai le faamuamua. Ae afai foi ua le mafai ona fai le galuega, e manaia pe a faamavae mai vaeatu le paia o le Maota.

Ma le faaaloalo lava.

FOFOGA FETALAI: E manatu foi le Nofoa e tatau ona puipui le afaigaluega a le Malo ina ia avea foi le naunau i le ia ae ia manumanu foi i le upega, e ui i lea, o le lui lea a le Palemene ina ia silasila ifo foi i le tulaga pagatia o le itumalo i le fia taumafa. Malo faafetai saunoa.

Tulai mai le sui usufono mo Gagaifomauga Nu. 3 lau Afioga i le tamaitai sui usufono.

Afioga FAAULUSAU ROSA DUFFY-STOWERS (Gagaifomauga Nu.3): Faafetai lava i lau Afioga i le Fofoga Fetalai mo le avanoa, ae ua ou faaaogaina foi lena avanoa e avatu ai foi ni motugaafa a si o matou itumalo e tusa ai foi o auaunaga o lo o faatinoina nei. O le matou falemai lea i Safotu, e amata atu i Manase e tau i Aopo o afioaga ia e agai i le falemai lea i Safotu. Ae lagona lava le faanoanoa ona o le tulaga o le falemai la e i ai i le taimi lena. E fai o le faaletonu o le falemai, ae faapena foi ma le leai o ni fomai, ae o nai teine tausimai o lo o faatinoina le galuega. E faalua ona ou oo i ai i le falemai i le vaitaimi lea o le kerisimasi agai mai i le tausaga fou. Ae ou te talitonu o lea e i ai tupe ia e faaagaaga po o lo o fuafua foi mo le auaunaga i le falemai. Ae paga lea, e ese le faanoanoa o le vaaiga o lo o i ai ona o le fai o le leai o se fomai e faatinoina le latou galuega i le avatu lea o le auaunaga i le mamalu o le atunuu o lo o agai atu i ai, ae na o nai teine fomai o lo o taumafai i le mafai e faatinoina ai le auaunaga. Ona oo ai lava lea ina fai e le tausimai po o le teine tausimai lea le faaiuga o se gasegase o lo o masii atu.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ou te talanoa atu ona o au lea sa i ai le matou mai i le falemai lea i Safotu lea ua ala ai ona ou avatua, ou te avatua ona o se mataupu e ao ona silasila i ai lau Afioga i le Minisita o le Soifua Maloloina. Ia o se tuualalo lava pe a tusa ai ma le finagalo pe mafai ona silasila ifo i le vaega lea.

E faapea foi ma se lagona i le tulaga tau aoaoga i lau Afioga i le Minisita mo Aoga, Taaloga ma Aganuu, ou te talitonu toeitiiti lava atoa le tausaga o le tatou Paeaiaga, ae le o i ai lava se faatinoga mai o atagia mai ai se suiga o i ai aoga mai le la itu o le motu i Salafai, aua sa i ai le manatu faapea o le a fesootai ma le Minisita mo Fesootaiga, Faamatalaga ma Fesootaiga Vavave Faaneionapo, ina ia mafai ona au le faatinoga o aoaoga o lo o faia i totonu o Malifa agai i le motu tele i Salafai. Ia na o se manatu lava e avatu, ae ou te talitonu o lo o i ina le tofa se i tagai ifo i nai motugaafa a si o matou itumalo.

Ma lou faaaloalo tele, faafetai.

FOFOGA FETALAI: Malo saunoa, faafetai malele i lau Afioga i le sui usufono.

Ou te tapa se isi sui usufono e tulai mai. Tulai mai le Afioga i le sui usufono mamalu mo Vaisigano Nu. 2.

Afioga TAPULESATELE MAUTENI TAMASONE METULI II ESERA (Vaisigano Nu. 2): Lau Afioga i le Fofoga Fetalai, i lenei foi taeao pei ona i ai le Fonotaga a le Fono Aoao Faitulafono o le Palemene a Samoa, le faafofogaaga foi a si o tatou atunuu mai mauga tetele seia paia maugaiti, ae le gata i lea o le paia o le Ofisa nei, ae tainane i lea o le auai o Ofisa Sili o Pulega o Matagaluega a le Malo.

Lau Afioga i le Fofoga Fetalai, e avatu le faafetai tele mo le faatinoga i lenei aso. O le faafeiloai mo le Palemia, Sui Palemia, le Kapeneta foi, o Minisita Lagolago aemaise sui usufono eseese o le Maota. Ae le i faia se manatu, na o sina vaega laitiiti lea e avatu ai pea le faailoa i lau Afioga i le Palemia, leaga i te i foi ua matauina lenei sui usufono, e leai e le o se mea tau lau Afioga foi ma le mamalu nei. Ae sa ou i ai i le faigalotu amata foi o le Aso Sa muamua i le Pulega po o le Faletolu i atunuu mamao, ae o le a ou taua lava ona o alofaaga ma faamanuiaga sa faatino mai e faifeau foi o le faletolu lea i la atunuu mo lau Afioga ma le mamalu o le Malo, ne i te i ua matauina foi i se aso i le toe agai atu ae faapea foi e le i faaleoa i lau Afioga, ona sa ou faatauaina lava, e tiga le toatele o e sa auai ma faapena ia faafeagaiga e fia, atoa ai ma aulotu e tele, ae sa faatau lava le latou faamanuiaga mo lau Afioga ma le Faigamalo.

O nai vaega laiti e fia faaoo i ai se manatu, o lea ua saunoa foi le sui usufono mai si o matou itumalo. Lau Afioga i le Minisita o Tupe ma le Tala o le Tupe Faaopoopo e pei ona i ai foi lenei taimi ma le faaalua o finagalo o le Maota nei. O le tulaga lea e pei ona taua ai le tulaga i le vai, atonu e i ai le afaina ae e leai foi se afaina, aua e i ai le fuafuaga a le Pulega o le Suavai, o lea o le a faatino se vaimagalo i le itumalo lea.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O le tulaga ma le fuafuaga lea ua i ai, e faatino i Sataua le eliina o le vaimagalalo, e pau le faaletonu ma le talosaga a lenei itumalo, ia alofa le Pulega ia tau faavavevave lea tulaga. O le fuafuaga sa i ai o Setema o le tausaga na se i mavae atu nei, uma Setema sau ia Oketopa, Novema Tesema, e faafesili atu foi ia Tesema ia, a o lea ua faapea o le masina nei, a o lea foi ua matau atu e fai fai foi uma lenei masina e le i faatinoa. Ae mo le silafia lava, o le mafuaaga lea e i ai ona o lea e taumafai e i ai vaega o le masini o faaletonu o le tatou vilivai, lea e ala ai ona tuai ona faatino lea foi galuega lelei mo lea vaega foi o le la motu. E fiafia lava e faailoa atu, atonu e uma ane le afa o lenei tausaga ua i ai le vaimagalalo i le itu o Asau e pei ona i ai le tulaga lea, ua silafia e le toatele o le itumalo ma nuu le faaletonu e pei ona taua e le Afioga i le sui usufono, ae e pei e leai lava se fuafuaga o agai atu i ai. A o le soifua maloloina ia e manaomia lava le tulaga lea. E tele lava le popolega o i ai, ae aoga foi le faaleo atu i le Maota nei. O le tulaga la lena o lo o i ai le vaega lea i le vaitaumafa ma le faaletonu lea ua i ai mo le fofoga taumafa o le itumalo.

O le isi tulaga lau Afioga i le Fofoga Fetalai, o lea e matau atu foi, e i ai nai Matagaluega lea e faailoa mai nai vaegatupe foi lea e faaagaga mo komiti faufautua. E tele lava faafesili e pei ona i ai talu ona amata mai le Paeaiga. O lo o tali lava i le tali filemu atonu e oo atu i le masina lea ua mautu mai. E i ai lava foi a latou saunoaga ma fetalaiiga o lo o faailoa mai, a o le mea sili o lea ua manino le mata o le vai, o lea ua i ai le fuafuaga lea ua faaagaga tupe ia. Talosia ia a o le i uma le masina ua faafiafiaina le tele o tatou Komiti Faufautua, e le i maua lava tulaga faapea.

Ona i ai lea o se manatu e faafetaia lava le Minisita o Tupe i fuafuaga uma mo Matagaluega, tainane Matagaluega ia e lua e pei ona agai foi i ai se manatu foi, tulaga muamua o tulaga i le soifua maloloina ma a tatou aoaoga. E moni lava e le o tele tele se faaopoopo ae e i ai lava le talitonuga, o le tofamamao i lau Afioga lea ua i ai le fuafuaga lea, ma e talitonu foi mo le silafia o le talafeagai lea ua e faailoa mai. E lagolagoina le Tala o le Tupe.

Ia manuia tele le Fonotaga i lenei aso lau Afioga i le Fofoga Fetalai.

FOFOGA FETALAI: Faafetai saunoa i lau Afioga i le sui usufono mamalu mo Vaisigano Nu. 2. Ma ua avanoa foi le Palemene mo se isi sui usufono e fia saunoa.

Tulai mai le sui usufono mo Alataua Sisifo.

Afioga ALIIMALEMANU ALOFA TUUAU (Alataua Sisifo): E faatalofa atu i le Fofoga Fetalai, faapea foi sui usufono mamalu o lenei Palemene. E faatalofa atu foi i lou itumalo pele le Alataua Sisifo. E ui lava o le Lipoti a le Komiti o Tupe Maua ma Tupe Totogi, ae fia faaali pea se manatu o lenei itumalo e uiga i le Tulafono Tau Faaofi o le Tala Faatatau Faaopoopo (Nu. 1) 2016/2017.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Lau Afioga i le Minisita o Tupe e tauaala atu i lau Afioga i le Fofoga Fetalai le talosaga a lenei itumalo e ala i le faleaoga faaitumalo. E pei ona silafia ua tolu i le fa tausaga talu ai, talu ona pasiaina le vaeluaina o lenei itumalo, ona e sefululua le aofai o nuu o lo o i ai i le itumalo lenei ae tasi le faleaoga faaleitumalo ae ave lava tu i o i le faasiusiuga i Asau le faleaoga o nei nuu e sefululua. O lea ou te talitonu na ae ai se tofa ina ia vaeluaina le itumalo. E matauina pea, e amata mai i le tolu i le vaveao ua amata ona usu nai fanua aoga i uta e faatali pasi, aua le malaga agai i o i le itu Asau i le mea o lo o i ai le matou faleaoga. O le talosaga lena i lau Afioga i le Minisita o Tupe, e vaai ma le alofa ma le tau faasoosoa o tupe a le Malo, ae le gata foi i lea, o le toe fetuunaiga o tupe a Matagaluega taitasi, aua galuega patino ma galuega o lo o pito i sili ona manaomia. Ae na ona valuvalusia pea aa o le fau e lenei itumalo, i le talosaga ua leva ona opea i Maota i le faleaoga o lenei itumalo. Ou te talitonu ua leva ona i lumamaota le ofo a lenei nuu o Neiafu. Ua uma foi ona fuaina le fanua i le sefulu ma ona tupu eka ua fuafuaina mo le faleaoga, ona e tu tonu i le fetaulaiga o ala e o uma i ai le itumalo lea faatasi ai ma Falealupo faapea foi ma Sataua ma Papa Sataua.

O le talosaga lea, e tulai atu ai ma le ava ma le faaaloalo, o fea se tofa ma se faautautaga, se i tagai ane i lea talosaga, ona e talitonu ua leva ona taatia mai i le lima pe ono tausaga talu ai. Ma le faaaloalo lava lau Afioga i le Fofoga Fetalai. Faafetai mo le avanoa.

FOFOGA FETALAI: Faafetai mo le saunoaga matagofie i le faafofoga mai a le itumalo.

Lau Afioga i le sui usufono mamalu mo Palauli le Falefa.

Afioga Hon FAUMUINA TIATIA FAAOLATANE LIUGA (Palauli le Falefa): Lau Afioga i le Fofoga Fetalai, faafetai i lenei taeao, faafetai i le Palemia e pei o le folasaga na amata ai. Ia faafetai foi i le viiga o le Atua ua tatou siitia i lenei taeao. O le talosaga ia faapena ona leotele la outou viiga ma la outou faafetai ae ia sili ona moni i totonu o outou finagalo aua o le malumalu lea o le Atua na te aumaia le filemu i outou finagalo ma o tatou loto. Faafetai foi i le Komiti e pei ona feagai ma le suesuega faapitoa mo faamasinoga, faafetai i lau saunoaga lau Afioga i le Palemia. O lenei taeao o se taeao manino o se taeao totoa, o se taeao foi o lo o i ai le filemu o le Atua i totonu o lenei Maota, aua o outou lava na faia mai i le fuifui tou te saili manu o Samoa, aua tupulaga fai mai, e o lalovaoa ma e mulimuli mai. Ia tatou faataatia se faavae o se faavae lava e mausali, o se faavae foi e manatua ai lo outou soifua tautua, ma lo outou soifua auauna ma so matou ola.

Lau Afioga i le Fofoga Fetalai, ua ou tau popole ina ua tulai le matou Taitaifono faapea a nei e le toe maua se avanoa. Faafetai i le avanoa ua e aumai. Ia ona o tulaga lava o le matouí E pei lava foi ona maua i le saunoaga a le Palemia, ia tuu mai o outou tauau tuu atu o matou tauau, o mea foi o felafolafoaiga i le Palemene ia aua nei milia faauu a outou saunoaga ma sa matou tuualalo. E na o le \$353,000 le tupe faaopoopo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O lona uiga o manaoga faapitoa e pei ona toe fetuunai ai e le Minisita o Tupe e na o le \$5,200,000, e le o se tala tele tele. Ae e pei e ala ona ou laga ma fai sau tala lau Afioga i le Fofoga Fetalai, leaga e i ai faavae e oia, e ui ina laitiiti le Tala o le Tupe ae e i ai faiga faavae a le Malo, ou te iloa o la foi e silafia e le Afioga e le Minisita o Tupe ou te iloa foi o tau tomanatu le Afioga i le Palemia, i le faigata o le asaina o le toe fetuunaiga o Matagaluega a le Malo, reforms, a o le taimi lena o la e private sector le Afioga i le Minisita, o la e silasila faa-private sector. E pei e tasi lena auala e tau tuutuu atu ai se tuualalo, e ui lava ina itiiti le Tala Faatatau Faaopoopo o le Tupe, ae ese le ogaoga o le mea e ono aafia ai faiga faavae na faataatitia mai e auuuna ai i le Malo. I le taimi nei, e na o le taia o ota taliga, fai mai ua leai se mea e minoi ua leai ni galuega o faia. Sili ou te le i manatu e te palaai faapea. Ua e taulai lava lau silasila i le deficit ae ua oti atoa ai le mea. Tagai foi i le Tala Faatatau Faaopoopo o Tupe 2014/2015, e \$7miliona le tupe e le i faaaogaina, le tupe totoe, a o la e le i faia le uafu i Salelologa. O lea foi e expect le isi latalata i le \$10miliona le tupe le faaaogaina i faamatalaga o tupe 2015/2016 e le o faaaogaina. O tupe ia e aumai i fafo, lea e aumai mai tatou paaga mai fafo, e aofia ai tupe faameaalofa ma tupe aumai tului mama ova toetiiti lava 60% tupe e le i faaaogaina e Matagaluega a le Malo. E ova i le 50%, a fua i ai, e ova i le \$50miliona le tupe e le i faaaogaina.

O le mea lea e tatau ona silasila i ai, o le mea foi la lea ou te tilotilo atu, i le faamatalaga o Tupe 2015/2016, e ono tupu foi le mea lea. O le mea lea e tupu i le Matagaluega pe a fesili atu i ai, o le a le mea ua le faaaogaina ai tupe ia? Ae fai mai Matagaluega, matou te le iloa. Matou te le iloa e i ai ni tupe faapea i i. E fai atu i le Matagaluega o Tupe, o le a le mea na le faia ai ni Workshop ma ni faamalamalamaga o nei mea? Tali le Matagaluega o Tupe, o la e fai, o la e fai.

I le taimi sa o ta galulue ai lau Afioga i le Minisita o Tupe i le faataapeina o le Matagaluega o Galuega, ou te ofo i lou le manatua. Na matua po ao, po ao, po ao, na fai fai tau fiti lou faatuatua fiti loʻu faatuatua, i le tolo tolo a le Kapeneta. O le faaiuga na fai ai le faataapega, ona e maaleale, maaleale, le aafia o tagata e 400 ma ona tupu, o le a leai ni galuega.

O le a le faavae? O lena e te silafia, tatou atinae, le tamaoaiga e ala i pisinisi tumaoti, develop le Private Sector, develop le Private Sector. O le a le mea lea ua tupu nei? O atinae le Private Sector? A lea ua toe aapa foi, o le a aumai inisinia e tuu i totonu o le Matagaluega o Galuega. O le faavae na fai i lena taimi, opogi ma taofi e le Kapeneta, lagolago lo tatou atunuu e ala i le Private Sector. O le Private Sector, na e te silafia, o le engine for growth. O le mea e tupu ai le tamaoaiga, tupu ai le tamaoaiga. E le o le fofo o le faafitauli, o le aumaia o inisinia e tuu i i. O lena e te silafia, sa ave ia le isi inisinia i tua sa i ai i lena taimi, ave e fai mai le Private Sector. Ave le isi inisinia e sau e fesoasoani i le CEO, ae sau, e le lava galuega, ona toe alu ai faigaluega i tua i le Private Sector, toe ave foi le isi inisinia, o le mea lava e tasi, e leai ni galuega. O le mea lea ua tupu, o galuega faaputupu, o le accumulations of work. Ua leai, ua le minoi, o le a le mea e tatau ona fai? O le a le fofo?

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

E tatau ona develop se Project Management Unit Centre, e faia Town Work Plans, e follow up. Tasi lea itu e tatau ona faamalosi e le Malo. Vaivai le follow up, o ai e faia? E le faia e le Minisita, e fai e CEO ma le aufaigaluega. O le a le ingredients o le mea lea? Morale building, motivation. A motivate le aufaigaluega, e tou te silasila i ai, e high le productivity. A e galue, e te le, e leai ni faamanuiaga e te maua, lea foi ua tele faamanuiaga a le Malo ua ave i ai, tele. Ae o le tulaga lea e tulai mai lau Afioga i le Minisita o Tupe, ua toe foi i tua, lea ua toe fulafula le tele o Ministries, na o le aumai lava o lea mea, ok, aumai lea mea, ok, ia ma tausisi lava i le Deficit. Ua oti tatou ona ua e alu fua i le IMF, i le latou, finau i ai. E a mea e talia ai? A fai atu i ai e vaai le deficit a Amerika ae fai mai e le mafai ona latou faia leaga o le Federal e pule. Ia o le a la le mea e omai ai bully tatou?

E le faafefea e le palagi le Samoa aua e masani lava i le toa. Tatou galulue faatasi, lagolago atu i la outou galuega. E le mama, e le mama, fai mai ia na o le tagata e pipii i le Atua. Ou te iloa o oe Sili o le tagata o le Atua, faatuatua. Fai mai le fautuaga a le isi failauga, refused to accept, fear and doubt in your conscious. Aua le talia le fefe ma le masalosalo i lou finagalo ma lou loto. Tatou galulue faatasi, ina ia tatou atinae Samoa, i le tulaga e talafeagai ma faasaoina ai tupe. O lau tatalo, ia faamanuia le Atua i lau Afioga. Faamanuia le Atua i le tama o le atunuu, faamanuia le Atua i le Kapeneta.

Fai mai le tala a Solomona, ua ou faauuina lou ulu i le suauu, ua taumasuasua lau ipu. A e holding le ipu e te le faaminoiina, e te oso i tua. A e tago e lulu, e uma ona masaa i tua, o le mea lena e tatau ona fai, lulu, ina iaí .

FOFOGA FETALAI: Ia malie le saunoaga i lau Afiogaí .

Afioga FAUMUINA ASI PAULI WAYNE FONG: Lau Afioga i le Fofoga Fetalai, e faatu atu se manatu e toe faaopopo se 15 minute o le sui usufono, manaia tele lana sausu i lena taeao. Ia o le agaga lea ma le faaaloalo, faafetai.

FOFOGA FETALAI: Leai e le i faamutaina e le Fofoga Fetalai i le saunoaga a le sui usufono, o lea lava e lava le taimi o le sui usufono.

Tulai mai le sui usufono e faaauu le saunoaga.

Afioga Hon FAUMUINA TIATIA FAAOLATANE LIUGA: Ou te iloa ua galo i le sui usufono, o minute uma lava na totoe o sui usufono ia na saunoa muamua, o lea ua faaopopo mai ia au. Ia ae le afaina o lea ua faamaea atu lau tautalaga. Faafetai i le Malo, mo le finagalo e relocate ai ia le Ofisa o Leoleo ia ma le Ofisa o Faamasinoga, mai Tuasivi i Salelologa. Faafetai, la outou pule lea, faafetai lo outou faaaloalo ia Salafai.

O le isi o lea e tau fuafua le falemai, e 3 ia itumalo, itumalo o Palauli le Falefa, Satupaitea ma Palauli, e fai i le masina fou. Ae lea ou te vaai atu i tupe faasao a le Matagaluega o le Soifua Maloloina, Sili, e ova i le \$200,000.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ae a foi lele, ae a la pe a aumai le \$200,000 ma faaopoopo i i. O le ala na ou talosagaina ai le mea lea, ona o le matou falemai, o le pito lea i Sisifo o le motu i Salafai, e aumai la ia mai i i, e stabilize ai ona aumai loa lea i Salelologa, aua a toe ave i Tuasivi, o le tele o patupatu la e i ai, e ono oti ai le mai. Ae o i, lea la aveese uma lava patupatu ia e i ai, i lo matou itumalo, ia aua ne i toe oso ai se taavale ma le tele o le tulaga lea. Na ou maua foi ae leaga ou te le tautala i mea taitasi, o lea foi ou te vaai atu i le loia a le Matagaluega o Galuega, ia ae sei ou talanoa i ai i mea taitasi, faaali i ai sou manatu.

Faafetai i lau Afioga i le Fofoga Fetalai, mamalu o lenei Palemene, ma lou faaaloalo lava, soifua.

FOFOGA FETALAI: Malo, faafetai. Ia ua faamalo faafetai saunoa i le sui usufono mamalu. Ou te vaai atu o la e tau oli mai le sui usufono mo Salega i Sasae. Tulai mai le sui usufono mo Salega i Sasae.

Tofa OLO FITI AFOA VAAI (Salega Sasae): Faafetai i lau Afioga i le Fofoga Fetalai ua maua so matou avanoa. Ia e maitau mai o lea ua amata ona faasolo atu le matou Komiti, ia ou te iloa e faauma ai laia lea.

Ae lau Afioga i le Fofoga Fetalai, ou te tulai atu ma le agaga faaaloalo, e faaali foi se vaivaiga o lenei itumalo, aemaise ai o ni manaoga laiti, fuafua atu foi i le Tala o le Tupe, e le o tele se seleni, ia ae tau ia ona faailo atu i lenei taimi mo le Tala o le Tupe Autu i le ogatotonu o lenei tausaga.

Lau Afioga i le Fofoga Fetalai, e momoli atu le agaga faafetai i nai ou uso a sui usufono sa see ifo i le nofoa o lenei itumalo i atinae sa latou gapatia ai. Ia ma talosagaina e lo tatou Malo ma ua lelei mea uma i le tulaga o auala, ia vagana lava ia sina faaopoopoga o le auala lea i Fogasavaii, ina ia tau umiutu atu laitiiti i tulaga o lo o i ai ia le tele o latou faatoaga. E le gata i ina lau Afioga i le Fofoga Fetalai, e pei o le vaitaumafa lea o lou itumalo ia o lo o i Sagone. O lea sa i ai le fuafuaga a le tatou Malo e toe relocate ia le mea e toe vili ai se vai ona o le tulaga oona o le vai sa i ai muamua, ia na ona faamanatu atu lava, ae o lo o i ina lava ia le faasoa i tulaga o atinae.

O le isi vaega lau Afioga a le Fofoga Fetalai, na ona ou talosaga atu i le Afioga i le Minisita mo Aoga, Taaloga ma Aganuu. E talitonu e tele lava se seleni a lo tatou Malo na faaluina i le tatou malae lakapi foi lea o lo o i ai le Kolisi i Savaii Sisifo. O le talosaga, e manaomia lava sina fesoasoani mai i le tatou Malo i se tulaga foi lea i se moa palau e maintain ai ia le tatou malae. Ou te iloa foi e le na o i matou, ia a o le teuteuina ma le faamautuina foi o atinae sa taumafai ai lo tatou Malo i taimi ua sola.

Ia ona oo mai lea i sina vaega lava o le Tala o le Tupe, o se manatu lenei o lenei itumalo, e na o se fautuaga. Lau Afioga i le Minisita mo Aoga, Taaloga ma Aganuu, o le ese le tulou lava lou gutu ma le afi, o le mataga ia o le mea lea e tulai soo mai i suega a tamaiti, alo ma fanau, ma ua le tasi foi, le lua, le tolu, ae ua aumai soo le mataupu lea i luma aemaise lava ia faitioga a le atunuu i alo ma fanau.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O le upu moni lau Afioga i le Fofoga Fetalai, o le tautiga o alo ma fanau i le tausaga atoa, pe tasi le maka, lua maka e le aumaia i totonu o latou results, that's insult i le Matagaluega ia le vaega lena. Ia o lea foi ua faatagisia atu e fanau ia latou recount, ia ae sau le tali tele le mea o le sese o latou, ae toe totogi le \$50, ua atili ai ona mafafia le sese lau Afioga i le Fofoga Fetalai. O le tali masani sa maua mai i tausaga ua tea i le mataupu lena, faapea mai o le system, system o lo o faaaogaina e le Matagaluega. A o le fesili, o ai e faia le system? O tagata faigaluega. O le ala lena lau Afioga i le Fofoga Fetalai e na ona fautua atu i lau Afioga i le Minisita, se i e silasila totoa lava i le mataupu lea ma fai i ai se fofo ia vave ona faia se fofo i le mataupu lena. E le o toe logomalie i matua ma le atunuu atoa.

O le isi vaega lau Afioga lau Afioga i le Fofoga Fetalai, ona ou oo mai lea i i le Matagaluega mo Fesootaiga, Faamatalaga ma Fesootaiga Vavave Faaneionapo. Masalo lau Afioga i le Minisita mo Fesootaiga ua e faafofoga mai nei i le tele o finagalo o sui usufono ia ma latou atugaluga i le lava o faiaoga, e faapena foi i le Soifua Maloloina. Ua talitonu ua ova ua lata ma le 10 tausaga po ua ova foi ma le 5 tausaga ona faataoto e lo tatou Malo o le Samoa National Broadband, ia sa matou felafolafoai ai foi i lena vaega. E tele ia e fia miliona na faaalu e le Malo i le vaega lea, ae o le auga ma le faamoemoe, ia faalelei itu ia e lua o le Soifua Maloloina ma Aoga. O le taua ia o le mea sa fuafua e le Malo ma faatulaga e le vaega lea, semeamanu e tasi lava le faiaoga e faia atu le aoga i nei i Apia ae aoga uma ai lava le atunuu pe ana faapea e faatino le vaega lea. E oo foi lava i le falemai po o le soifua maloloina, a o le tulaga lea e aliali mai lau Afioga i le Minisita e le o iloa e le vaega atoa a outou po o ai e faatinoina. A fesiligia foi e le iloa po o ai e amataina, ae talitonu le agaga lau Afioga e amata mai i le vaega lea o le Ministry of Communication, o latou e initiate iga le mea lea. A o le mea lea ou te iloa ua leai ni inisinia i totonu o le Ministry, o le fautuaga lau Afioga i le Minisita ia outsource le mea lea. O le tele ia o tatou Kamupani i totonu o le atunuu ua leva ona fai le tautua i totonu o le atunuu i mea ia o initaneti ma isi mau mea pei o telefoni, ia tuu ia latou e fai le latou tautua ma sei fai ia ma fai nei mea. O le mea lea sa matauina ua uma foi ona faia tatou test, maimoa uma foi le tatou atunuu o saunoa mai lau Afioga i Asau, talanoa atu i nei ae le malamalama po o le a le mea lea ua le faia ai nei mea uma. O le isi mea e uma a iina ma tapunipuni ifo ai lava ma fale la iai initaneti a aoga, e lagona lava le faanoanoa i le tulaga lea e alia'e mai i le tele o mea nei ma mea sa faaaluina ai le tele o seleni a le atunuu ae le o faaoga tatauina.

Ia ona ou oo mai ai lea i lau Afioga i le Minisita mo Punaoa Faalenatura ma le Siosiomaga, sa alu atu nei le asiasiga i Vaiaata i le mea o lo o tiai ai le lapisi lau Afioga e le o faia e Vaiaata le mea lea e fai i gauta i Tafaigata e ilo lelei se i vaeatu lava lou gutu ma le mamalu o le Maota pei o mea ia o atigiapa ma mea faapena. Na o le pau lava le mea la e fai na o le tauai lava i ai ma faaputupu ai i o, e leai foi se tulaga o faia foi lea faapea e toe circulate ai le palapala e leai ma se galuega o faia i ai.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Na matou asia foi lea o le vaega e sasaa i ai otaota o faleletaua se i tulou, ia o la e fai ma toe faafou le vaega lea. O le fesili, o fea la lea e agai i ai i le taimi lenei? Ia e le iloa po o le a le tali e tuu mai. Na ona valuvalusia aa o le fau ma fautua atu i lau Afioga i le tamaitai Minisita, se i toe silasila i ai lau Matagaluega i le vaega lea ona e i ai tulaga e ono pagatia ai le itumalo lea o Salafai i le ono aafia o le latou vaitaumafa i ni siama e aumai i totonu o le otaota lea.

Ia ona oo atu lea o se matou tala i le Ofisa o Faamasinoga ma Pulega tau Faamasinoga, o le tulaga lava lea sa tau avatu ai se lagona i le taimi ua sola, ae peitai ua le maua so matou avanoa. Ae fautuaina lau Afioga, e le aoaia e le matapia le manaia lau Afioga i le Fofoga Fetalai, se i faamanino le tulafono lenei lea e fevavaai ai ia le fogavaa i le tatou Palemene ma le faamasinoga aua e fou le mea lenei. Ou te talitonu foi e le i oo se malamalama po o se silafia a Faamasino i le vaega lea, so o se atunuu lava o le lalolagi ta te faalogo lava, the highest Court po o le Supreme Court i so o se atunuu o le Palemene. Ae lagona lava lou faanoanoa i le tulaga ua aliae mai i le l' usitaia o le Tulafono, o tatou uma lava tatou te agai uma ma savalia ma mulimulitai i le Tulafono, so o se Tulafono. A ou fesiligia nei se isi o le mamalu o le Maota lenei, po o ai se isi sa tulai i se faamasinoga ma fai mai se faaiuga o le a faamagalo oe. E leai se mea faapena o faia. I le tulaga la pei ona aliae mai, tulou lava e mataga i le faafogafoga mai a isi atunuu i le tulaga ua oo i ai le l' faaaloogia o se faaiuga a le Palemene o Samoa. E pei o le vaega lena sa fia oo atu a iai sau faamatalaga, o le valaau a le Palemene ma le faatalauala a le Palemene o le faatalauala lena a le atunuu atoa e le na o se vaega. Ia ae tau lava ina ia tuu atu pea i ina i autafa o lau Afioga, o lau Afioga e faia le faaiuga o le mataupu lenei. Ma le faaaloalo lava, manuia le Fono.

FOFOGA FETALAI: O lea e tele le avanoa mo se sui usufono e fia saunoa., ia tulai mai le sui usufono mo Vaimauga Sasae:

Afioga SULAMANAIA FETAIAI TAUILILI TUIVASA (Vaimauga Sasae): Faafetai mo le avanoa lau Afioga i le Fofoga Fetalai, ia avea foi lenei itula e faatalofa atu i le paia o le Maota o sasao nei i le afio o le Afioga i le Palemia o Samoa le Afioga Tuilaepa Sailele Malielegaoi, o le Taitai po o le Tama foi o le atunuu. Ia faapea foi le afio o le Afioga i le Sui Palemia le Afioga i le Sao Faapito Fiamē, ia ae a le afifio o le mamalu o le Kapeneta ma Minisita Lagolago.

E fia fai lava sau tala ona o lou taimi muamua lenei lau Afioga i le Taitaifono, e fia faatalofa atu ai foi i le tapuaiga ua sasao nei i Afioga i Minisita Lagolago aemaise foi le afifio o tamaitai sui usufono o le Palemene nei o Samoa, faapea foi le paia i faauluuluga ma pisinisi tumaoti ua aofia mai i lenei Maota. E fia faaoo foi so matou agaga i le tapuaiga aua Le Ao Mamalu o le Malo o Samoa, le Afioga Tui Atua Tupua Tamasese Efi ma le Masiofo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ae a foi le paia i Sui Ao ma a latou Masiofo, aemaise lenei itula i le tapuaiga a Samoa i tupu ma tamalii, faletua ma tausii e oo lava i fanauiti, aemaise le tapuaiga a le Aufaigaluega Paia a le Atua o lo o nonomanu aua se manuia o Samoa mo a taeao.

Ia faamuliai se matou faamatalaga i le tapuaiga o si o matou itumalo pele o Vaimauga Sasae i lenei itula. Ou te momoli le faafetai tele lava ona o le tulaga foi ua tuuina mai i lenei sui usufono i le Tala Faaopoopo o le Tupe ua tuuina mai. A matau a ma le totoa o le \$3,53,362.00 e le o se mea tele. Ae o le aotelega lava o si o ta manatu e avatu i nai Matagaluega o lo o aofia ai i totonu aemaise a le Matagaluega o le Soifua Maloloina i le tupe lea e faaopoopo mo le tuuina atu o tagata gasegase i fafo. E tau avatu se manatu lau Afioga i le Fofoga Fetalai ma le mamalu o le Maota, e pei o i le isi vaega lea e tau lape ona o le tele o le tupe lea e totogi e tatou mo gasegase lea e auina atu. Ae talitonu le faamoemoe e tasi lava le tagata lea e ave i ai le tama lea e i Niu Sila lea e fai ma sui o tatou, ae ou te manatu foi au se i tuu atu i ina i le Afioga i le Minisita mo le Soifua Maloloina se i silasila ane i ai pe le o faia ai se pisinisi a le fomai lea i Niu Sila. Ia aua a aveatu le gasegase i inei ona logo lea e ia tagata faapitoa i le fatu po o le a i ana pisinisi ia, o le pili a la e tuuina atu e fomai faapitoa ia o le pili foi lena e totogi e le tatou atunuu. A o tupe a le atunuu ma lafoga a le atunuu lea o le a totogi ai le pili lea. O i ina e atagia ai ua leai se follow up na uma loa ona fai le taotoga lea o le mai fatu se i tulou po o le a lava le gasegase, toe faafoi mai i Samoa ia e maluu ai lava i inei aua e le mafai ona toe totogi le follow up lea. Na ona tuuina atu i ina i lau Afioga i le Minisita mo le Soifua Maloloina se i silasila ane i ai po o lelei lava le tamalii lea, a o la foi e i ai tamalii o Samoa ua aaoaina lelei i le faatinoina o lea tulaga. Na ona sina fautuaga lena e fia tuuina atu i lena vaega.

O le tulaga i le Matagaluega o Galuega ma Atinae Esee, e pei o lea e maua pei ona taua foi ua i ai foi le isi vaegatupe ua tuuina atu mo le lisiina o taavale. Ae o lea na oo i ai tatou i le vaitaimi ua tuanai e le toe i ai ni tatou taavale hire, po o le a le faasaoga o lea vaega? O lea ua faatau manino lava le taavale mo le faatinoina e Matagaluega a o lea lava e vaai atu lea e i ai tupe lea e mo le lisiina o lona uiga, o lea o le a toe lisi le taavale e aveatu i Matagaluega ia. O le tulaga foi i le Matagaluega lava lea, e pei e le o lava le tupe e ave i ai pe a fuafua i le tulaga ua saunoa mai ai le Loia, aua o le pili ma le totogi o Loia e alu i le level o assistants tai \$80,000.00 a o lea e aumai e pei e maualalo. E talosaga atu ai i se isi faaopoopoga.

O le tulaga i lenei avanoa ua maua foi e lenei sui usufono o ala e maua atu i le utiuti o le faasoia tau tupe, ia pei o le ai lena o le Afioga i le Minisita o Tupe lea ua tulai mai ua faaititia tupe faalua ae ua taumafai e sefesepe a tatou tupe. A o le itumalo lenei o Vaimauga Sasae o lo o mauga ai le tupe. I fea? I eleele lea sa faamatuu atu e le Malo i lou itumalo mo le faatauina po o le lisiina. O le taimi lenei o lo o talia pea e le itumalo o Vaimauga Sasae ia le faatonuga mai le Kapeneta ma le Minisita i le toe faamatuuina atu o fanua ia, ona e talitonu lava lenei itumalo, o eleele nei ua lisiina pe ua tuuina atu i lalo o alii ma faipule.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

E tatau ona silasila le Malo i se tau talafeagai e gafatia e tagata, aua o eleele lava ia o eleele o le matou itumalo. Ae na faoa i le taimi o le Esetete ia lea ua maua e le tatou Malo, o lea la e taliga le matou itumalo a mafai ona toe ioe le Minisita ae faaalu le fanua po o le kuata acre i le \$8,000.00, ia ua to le pulou i lau Afioga i le Minisita. Ae pei o le agaga lena e tuuina i lau Afioga i le Minisita mo Eleele....

Susuga Hon TUILAEPa AUeLUa FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e i ai lava le faaeteetega i le tulaga lava ia o eleele ma tau aua e le o se mea fou le mea lea o le tagi mai e tuu i lalo le fanua. O le a aveatu se faataitaiga, o le tau o le kuata eka i le taimi lenei i eleele ia masalo po o iinei e lata atu i Vaitele o le \$150,000.00 lea ua i ai i le maketi. A aveatu nei la se eleele aua o lea ua aumai nei le talosaga aemaise i nuu ia taiepi o Vaitele la foi ua fau le latou nuu. A faamatuu atu nei la eleele nei i le tai \$8,000.00, e oo atu i le vaiaso lea ua faatau e le Saina i le \$150,000.00 ia ona fesili lea o tagata. O le a le mea ua tupu ai lea mea? O lea sa aveatu o le alofa, ae ua le o toe faavalevlea tagata i aso nei. Na ona tuu atu lava o eleele ia na ave i o i Vaivase e tailua eka sa alu i le tai \$500,000.00 ua toetiti lava leai se Vaiala o toe nofo ai ma se Moataa ae ua faatau i tagata i le tau faaneionapo. O isi eleele ia sa faatau tai \$32,000.00 i le amataga, o le a le mea lea ua tupu nei? Ua toetiti lava ave uma e isi aufaipisinisi. E tetele atu loa lava le SLC e toe saili atu ua ave e faatau e le faipisinisi. O le lisi lea sa fai i Vaialele le iloa po o le 1980 sa fai ai, le tatalo mai a Vaialele ua leai ni fanua ua toetiti lava leai se Vaialele o toe nofo ai i eleele na. Sau lava le isi toeaina Vaialele fai mai, Tuilaepa e i ai lou fanua lea o le a aveatu ia te oeí .

Na motusia faafuasei felafolafoaiga mo minute e 9 ona o se faaletonu tau eletise.

Na toe faaauau felafolafoaiga i le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2016/2017.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono. E faia le malologa ua faapena ona iu foi ma le faamalalamalama ma le talifuaitau a le Afioga i le Palemia e tusa ai o mataupu tau eleele sa laga mai e le sui usufono mo Vaimauga Sasae. Ou te tapa le sui usufono mamalu e tulai mai e faamaea le saunoaga.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Afioga SULAMANAIA FETAIAI TAUILILI TUIVASA: Ou te faafetai atu i lau Afioga i le Fofoga Fetalai mo le toe tuu mai o le avanoa. Ae o le itumalo lenei o Vaimauga Sasae, a lauga se isi, e i ai ona tapuanuu ma ona tapuafanua e tapuaia lana lauga. E pei la ona maitau atu i lenei taeao i le pe o le power, o lea na tapuaia ai e tapunuu le lauga a Tuisamau po o le lauga a Saleupolu. Ou te faafetai ai i le Palemia i le tulai mai ma faaali foi lona finagalo. Ae pei o atugaluga na o le sui usufono ma le faamoemoega foi lena ua ou tauto ai i lou itumalo, a tatou toe maua tatou fanua i se vaegatupe, leaga o lea na pe le power e le i maua le saunoaga a le Palemia lea na ioe mai ai i le talosaga a lenei itumalo, e le i maua la, a o lea ua saunoa mai ua ioe mai i le mea lea ou te tatalo atu ai.

Toe oo i le Tala Faatatau o Tupe i le Matagaluega o Aoga. Tasi lenei Matagaluega o lo o i le matou Komiti, e maitauina ma le totoa, e pei o i lea e ave i ai le faamuamua i le matou itumalo, o aoga ia aoaoina lelei fanau ma le soifua maloloina. Ia e pei e matau pea lenei Matagaluega pei ona saunoa nisi o sui usufono i le tulaga lea i le numera pei e pau lava le numera ma le faasaienitisi. Ae mo le silafia e le paia o lenei Maota, o le fomai o lo o tulai mai nei e taitaia lenei Matagaluega, o le fomai lava o numera o numera lea o lo o taitaia nei lenei Matagaluega. Ae pei o le tatalo, pe le mafai ona toe silasila le Afioga i le tamaitai pule ma le Matagaluega i nisi faiaoga e tuuina mai fafo ina ia faaleleia ai pea lenei aoga. Ou te faafetai foi i le Matagaluega o Aoga e ala i le Minisita ona ua tuu mai totonu le Tala o le Tupe alauni o nai Komiti. E pei o le Paeaiga lenei Lona XVI lea ua matagofie ai le tatou lagolago i le atunuu ua taitasi ai Minisita Lagolago, ua sefe mai ai le tele o tupe lea sa outou faamaumauina i nisi o Paeaiga ua tuanai atu. A o lea ua matou tulai mai o lea ua matou alolofa i le atunuu na o le taitasi lava ua tuuina atu ia te outou lena avanoa. O lea ua aumai i totonu nai alauni o nai Komiti sa lagolagoina matou uma nei ua tulai mai, ou te faafetai lava i le Minisita i le mataala ma le tuuina i totonu o le vaega lea.

Ou te faaali foi se manatu i le Matagaluega mo Fesootaiga e pei ona i ai le Tala Faatatau Faaopoopo e pei ona tuuina mai. O le Matagaluega lea sa lagona lava le faanoanoa i le vaai mai fafo i le tulaga sa galue ai ua aveeseina le tatou SamoaTel. E pei o le tulaga lea, ae ou te faafetai lava i le Palemia ma le mamalu o lenei Palemene ua tuanai ua toe maua ai se avanoa ua toe aumai ai le cable lea o le tui Samoa po o le tui Afamasaga lea ua i ai le cable televave lea se i tua i ai le tatou atunuu. Na pau lava le tatalo a sui usufono, vaai lelei se kamupani faamaoni latou te galueaiina ma faatino lea auaunaga ina ia tele ai pea tupe a le tatou Malo.

Ia, i le Matagaluega o le Va i Fafo faamolemole, o lea e maua faatoa toe tuu mai i totonu nisi o mea e faaleleia ai le latou auaunaga, ae pe leai lava se mea o atagia ai se Tala Faatatau o Tupe e toe faaopoopo i tagata lea e i ai nei, se i toe silasila ane ai lau Afioga i le Palemia o lo o feagai ma le va i fafo, pe le o isi tagata faamaumau tupe lea e i ai. Aua o lea ou te vaai atu i tala faatatau, na o faaopoopoga lava i tagata o lo o i atunuu i fafo, ae leai lava se mea o faaopoopoina i totonu o le tatou atunuu nei.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

E faaiu atu ai se matou faamatalaga i le Matagaluega o Faamasinoga, ia ou te momoli atu lau faafetai tele lava i lenei avanoa i lau Afioga i le Palemia i le tofamamao ma le tofamanino na ae ai se finagalo ina ia tatou lotea le vaega lea. E ui lava ua tautuauega so matou manatu sa ou fia tautala ai i le vaega lea, ia ae usitaia lava Tulafono Tumau a le Palemene. Ae le tuua i lalo lau faafetai i lau Afioga i le Palemia i le faauuga a le Atua ua tuuina mai ia te oe e te silasila ai i se faaleleia o ni mea ua lape ai le auunaga i totonu o le tatou atunuu.

E faafetai faapitoa foi i le Afioga i le Taitaifono ma nisi o le Palemene sa i ai i le Komiti lea, e lagona lava le meemea ma le fiafia, ona o tatou uma lava e silafia, o lea o lo o i ai le malosiaga i totonu o le Palemene e samania mai ai i latou ia e le i omai ma lokaina i le falepuipui. Ae ou te faafetai lava i le Taitaifono e ui ona o se sui usufono fou i totonu o le Komiti ma le Palemene o Samoa i le tofamamao lea po o le tulaga foi lea e saunoa soo foi i ai le tatou Palemia, o le va fealoai, lea sa faatino ai lana ia foi suesuega, e ui lava o se lape o le Paeaiga leni Lona XVI i le le auai o nisi ae le i faia lava i ai se mea e le Taitaifono ma i latou sa faia, a o se ai foi lea mo le atunuu. E mafua i sea? Aua ana faatino le pitolaau a le Afioga i le Taitaifono ma le Komiti e samania ai e le i talaaao mai ma afifio mai, o le a la le tulaga e i ai? Tatou te toe o atu foi e nofo mai luga le Faamasino, o le a faamasino nei le Faamasino ma i tatou o le Palemene, e au lava le Faamasino i lana tama. E pei la o le tulaga lena ou te faafetai ai i le va fealoai lea sa fai ai. Sa ou auauna i galuega a le Malo i tausaga e 33. Ina ua vili atu le isi faipisinisi i le tama sinasina lava o le matou Matagaluega, sole, o lea le mea lea e tau o le capital gain? Sau loa le toeaina lea fai mai ia te au, Sulamanaia, o le a foi le tali o le mea lea? Ou faamalamalamaina loa i le toeaina lea. Toe vili atu loa le tamaloa ua maua le tali a le toeaina lea. Fai mai loa le tala a le faipisinisi i le toeaina, o a ea au mea na e fai i ina i le Matagaluega? E faapefea ona faatino au galuega? O le tali a le toeaina lea, o lo o faatino lava i le va fealoai. E pei la o le tulaga lena i le Afioga i le Taitaifono ma le mamalu o le Komiti sa faatinoina leni galuega, e le faatusatusaina foi le mamalu ma le tamaliaga ma le paiaaga lea e i totonu o le Palemene....

Na toe motusia faafuasei felafolafoaiga mo le 20 sekone ona o se faaletonu tau eletise.

Na toe faaauau felafolafoaiga.

Afioga SULAMANAIA FETAIAI TAUILILI TUIVASA: Ona o se matautia o ni matatia ua ausia foi e le Afioga i le Palemia ma le Sui Palemia i leni foi Paeaiga.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

E momoli atu ai le faafetai tele a lenei itumalo i lau Afioga i le Palemia, ona o lo o tapuaia pea ou faiva alofilima e ala i le lagolagosua foi a le Afioga i le Sao Faapito po o le Afioga i le Sui Palemia, aemaise o le Kapeneta a Samoa. Ia manuia lau Afioga i le Fofoga Fetalai ma le mamalu o le Maota. Faafetai.

FOFOGA FETALAI: Malo faafetai malele, malo saunoa i le sui usufono mo Vaimauga Sasae. Ua tapa se isi sui usufono o lo o tele le avanoa mo le taimi nei e saunoa ai. Tulai mai le sui usufono mo Salega Sisifo.

Afioga TOOMATA AKI TUIPEA (Salega Sisifo): E muamua ona faafetai i lau Afioga i le Fofoga Fetalai ona o le avanoa faaauro ua ou maua e fai ai se sao o lenei itumalo o Salega Sisifo. E muamua ona ou faafetai i le Palemia faapea le Sui Taitai, aemaise foi Afioga i Alii ma Tamaitai Minisita, Minisita Lagolago. O outou paia, o sa ma faiga, o le a le oo lava i ai se tautalaga, aua o paia lava e tumau, e oo i le faavavau.

Ae ou te muamua ona ou faapea atu, ou te matua lagolagoina le faamatalaga o le Tala Faatatau Faaopopo o Tupe (Nu.1) 2016/2017. E lagolagoina e selau pasene. O le a leai la sau faamatalaga e taea ai le itu i le Tala o le Tupe leaga o le matou Komiti, ae ou te fia faafetai faapitoa i le Palemia i se tofa ua ae na mafua ai ona tofia se Komisi Suesue latou te suesueina mataupu o lo o faapena ona faasea ai le atunuu i le Matagaluega o Faamasinoga o Fanua ma Suafa. Malo le toa, faafetai i lou le fefe, aua a tuu ma matou matau i le Tulafono o lo o i ai, e pei e i ai le va o le Palemene aemaise o le Matagaluega o Faamasinoga. Ae faafetai ua matala ia sega lou finagalo ina ia fai se Komisi Suesue o lea ua manino ma malamalama ai tulaga o lo o atugalua ai le atunuu i le faafoeina o latou faamasinoga ma faaiuga le mautonu, umi ona faataatia aemaise o le le sainia o iuga o faamasinoga o lo o tau tulituli e itu faamasino. Ou te tautala lava au i le matou lava nuu, ou te iloaina a suesue i totonu o faila a le Matagaluega o Faamasinoga, masalo seiloga lava o se isi e fou atu i le matou nuu ona nofo lea ma lagalaga ni mataupu ona oo lea i le faamasinoga, aua ua i ai lava aulape e puipuia ai measina a le nuu, e le gata i le laueleele, ae faapea foi i suafa matai. O le mea lea a o faafofoga mai lo matou nuu, tatou alu ai lava i lea. Talosia ia faataitai mai nuu ma afioaga ina ia tausi le filemu ma le nofo lelei, e le gata i totonu o aiga, totonu o le nuu aemaise o le atunuu. Ua fefulituaai aiga, ua oo lava i uso, o fanau i matua, ua feeseeseai ona o mea lava o faamasinoga. E pei lava ona masani ona saunoa Faamasino ma faapea mai i itu o le faamasinoga, po o fea o i ai le tofa ma le faautautaga ia te outou o tama o lo o tausia aiga, a o lenei ua oo mai i le Faamasinoga, e le malamalama Faamasino. O lona uiga, e fai autago e Faamasino faaiuga o Faamasinoga. Ona alofa ai lea i measina a le atunuu o le a faapena ona pulea e tagata ese.

E pei lava ona malie i le saunoaga, e tele faaiuga ua fai e papalagi, e le malamalama le papalagi i tu ma aga faa-Samoa. O lea la ou te toe faafetai i se tofa ua ae i lau Afioga i le Palemia faapea le mamalu o le Kapeneta ona o lenei lava Komisi Suesue ua faatinoaina.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

E tele lava atugaluga o le atunuu o lo o faaalua i le Lipoti. Faafetai foi i le Taitaifono o le Komiti ma sui usufono mamalu o le Komiti, o outou lava na ua fai sui o le Palemene e faaleo atugaluga o le atunuu ma taumafai e fofo le faafitauli. E le atoatoa foi, aua o a foi faafitauli o le a taumafai e foia i lenei taimi, e tulai mai lava feeseeseaiga i le lumanai. Na pau lava o lea, tatou tatalo i le Atua e fesoasoani mai i lo tatou vaivai ina ia mafai ona foia o nei faafitauli e malepelepe ai aiga, malepelepe ai nuu, malepelepe ai atunuu.

Ona oo ae lea o sau faamatalaga i auaunaga lautele a Matagaluega a le Malo. Ou te faafetai tele i le Minisita aemaise foi o Ofisa Sili o Pulega ma e o lo o lagolago i Matagaluega ma Faalapotopotoga a le Malo, e talitonu e le faigofie la outou galuega, o lo o taumafai lava i le mafai e oo i ai ina ia lelei le auaunaga i le mamalu o le atunuu i so o se matata.

O le faafitauli o lo o tupu mai, o tupe. O a o tatou manaoga, a le lava tupe i le taga, e leai se mea e maua. E le faigofie foi i le Malo ona tausaili o ni tupe, o tatou lava manaoga i lea mea ma lea mea, e leai se isi e fia manao e toilalo sona itumalo. E pei lava ona malie i le motto a le HRPP, o mea e lelei i Upolu ma Apia, e tatau foi ona tutusa ma Savaii. O le mea lea ou te tautala ai lou sui o au o le sui o le motu tele i Salafai, e i ai nai itu ou te fia laga i totonu o le Palemene. O le 54 lenei o tausaga talu ona Tutoatasi le Malo o Samoa. I lau lava observation mai lava i aso o ou faigaluega i le Malo, alu i Savaii sau, seia oo mai lava ina avea au ma sui usufono, o itu lava ia ou te maitauina pea, e amata mai i femalagaiga. Ou te maitauina pea e oo i aso malolo, oo i faaiuga o vaiaso, e lagona lava le ootia i le vaai atu i nai tama ma nai tina, aemaise lava tupulaga o lo o galulue i Apia nei, ae loa i faaiuga o vaiaso ma aso malolo, po o le a lava le taugata o le alu i Savaii, e taumafai lava ia maua se tupe, a le maua se tupe i le totogi ua le lava le faasoa, e iu lava ina alu e fai le loan ina ia mafai ai ona oo i Savaii, o matua o lo o faamuli mai, o mea faalelotu ma le tele o isi gaogaosa o tiute o le tagata Samoa. Pe e te matai pe leai, o lou tiute i lou aiga o le faatino o lau tautua e ala i tupe, e ala i mea o faalavelave ma mea uma faapena. Ona faapea lea o sou manatu ma ou tilotilo pea i le o atu i le weekend, e taufao, e alu le tuli i luga o le vaa, a oo foi la, e alu le tuli i lalo e o i pasi. Ona faapea lea o se manatu, o afea ea o le a ea ai le pologa o Savaii? O afea? O ai ea e faaeaina le pologa o Savaii? Lau Afioga i le Palemia, e le o se faasea, a o le faatupu manatu, pe le i oo ea i le taimi e tatau ai ona tilotilo i se auala ina ia faafaigofie ai ma maua se auala e foia ai nei faafitauli.

I le tulaga o femalagaiga, faafetai i le tele o fuafuaga e le gata i le faaleleia o vaa, faaleleia o uafu, ma isi tulaga uma faapena o lea e taumafai i ai le Malo. Ae tatalo atu ma le faaaloalo, se i silasila totoa i le lumanai. Afai ua le avea i lenei Tala Faatatau Faaopoopo o le Tupe, se i silasila i talosaga ua tuuina atu mo le Main Budget 2017/2018. E i ai nai mataupu sa tulai mai i le Ofisa o le Falemai i aso malolo. O lau matau i nisi o matou aiga, sa aafia i ni faamai, o isi o le faalavelave. Sa ou sau i Tuasivi e asiasi mai ae fai mai e le mafai ona fai i Tuasivi togafiti seiloga e ave i Apia.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Ona faapea lea o lou mafaufau, o le a ea le mea e taulagi nei, o mea e lelei i Apia, e faapea foi ona lelei i Savaii. A o lea e fai mai seiloga e ave i Apia e fai ai togafitiga. A oti la le tagata, o ai e tua i ai? Ae pei lava ona malie foi i saunoaga ua tuanai atu, e i ai tupe le faaaogaina. Aisea la ua le aveane ai se i tau faaleleia atili ai le auunaga i le motu tele i Salafai?

O le tulaga i auala galue, o lena ua taatia atu nai talosaga, ae toe faamamafa atu faamolemole, se i toe tagai totoa ane i le budget o lo o latalata mai, tuu i ai nai auala se lua po o se tolu foi o lenei itumalo, se i faaleleia ai. E pei lava ona ou faailoa atu le talosaga e tulaga ese lo matou itumalo, e agai atu lava i lalo alu i luga i mauga, e le sao ai taavale foi nei wheel drive, seiloga e faata, ae a le faataina uma foi, faata se isi vaega o le auala i le vaega la e aega ona tolotolo ai lea o nai taavale i luga, ona faigofie ai lea ona o nai tagata e galulue. I lenei vaitaimi i tupulaga ua i ai nei, ua eseese ma aso ia. O aso ia, e tiga le toeaina o le toeaina, e savalivali atu lava ma lana sapelu, alu ma lona titi laufai. A o aso nei, ua tausolomua i le facebook, e oo lava i uta i le maumaga e nofonono ma le telefoni, ona alu atu lea moe i lalo o le laau ae le galue. E manaomia la le faaleleia o auala ia alu le tamaitiiti alu atu ai ma lona tama tilotilo o la e fai le galuega, ona lelei lea o se galuega e fai.

Ae ona ua ou vaai atu ua uma le taimi, ou te momoli atu le faafetai tele i lau Afioga i le Fofoga Fetalai, aemaise foi le Palemia ma le Sui Palemia, le Kapeneta aemaise foi sui usufono mamalu o lo o lagolago i le Kapeneta ma le mamalu o lenei Palemene, aemaise foi o Samoa o lo o faafogafoga mai i Lana Afioga Mamalu, O Le Ao o le Malo, Sui o le Fono a Sui Tofia, aemaise o le aoatetele o Samoa i ona tulaga faalupe. Soifua ma ia manuia.

FOFOGA FETALAI: Malo faafetai malo malele i le Afioga i le sui usufono mamalu i le faafogafoga tapuai mai a le itumalo aua e le tau selu atu pe tau faafulu atu. Ae ona ua tatou taunuu i le taimi o le tatou malologa e pei ona faatu mai ai le lafo ina ia maea le tatou galuega i le itula e 1:00, ae toe amata le tatou galuega i le itula e 3:00 i le afiafi manei. Ona i ai lea o le manatu o le a faapea ona faia e pei ona faatuina mai le lafo o le a maea le tatou galuega i le aoauli nei i le itula e 1:00 ae tatou toe amata i le itula e 3:00 i le afiafi seia oo i le itula e 7:00.

E faasilasila atu ma le agaga faaaloalo o le a faataatiaese a tatou Taulumaga seia aulia le itula e 3:00 i le aoauli.

Na faataatiaese Taulumaga a le Fono Aoao i le itula e 1:00 i le aoauli.

Na toe faaauau Taulumaga a le Fono Aoao Faitulafono i le itula e 3:00 i le aoauli.

Na toe faaauau felafolafoaiga i le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2016/2017.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

FOFOGA FETALAI: Ou te faasilasila atu ua toe amatalia taulumaga a le Fono Aoaofa Fofoga.

E faia le malologa ua maea ona saunoa le sui usufono mai le itumalo o Salega i Sisifo. Ia ma ua avanoa foi le Palemene ma le Fono Aoaofa mo se isi sui usufono e fia saunoa. Tulai mai le sui usufono o le itumalo mo Falealili Sisifo e saunoa.

Afioga AUMUA ISAIA LAMEKO (Falealili Sisifo): Faafetai i lenei itula ua tatou maua mo le tatou Fonotaga e viia ai pea le alofa ma le agalelei o le Atua.

Lau Afioga i le Fofoga Fetalai faafetai mo le avanoa e fai ai foi se manatu mo lenei Tala Faaopoopo o le Tupe. E amata sau folasaga laitiiti faatatau i le tatou Public Sector Reform lea sa faatautaia pei lava o le vaitau o le 1990 e oo i le tausaga 2000. O le naunautaiga o le Malo i lea vaitau ina ia faaitiitia Matagaluega a le Malo mai le 27 i le 24 Matagaluega lapopoa. Sa i ai foi le faamoemoe o le Malo i lea vaitau ina ia faapena ona multi skill le aufaigaluega, o le uiga o le faamatalaga ia mafaia e le tagata e tasi ona faigaluega e fa ma ia faaitiitia foi le aofai o le tatou public service. O le miti lea a le Malo sa i ai ina ia mafai ona faaavanoa nisi vaegatupe e faatino ai ana faigaluega fai. Ae peitai ua oo mai i lenei vaitau ua matauina e lou sui usufono le tatou i le Malo ona toe tagai e fai se review o le tatou public service ua fai sina lapoa tele.

E amata sau faamatalaga i le Komisi o Galuega a le Malo, sa teuteuina e le Palemene lenei le faavae ina ia aveese ai le matafaioi lea mai le Komisi o Galuega a le Malo i le faafaigaluegaina ma le faamaloloina o tagata faigaluega ae tuuina atu i faauluuluga o Matagaluega. O lona uiga ua tataua ona laitiiti le aufaigaluega a le Malo, peitai i le vaai i ai i le taimi lenei ua faatupulaia le toatele o le aufaigaluega a le Komisi o Galuega a le Malo.

O le isi au faaitaiga e fai i le Matagaluega fou lea a le Public Enterprise. O le Matagaluega lenei sa i ai le division e faaigoa o le SOEMU, State Own Enterprise i lalo o le Matagaluega o Tupe pe a ma se tovalu le aufaigaluega sa i ai. I le faatulai mai o le Matagaluega i le taimi lenei ma le maitau iai ua iai lona faauluuluga ua iai foi Ofisa lagolago e tolima ma le aufaigaluega e tolusefulu ma ona tupu. E pei e atagia mai ii i le tulaga lea ua toe agai lava i tua le tulaga ua tele le tatou Public Service, atonu foi o lea e taumafai le tatou Malo ina ia faaleleia le auunaga. Ae o le talosaga vaivai lena a lenei sui usufono se i toe tagai le Malo e fai ni review po o talafeagai ia fuafuaga mo le lumanai e sefeina ai a tatou tupe aua tatou galuega fai.

Ona oo mai lea o lau faamatalaga i le Matagaluega o Galuega. O lo o aumai i le lipoti le tulaga i le faafaigaluegaina o Inisinia. O lou sui usufono ou te lagolagoina le tulaga lea o le faafaigaluegaina o Inisinia, manatua foi o le Matagaluega lea o Galuega Tetele a le Malo, o i o lo o i ai le Regulatory Function lea latou te vaavaaia po o lelei ona faatino e le tatou Pulega ia le faia o galuega i le faatino o auala ma le suaina o auala ma le faaleleina o auala.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ma e tatau la ona i ai ni tagata e i ai le malamalama faapitoa tau Inisinia, o lou lena manatu. E toatele lava tatou alo ma fanau o lo o faapena ona aveatu e sikolasipi i atunuu mamao i le tomai lea o le Civil Engineer, ia atonu e maea le sikolasipi toe foi mai i fanua e tautua le tatou Malo. E lagolagoina e lou sui usufono le faaopoopoina o tagata faigaluega ia i le vaega faapitoa lea o le Matagaluega o Galuega.

Ona oo mai lea o sau faamatalaga i tagata faigaluega atonu ua lausilafia e le mamalu o le Palemene lau Afioga i le Fofoga Fetalai ua toetiiti oo i le taimi e tapuni ai le Yazaki. Ae o le fesili lea e tulai mai, pe faapefea ona fesoasoani le Malo ina ia maua ni galuega mo o tatou tagata? Ia o le motugaafa mai Falealili e tatau ona tagatagai le Malo i tulaga ina ia faatupulaia ai galuega. Ae faapefea ona faatupulaia galuega? E tatau ona i ai ni incentives mo a tatou local investments. O le uiga o lau faamatalaga ia faatele a tatou pisinisi laiti, e ave i ai ia le fesoasoani a le Malo i lona faatuina ma se vaegatupe ina ia mafai ai ona faagaioi ia pisinisi e faapena ona faatupulaia ai le tulaga i galuega. Ia o se fesoasoani foi i le tulaga lea ina ia mafai ona faafaigaluega ai o tatou tagata.

O le vaega lona tolu lau Afioga i le Fofoga Fetalai, ou te fia pai atu i le Matagaluega o Aoga, o le vaegatupe o lo o fuafua e ave mo le Iuni Lakapi a Samoa. O lau matau i ai e fai sina laitiiti o le tupe, e tatau ona tagatagai le Matagaluega e faatele le tupe, o lou lava talitonuga na o au, o tatou alo ma fanau o lo o taaalo i le tatou Manu Samoa o le taitoafitu pe sefululima o lo o faalauiloa atu ai ma le tatou atunuu i le taimi lava lea e tasi. Ia atonu e i ai se vaegatupe a le Faalapotopotoga o Tagata Tafafao Maimoa Mai e fesoasoani i le maketiina o le tatou atunuu ma fesoasoani i le Iuni lakapi. O le isi tulaga e tatau foi ona atagia, o le matou talosaga aua se malae lakapi mo le aoga lea po o le Kolisi i Falealili. O le taimi nei e leai se malae lakapi o i ai ae ua uma ona fai fetuunaiga mo le faaogaina o fanua o nisi o aiga mo le faia o le malae lakapi, atonu o lau Afioga i le Minisita e i ai se taimi ona oo atu lea o le matou talosaga faatatau i le vaega lea.

Ia pau lea o se faamatalaga ia manuia tele lau Afioga i le Fofoga Fetalai, manuia foi le Taitai o le Malo ma Minisita o le Kapeneta faapea foi Minisita Lagolago, faapena foi le itu nei ae ou ola i le alofa ma le agalelei o le Atua, faafetai.

FOFOGA FETALAI: Malo saunoa, tulai mai le sui usufono o Safata i Sisifo.

Afioga LEANA RONNIE POSINI (Safata i Sisifo): Faafetai i lau Afioga i le Fofoga Fetalai mo le avanoa, e faatalofa atu foi i lau Afioga i le Taitai o le Malo ma le Kapeneta ma Minisita Lagolago aemaise foi lenei Palemene. E fia faaali foi se manatu o lenei itumalo Safata i Sisifo e uiga foi i le Tala Faatatau Faaopoopo o le Tupe ua i luga nei o le Laulau a Fono a le Palemene.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O le a muamua se faamatalaga i lau Afioga i le Minisita mo le Soifua Maloloina, ou te talitonu o le falemai lea i Saanapu lea e tau o le Health Care Center, ou te lagona a silasila lau Afioga i le va o le falemai lea mai Poutasi agai i Leulumoega, ou te talitonu lava ua talafeagai ona fai se falemai mautu i Saanapu, ou te talitonu ua fai sina vavamamao o le va lea. O le isi foi mea lau Afioga o le faaitiitia ai o le mamalu o le atunuu e oo mai i le tatou falemai lea i Apia, ona e talitonu a agai mai i Apia e atoa le 3 i le 4 itula o faatalitali ona o le toatele o le mamalu o le atunuu o lo o agai mai i le falemai autu lea i Apia. Ae ou te talitonu a faatino le falemai lea lau Afioga, ia ua tele foi se faamama avega i le tulaga i le mamalu o le atunuu o le a fegasoloai i totonu o le falemai.

Ona oo mai lea o se faamatalaga i lau Afioga i le Minisita mo Aoga, Taaloga ma Aganuu. Lau Afioga i le Minisita o le Kolisi lea i Safata o lau ua faitau ua 500 tamaiti aoga la i ai a o faiaoga la i ai na o le 12. Na ou tausailia foi i le Matagaluega o Aoga e i ai isi Kolisi ia e taulalata i Apia e le atoa se 400 o tamaiti aoga ae tolusefulu ma ona tupu faiaoga la i ai. O lou lea talitonuga lau Afioga i le Minisita, se i e silasila ifo i ai lau Afioga ona o le Kolisi lea a matou ua matua faatupulaia lava le toatele ma ua manaomia foi ni faiaoga se tele e tau taofiofi ai, aua afai e le o atu ni faiaoga e fai le faafitauli lea e agai mai lava ia alo ma fanau o le tatou atunuu o lo o i tua i Apia.

O le isi mea e fia taua lau Afioga i le Minisita mo Aoga ia tulagalua pei ona ou taua foi i lau lauga i le Tala Faatatau Autu o le Tupe, i le mea lea o le faiga o vasega Year 1, Year 2, Year 3 faasolo mai ai. Na ou taua ai foi le tulaga lea e tasi lava le faiaoga e avea uma mataupu e 7 pe 8 ma ua tatau foi ona fai ni sini autu a la outou Matagaluega ina ia faaeseese uma ai faiaoga e tauaveina mataupu a tamaiti ia. E pei lava ona ou fai atu, a fai lava o le faiaoga e fiafia i le Gagana Samoa po o le Social Study, na o le pau lava lea o lana mataupu e ao i le aso atoa ma le tausaga atoa. Ae ia matua maioio lelei ia tatou faiaoga e aoaoina alo ma fanau aua o i lava le faavae o tatou Primary School, o le foundation lea o tamaiti lea la e agai atu i le Iunivesite ae fai mai le Iunivesite e maualalo le tulaga o le tulaga o le aoaoina. Ae a faalelei le faavae o le tulagalua, ou te talitonu o le siitia foi lea o le tulaga o aoaoga i totonu o le tatou atunuu.

Ia ona oo mai lea lau Afioga i le Minisita mo Galuega, Felauaiga ma Atinae Eeseese, o le matou nuu lea o Sataoa o le alu agai i tai i le aai ma le alu i uta, o le matua lauleaga lava o le auala lau Afioga. E talosagaina ai lau Afioga aua ou te masalo o auala ia e lua, ou te le o manatua i le taimi foi na saofafai mai ai isi sui usufono o lenei itumalo, ou te le o manatua pe na faaleleia auala ia. Lau Afioga a e afio atu i ai, ua oo lava ina tau le sao se taavale i le alu i uta ma le i tai isi o matou nuu lea o Sataoa. E oo foi la i le matou nuu lea o Vaiee i le aualagalua, ua matua faigata ona sao ai ni taavale ona o le lauleaga o le auala, ae tuu atu pea i lau Afioga i le Minisita se i e silasila ifo i ai.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ona oo mai lea o lau faamatalaga i le Afioga i le Minisita mo le Punaoa Faalenatura ma le Siosiomaga po o le Afioga i le Sui Palemia. E fia fai sau faamatalaga i le tulaga lea o le lisiina o fanua faaleaganuu, aua ou te talitonu o tuutuuga aua o le feagaiga e fai e ui atu i le Matgaluega lea. O le Matagaluega e tu i le va o le ana le fanua ma le Kamupani o lo o latou fia lisiina le latou fanua. Se i silasila ane i ai lau Afioga i le Minisita i tuutuuga ma aiaiga o feagaiga faapea ina ia i ai foi ni a latou taiala e fesoasoani ai i aiga e ana fanua aemaise lava i fanua ia e lisiina i vaega talimalo po o mea tau tagata tafafao maimoa mai fafo. Ou te talitonu foi e tatau ona i ai se fesoasoani a le Faalapotopotoga o Tagata Tafafao Maimoa mai Fafo e fesoasoani i taiala ma feagaiga fai ina ia aua ne i maea ifo ia le sainia ae toe i ai foi nisi feeseeseaiga i le taimi mulimuli.

Lau Afioga i le Minisita mo Galuega, Felauaiga ma Atinae Eeseese, ona toe oo lea i le mataupu lea o le Samoa Shipping Service, ua e taua i lou manatu lau Afioga i le Minisita o le vaega lea o lea latou te suea galuega a tatou Komiti lea ua iu mai i le tatou aoga lea a le Iunivesite lea taua o le Maritime. Na ou sailiilia atu i le kamupani ae fai mai le kamupani ona e tasi le Kamupani Vaa o lo o latou faipaaga i fafo. Ae o lau tausaili atu lau Afioga i le Minisita o le tele ia o Kamupani Vaa, e faataua i lou mafaufau lau Afioga ona o le tatou aoga lea o le Maritime ou te faitau atu i le tele o tausaga ia ua mavae atu ua atoa le taitoaselau o tamaiti lea ua iu mai ai. Ae o le tatou aoga foi lea o le aoga ua uma ona pasia i tuutuuga faavaomalo, o le mea foi lena lea e ala ai ona talia tatou tamaiti ia e agai e galulue i vaa i fafo ona o lea ua aloaia le tatou aoga. O lau la lea faitau ou te tausaili lava i kamupani vaa pe fia ni tamaiti e mafai ona ave ae tali le kamupani faapea ona o le mea lea ua faamoemoe o tatou tamaiti ia ua o e o ma sue mai ni avanoa mo tatou. O lau lea fautuaga i lau Afioga i le Minisita ma ou te talitonu e tatau ona faatuina se faalapotopotoga po o se iuni po o se asosi o tagata e i ai agavaa faapitoa ia. Ou te talitonu a faatu le faalapotopotoga lea e amanaia e faalapotopotoga vaa i atunuu e mamao ona tatala lea o le avanoa i tatou tamaiti nei. Ou te talitonu tasi lea mea o lea e agai i ai ia le manuia o atunuu laiti ia o le Pasefika o galuega ia i luga o vaa. I lou talitonuga ua tele tatou tamaiti ia e iu mai ae pei e foliga e le o lava avanoa ia e ave i alo ma fanau ua iu mai i le tatou Iunivesite. O le isi mea lau Afioga se i e silasila totoa ifo o lea ou te iloa e i ai le aoga lea a le kamupani vaa lea a le Samoa Shipping Corporation. Sa ou sailiili foi i sailiiliga ia e tutusa lelei lava mea ia e aoao e le kamupani vaa lea i latou aoga la e fai ma le aoga lea a le Maritime a le Iunivesite. Ou te talitonu foi la o le faasaina o tatou seleni, po o le a le mea e le aumai tasi ai i le tatou aoga lea ua uma ona accredit faavaomalo le aoga lea o le Maritime ae sefe ai nisi tupe a le tatou Malo. Ou te talitonu o lea na saili atu e tutusa lelei lava ia mataupu la e aoaoina ai, ia na ona tuu atu pea i lau Afioga i le Minisita.

Ia ona oo mai lea o se faamatalaga i le Minisita o Tupe, faafetai i lau Afioga i le Minisita mo le Tala Faaopoopo o le Tupe. Ae i lau matau i le \$12miliona lea i le Tala Faaopoopo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Faafetai tele lava i lau Afioga ae o lea ou te tau tomanatu ma o lea ou te manatua o le Tala Autu o le Tupe lea na mavae atu e \$23,600,000 le tatou tupe faasili o le Tala o le Tupe. O lou talitonuga pe le tataua ona faaaoga i ai le tatou tupe lea? O le fesili foi i le isi itu i lau Afioga, aua i lau tau matau atu i le Tala Autu o le Tupe pe ua 3 i le 4 tausaga o se tupe faasili tele lea i le Tala autu o le tatou Tupe lea e \$23,600,000. O le isi au fesili lau Afioga, pe ua i ai nisi mea ua faaaoga i ai le tatou tupe lea? E pei ona e saunoa i le isi au fesili, pe faaagaaga mo nisi atinae tetele mo le tatou atunuu le seleni lea. Ae afai e le o faaaogaina le tatou tupe lea aua o lea ua afa le tausaga faaletupe, afai la e le o faaaogaina ia ona ou talitonu lea pei e foliga mai o le faaatoaina o tupe o le Tala o le Tupe e mai tupe ia e aumai i fesoasoani ma nonogatupe mama tului. A le faaaogaina le \$23,600,000, o lona uiga o se tului fai fua ae le o faaaogaina le tatou tupe lea.

Ia, ona faamuli ai lea o se matou tala, faafetai tele i lau Afioga i le Palemia e pei o le folasaga na e saunoa i ai i le taeao nei. Ua matou lagona foi le matou loto atu i le saunoaga a lau Afioga, malo lava le faatoatoa, malo foi le faamanino o mataupu faapenei. Afai foi e le i tupu muamua i se Paeaiga a o lea faatoa tutupu i lenei Paeaiga, faafetai foi aua o mea e tutupu e toe tutupu foi. Ae faafetai i lou lototele, faafetai toa, o mea e faamanino i totonu o le tatou Faigamalo.

Ia, o le matou faamatalaga lea ua foi, foi le faamalo i le tapuaiga a si o matou itumalo. Ia manuia tele lau Afioga i le Fofoga Fetalai, manuia le Palemene o Samoa. Soifua.

FOFOGA FETALAI: Malo faafetai saunoa i lau Afioga i le sui usufono mamalu. Ma o le avanoa foi lenei e tulai mai ai se isi sui usufono e fia saunoa. O lea ua maitau atu ua oli mai le sui usufono mo Aana Alofi Nu. 2. Ia saunoa ia lau Afioga i le sui usufono mamalu mo Aana Alofi Nu. 2.

Tofa ILI SETEFANO TAATEO TAFILI (Aana Alofi Nu. 2): Faafetai lava i lau Afioga i le Fofoga Fetalai mo le avanoa. Viia le Atua i lenei ituaso ua mafai ona molimoli mai le soifua laulelei o le Afioga i le Palemia faapea foi le Palemene o Samoa. Ou te fia tulai e avatu se sao o Aana Alofi Nu. 2 e tusa ai o le Tala Faatatau Faaopoopo o le Tupe (Nu. 1) 2016/2017.

E muamua ona ou faatalofa atu i le tapuaiga mamalu a le paia ma le mamalu o Samoa o lo o faapea ona faafogafoga mai, mai tumutumu mauga seia paia se tasi aupito iti o le tatou Malo. E manatu e ae manuia le faiva o lau Palemene i lau tapuaiga. O ou paia ma ou mamalu e le mafai e se faamatalaga ona toe faaopoopo i ai se iota, aua o paia lava e tumau o sa foi e le avea. E faatalofa atu foi i le tapuaiga a si ou itumalo o Aana Alofi Nu. 2, ia o lenei ua tatou laasia lenei tausaga fou i feau ma tiute aemaise o le galuega a le tatou Fono Aoaofa. Faafetai mo lau tapuaiga, aua e ioe o se faiva e sii ae tapuaia e manuia.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

A o le i oo sa matou faamatalaga i le Tala Faatatau Faaopoopo o le Tupe, e muamua ona avatu sa matou faamatalaga e uiga i le mataupu e pei ona tamua ai le Afioga i le Palemia. E avatu le faamalo ma le faafetai i lau Afioga i le Palemia ma le Kapeneta ona o le faatofalaiga na mafua ai ona lagalaga ma faia se Komisi Suesue e pei ona i ai. Faafetai i lau Afioga ona ua e faafogaina le tagitui a tagata ua faapena ona faamoloau a latou meatotino ona o faaiuga e le lelei ona fai. Afai foi ua toe iloilo tulaga tau galuega a le Faamasinoga o Fanua ma Suafa, ua sala i le toe iloilo, aua ua 54 tausaga talu ona tutoatasi Samoa, o le 54 foi lena o tausaga o lea ua toe afea ai le toe iloilo ina o le galuega a le Faamasinoga o Fanua ma Suafa. E manatu la le sui usufono, e le o se suesue vale, a o se galuega lava ua tatau ma talafeagai.

Lau Afioga i le Minisita mo Galuega, Felauaiga ma Atinae Eseeese, ia o lena ua taoto atu i lumamea le tatalo a lenei nuu o Nofolii i lona auala galue, ae matou te manatu ua tautuauega mo le Tala Faatatau Faaopoopo o le Tupe mo lenei Tala Faaletupe, ae manatu lava, e tupu le faatuatua o le taugologolo e pei o la Paulo. Ae afai foi ae taugologolo ae leai se seleni, e le mafai lava ona faatinoa. Matou te manatu e le o toe mamao ona faapea lea ona toe lotea le isi Tala o le Tupe 2017/2018, o le tatalo a le sui usufono mo Aana Alofi Nu. 2, ia tuu atu i ou autafa. A o lenei itula i le agaga faaaloalo, e lagolagoina e lenei itumalo i lona aotelega se Tala Faatatau Faaopoopo o le Tupe 2016/2017. Ma lou faaaloalo lava. Faafetai.

FOFOGA FETALAI: Malo faafetai. Tulai mai se isi sui usufono e saunoa. Ia, tulai mai se tasi o sui usufono mo Falealili Sasae le Afioga i le Gafatasi.

Afioga FUIMAONO TEO SAMUEL TEO (Falealili Sasae): Malo faafetai i lau Afioga i le Fofoga Fetalai. E manatu sa maua se malologa lelei, e manatu foi o lea ua i alo le tautega ma le taligasua i le paia o le Palemene aemaise o le Afioga i le Palemia.

Ou te manatu e le tele se lagona o Falealili Sasae, ae na ona ou fonofaapipii aua ni manatu ma ni lagona ua folasia e nisi o sui usufono. Ona manatu lea o lea ua tafatu seuga lo outou sa i auvai ma ua malu le fau i o outou faiva manaia, leai o potala o Samoa e le ta tia uma manaia o le atunuu, a ta tia foi i ulumanu, e le ta tia tamusaina, ae faifaimalie ina ia lele malie le tia. A tapena foi faiva i le vao ma le tai, e faitau i le aoamalu, e faitau i le aoavao e faitau foi i le aoafanua. E i ai upu masani pe a faafaletoa tautai popoto o le atunuu, ona faapea lea, a tetele timuga, ua suaeleele ma tafe atu i le sami ona tafea lea i va o maa, ae tafea lava i eleele lelei.

E lagona le faafetai i lenei taeao i le folasaga manino a lau Afioga i le Palemia. Faafetai ua oo i le aso ma le tausaga sa momoo i ai le toatele o le atunuu, po o afea e tali ai le latou tuitagi ma le latou tiga, o le latou loto mafatia i le aveesea o measina sa galulue punouai mai ai o latou tuua i taimi ua sola.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ae le i oo se faamatalaga i le vaega lea, o se tala puupuu i le Tala Faatatau Faaopoopo o le Tupe e pei ona folasia e lau Afioga i le Minisita, faamalo fai o le faiva, faamalo toa, e viia ma le atoatoa e le sui usufono mo Falealili Sasae se Tala Faatatau Faaopoopo o le Tupe. O se taimi ona alu ese atu lea o le pese sa amataina i le uluai Paeaiga, aua foi vaega e fia faaleleia o le itumalo pei ona faamauina i le pese muamua.

E momoli le faafetai i lau Afioga i le Palemia ona ua ae se tofa ua mafai ai ona oo se suesuega ma tofia le Komisi Suesue o ni mataupu i totonu o le faamasinoga, o ni auala e foia ai faafitauli ma ni auala e faaleleia ai le auaunaga, aemaise foi o le tagatagai a i latou ina ia mafai ona totofi e tauave le galuega ma o latou tiute i le amiotonu.

E momoli le faafetai i lau Afioga i le Taitaifono o le Komiti aemaise o sui usufono mamalu sa gapatia aemaise o le suesuega, e le faigofie la outou pitolaau. O lea ua talitonu le sui usufono mo Falealili Sasae i le tafatolu faatauagai o Malo, o i lea e taoto ai le power lea, po o le Supreme Power o le Palemene o Samoa. E tasi lenei sui usufono sa oo atu foi i le Komiti ma loimata, aisea? Ona o faaiuga e le tonu. O le upu moni, e le tau tilofia faaiuga le tatau a le faamasinoga, e le tau sailia foi. Peitai, ua avea lava lenei lagalaga ma auala ua avea e ui ina le toe maua, e ui ina faigata ma ua tafefea pulu i vai i measina a aiga, ae faafetai ua le aafia le lautele.

Ona ou oo atu lea o le faafetai tele i sui usufono na oo mai ma fesoasoani i lenei suesuega, ia, e leai se isi e sulu i ai. Ae peitai o le faamamaavega lea ua sulu mai i le Komiti. Talosia ia ia vave se taimi ina mafai ai ona pueina le lipoti ma faataunuuna a latou fautuaga pei ona aumai ai.

Lau Afioga i le Minisita mo Galuega, Felauaiga ma Atinae Eseeese, ou te talitonu e le uma lava le taugologolo, masalo a faatele le oo atu i lou ofisa, pe na o le faalima, pe faaono, na ona toe faaopoopo atu lava, so o se taimi lava e avatu ai manaoga, ou te tilotilo atu o lo o tusitusia e lau Minisita Lagolago manaoga o itumalo taitasi. Faamolemole lau Afioga i le Minisita Lagolago toe faamau ifo i lau api, aua ou te talitonu o le api sa e faaaogaina i le amataga o le tausaga ua tumu. O le ala lea o le sui mai o le lanu o lau api i le aso.

O moli e fia faamalamalamaina mo le itumalo o Falealili Sasae, faafetai ua talia le talosaga e te afio atu e te silasila. E pei ona ou avatu, ou te le faia fua lava se tala, ae o lena ua oo atu lau Afioga, faafetai. Faafetai o lea ua tau amata ona ta atu le turisi e pei ona talosagaina i Salani i le auala, ae o lo o manaomia lava le faatalia po o afea e faauma ai.

O le auala i Utulaelae pei ona avatu i se manatu muamua, ua ova i le 28 tausaga e le i toe suaina nei auala. Faamolemole ina ia mafai ona faamau ifo faatasi ai ma auala galue. O auala galue i Salani ma nuu nei o le itumalo, e leai lava se auala e le i suaina. Tau lava o le sua ma faalaulelei ina ia sao ai taavale, aua tasi lea tamaoiga o le tatou atunuu o lo o lilifa i ai le tatou tupe e maua, o faatoaga. Ae faigofie foi le pitolaau a faatoaga ma le aufaifaatoaga pe a lelei mea e moomia.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O nisi talosaga, e i ai le lagona o le a oo atu lava i le ofisa o a outou Afioga i Minisita aua nisi o vaega e fia faaleleia, aua ou te talitonu lava e utiuti le tala i le seleni, aua la outou faasoa i le tele o sui usufono mamalu o le Palemene. Ia manuia lau Afioga i le Fofoga Fetalai o le pao ma le vavao o le Malo, manuia lau Afioga i le Palemia ma le Sui Palemia, aemaise foi o alii ma tamaitai Minisita, manuia tele lenei itu o lo o agaia le tatou Malo.

Manuia le tatou Fono.

FOFOGA FETALAI: Malo faafetai i lau Afioga i le sui usufono mamalu. Malo saunoa ua avanoa foi le tatou Maota Fono mo se isi saunoaga.

Tulai maia lau Afioga i le sui usufono mo Gagaemauga Nu. 3, lau Afioga i le Sui Fofoga Fetalai.

Tofa NAFOITOA TALAIMANU KETI: Ou te manatu ua i taotoga iasa le faletalatala o le Palemene i lenei taeao. O le ala lea o le fiafiamalie o se faamatalaga aua ua malu tauee ma maualuga. E i ai le talitonuga o lenei sui usufono, o lea ua tatou feiloai i alo e pei o le o le tala e fai i le tupua, aua ua sao i alo le taumafataga, ua maua foi se faasiliga malosi i lau Afioga i le Fofoga Fetalai. Ua maea foi ona palegaauau le taumafataga i le paia o le Palemene i ona tulaga faalupe, ae a le afio o lau Afioga i le Palemia, afio lau Afioga i le Sui Palemia, le Aiga Kapeneta, ae faapea foi le mamalu o Minisita Lagolago ma lena itu o le au pele. E i ai foi le lagona o le tulaga maualuga lea o lea e taoto ai ma fofola ai le fala i lenei itu faatauagai o le Palemene. E momoli le faamalo ma le faafetai i lau Afioga i le Fofoga Fetalai. O le taeao ua sola sa e momoli ai lapalapa o malo ma e faafetai i le Atua, e a le soifua ma le lagimama ua mafai ona tatou aulia ai le uluai Fonotaga o lenei tausaga 2017, malo faafetai.

Lau Afioga i le Palemia, e manatu ua e faafeiloai ma faatalofa, ae le gata foi i lea e tatau ona matou faamalo atu pe a tu ma tepa i lena tausaga sa tatou malaga mai ai, o le upu moni, e tele mea lelei ua ausia e lenei Paeaiga. O le saunoaga a lau Afioga e pei ona i ai le Komiti faapitoa latou te suesueina le tulaga o Faamasinoga o Fanua ma Suafa, e tasi se lagona e fia oo atu ai sa matou faafetai, e pei lava ona saunoa le loaloa o le Palemene. E le mamao foi sa matou talanoa, leaga o au o le Sui Taitaifono o le Komiti Suesue, na pau lava la matou faamatalaga na atagia ai a o faagasolo le galuega, finagalo o le tatou atunuu e afua ai le faamoemoe o le Palemene ma lau Afioga i le Palemia. O le mea lea matou te momoli ai le faafetai tele i le faatinoga o lea galuega, o lea ua outou silasila ma tatou vaavaai i ai i le isi itu o le faamatalaga o lenei faamoemoe, o lea ua tali mai le Ofisa o Faamasinoga, faafetai. O le a lalafa atu i lau Afioga ma le Aiga Kapeneta ma le Malo, o se taimi ona toe fai lea i ai o se manatu.

Ae o le auga o aute i lenei taeao ma lenei aso, ua ou tulai ai e fai se manatu o lenei itumalo o Gagaemauga Nu. 3. Ae a le Tala Faaopoopo Muamua o le Tupe 2016/2017.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

E fia momoli le faafetai ma le faamalo i lau Afioga i le Minisita o Tupe. A o ou vaavaai i lau saunoaga i le tulaga na faataoto ai le Tala Faaopoopo o le Tupe, o lea lava e solisoli mulivae ai i le tulaga na taoto mai ai le Tala Autu o le Tupe o lo o i ai se vaai mamao e faapea, fau se manuia mo a Samoa a taeao e ala i le faamautuina ma le faamalosi o lona faavae. A ou vaavaai i le tulaga o taoto ai le Tala o le Tupe Faaopoopo, lea foi e talatala ai le faamatalaina o tulaga o le tau atinaeina o le atunuu. A silasila i le tulaga o le Supplementary Budget ma le tulaga o lo o aumai ai le GDP, o le agaga maualuga lea lau Afioga i le Minisita o Tupe. Ua ou manatua ai lau saunoaga i le Tala Autu o le Tupe i le la tausaga ua mavae, live within our means. O le mea lea e matua lagolagoina ai e lenei itumalo le faamoemoe sa tapena ai ia le Tala Faaopoopo o le Tupe lenei. E pei lava o tala masani, ua uma ona faataoto aulape, ae i ai mea na tutupu e tataua ona toe silasila i ai. O lea ua taoto mai ai le Tala Faaopoopo, e ia te au foi la le agaga faaaloalo, e fia momoli ai le faamalo ma le faafetai i Faauluuluga o Matagaluega o feagai tonu ma le matafaioi. E le faigofie le faaso. E utiuti le faaso o upu sao ia. A o le vaavaai ma le maitau i lau saunoaga i le tulaga o lo o taoto ai le Tala o le Tupe Faaopoopo lenei, matou te le selu atu, e momoli atu le faamalo ma le faafetai i le maioio lelei ma tulaga o lo o taoto ai le faatinoga o le galuega ma le faagasologa seia faamaea galuega o lenei Paeaiga o lenei tausaga, malo faafetai.

Ona oo atu lea o sa matou faamatalaga i tulaga e pei ona taoto ai talosaga i le Matagaluega o Galuega, Felauaiga ma Atinae Esee. Ou te talitonu e taoto lua ai sa o lau Afioga i le Minisita i lenei faamoemoe. Aua o le galuega e galulue faatasi ai mo le atinaeina o le foundation, o le faavae mautu mo sona manuia i le lumanai. Lau Afioga le Minisita mo Galuega Esee o le Malo, o le talosaga a lenei itumalo, e na ona tauaao e lau Afioga e faapea foi lau Afioga i le Sui Palemia, ua uma ona faapepa ma tuuina atu. E pau lava o lea a oulua Afioga, e matou te toe tuitui atu. E matou te toe valuvalusia aa o le fau i aualagalua, a silasila lau Afioga i lo matou nuu i Safai, e a fa au i natura i mala faalenatura e tutupu mai, e ono lepetia. Ae o le agai i uta i Safai ma oso atu ai i gauta o le tala o le talosaga lena ua fofola i ou luma lau Afioga. O a ni mea e tulai mai, ae ua i ai ni auala e sola ai ma ui ai le atunuu e ui agai i le Gagaifomauga. O le faamoemoe maualuga e tatou te le iloa lo tatou gataifale i lona malosi o lo o i ai i le taimi nei. E pei ona taoto atu le talosaga i lau Afioga i le Sui Palemia, a o le agaga maualuga lena e faataoto ai, sosoo atu ai ma lo matou nuu o Satoalepai. E le po se lilo e le po foi malae i la outou Afioga, e tasi lenei afioaga o lo o taoto ai punaoa taua mo le atunuu e ala i tilapia. A o le tasi lenei o nuu o lea e talosagaina lau Afioga, o le auala o lo o ui ai e agai uta. O a fa au ae tutupu mai ni faalavelave, ae ua i ai se auala e sosola ai. O le ala lea na faamaioio atu ai lava parakalafa o le talosaga, se i faamolemole silasila ane i ai. E i ai pea tulaga o galuega tetele a le Malo, e lagolagoina e Gagaemauga le faamoemoe o le Malo ina ia faaifalagagaina ni inisinia tumau o le Malo.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O le agaga maualuga ina ia mafai ona monitor, mafai ona toe silasila i galuega tetele a le Malo i le tulaga o le faatinoina aua tasi lea vala, ua uma ona outsource, ua faatino le galuega, a o le faamoemoe i ona tua atu, e le atoatoa lava. O le agaga lea o le talosгаа i a oulua Afioga, e lagolagoina le faia o se inisinia, permanent engineer, aua lea faamoemoe, ina ia silasila i le faaalaina o tupe a le Malo, o lo o lelei lona faatinoina ia po o le quality services.

Ona ou oo mai lea ma le faáaloalo i lau Afioga le Minisita mo Aoga, Taaloga ma Aganuu. Ua uma ona tatou feiloai. E le toe oo i tua sa matou faamatalaga, malo onosai, malo le faatoa. E soo se mea lelei lava, e i ai lava ma ona faaletonu. Ae ua faafofoga Samoa i lau saunoaga, i tulaga na tulai mai, ia o lena o le a lafo atu i ou aao.

Ae ua matou talosagaina, se i faamolemole se i silasila ane i tulaga o tatou taaloga. O le taaloga lea o le fusu ma le siisii uamea mamafa, o le tasi lenei o itumalo e talenia ai tele. O nisi ia o taaloga o lo o tautaua ai lo tatou atunuu, o le taaloga o le fusuaga ma le siisiiga uamea mamafa. Lau Afioga i le Minisita, o lo o i ai lava nai feteenaiga a le Matagaluega ma le SSFA, faamolemole se i silasila ane ai. O lea ua amatamea lo matou nuu o Fagamalo e tusa ma le tatou feiloaiga. Ia o nisi ia o vala o lo o tutaia ai le faamoemoe. E talosagaina lau Afioga, faamolemole se i silasila ane i ai, ia atoa ma mea e faatino ai lo tatou faamoemoe aua le agai i luma o le tatou faamoemoe lea mo si o tatou atunuu.

Lau Afioga o le Minisita mo le Fono Aoaofaitulafono, ou te tautala ma le faaaloalo, e pei foi ona sau i le va i se tasi o saunoaga a le sui usufono mamalu, tulaga o le toatele o le Komiti Faa-Palemene ma le faatinoga o le galuega. E talosaga atu ma le faaaloalo, se i silasila ane i ai, pe tatau ona toe faaopopo se isi tupe e faatino ai le faamoemoe. A silasila lau Afioga i le tulaga o le faatinoga o le auaunaga, i lou maitau i ai ma lau vaai, o lea ua amata ona agai i tua, physical visit, ua le gata i interview po o le faatalanoaina i totonu o le Maota, ia ae ua aumai foi ma faamaumauga, ae o lea ua amata Komiti Faa-Palemene ona agai i tua. O lea foi sau i se tasi o asiasiga a se tasi o Komiti Faa-Palemene le tulaga o le matou motu i Salafai, human waste, e le oo i ai sa matou faamatalaga. O le ala lea o le tatalo atu i lau Afioga, e moomia le toe faaopopo o le Tala o le Tupe ia se seleni e fesoasoani ai i le Matagaluega aua le faatinoina o galuega a le Komiti Faa-Palemene.

Ona ou oo mai lea i le tulaga o le Matagaluega o Leoleo, Auaunaga o Tineimu ma Faalavelave Tutupu Faafuasei, lau Afioga i le Minisita, o le tasi lea vaega o lo o maua ai tupe maua a si o tatou atunuu. O lo o laualuga pea le tulaga o le maualuga o le pasene o tagata le faigaluega isi o tatou atunuu, o lea foi e aumai ai le tele o faitioga o si o tatou Malo. O le agaga maualuga, o lo o faatinoina e le Matagaluega i le va ma le United Nations, o tatou Misiona e ave i ai malu o le malo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

A o le matou talosaga, ae a fa au, ae tuu ai i totonu, e le gata i malu o le malo, a o nisi foi tomai faapitoa o la e faaogaina i le United Nations, ina ia toatele alo ma fanau a si o tatou atunuu e tuuvaa atu i ia foi galuega auaunaga mo le lalolagi i lona filemu. O trade eseese, e le gata i le faa-Leoleo, safety and security ae moomia foi ni kamuta, e moomia foi ni fomai. E moomia tulaga faapena, o le tatalo o le matou nei usugafono, se i toe silasila i ai. Ae a pe a toe send i ai, ina ia mafai ona aafia ai nisi o le mamalu o le atunuu mo lea faamoemoe.

O nai motugaafa ia lau Afioga i le Fofoga Fetalai. E manatu e ao ona tuuina atu finagalo o lenei itumalo mo taumafaiga aua le atiaaina o le tatou atunuu. Ia manuia tele lau Afioga, manuia lau Afioga le Taitai o le Malo, le aiga Kapeneta i lena itu o le malu, ae faapea foi ona manuia le Fonousu a le atunuu ma le tapuaiga a Samoa. Soifua ma ia manuia.

FOFOGA FETALAI: Malo faafetai, ua logo i tino matagi lelei le saunoaga a lau Afioga. Ia tulai maia se isi sui usufono e faagasolo ai le tatou galuega. Ia tulai mai le sui usufono malosi mo Siumu, tulai maia le sui usufono mamalu e saunoa.

Afioga FAALOGO IOSEFA SOPI (Siumu): Faafetai i lau Afioga le Fofoga Fetalai mo le avanoa ua tuuina mai. Ia e fia faapipii foi le agaga faafetai ma le faamalo i le Taitai o le Malo i le mataupu sa taulamua ai le Fonotaga i lenei aso. Ia ua tele lava upu i lau Afioga, ae momoli atu le faafetai ma le faamalo a lenei itumalo. Ia ae tulai atu e fai sina tala puupuu foi i le Tala o le Tupe ua i lumamea nei le Tala Faaopoopo Muamua o le Tupe. Ia e muamua ona momoli atu le agaga faafetai i lau Afioga le Minisita o Tupe. Ia e moni lava e le tele se tupe o faaopoopo, ia ae o le agaga faafetai o lo o i ai lava le taumafaiga, ina ia faasopolia Matagaluega uma i tupe o lo o talosaga atu ai aua galuega fai a le tatou Malo.

Ia ona oo mai lea o se faamatalaga i le Afioga i le Minisita mo Galuega, Felauaiga ma Atinae Eseees. Atonu ua taatia atu le tele o talosaga na avatu muamua a lenei itumalo, ae e i ai si talosaga e toe faaopoopo atu. O le vai lea e latalata i le faleaoga. Sa ou talosaga muamua ai i le tausaga ua mavae, e faalua ona tafe le vai lea ma ua afaina uma ai meatotino ma mea a aiga o lo o lata ifo ai. E oo mai lava le tafe a lenei vai i le faleaoga a matou. Atonu sa afio atu le Afioga le Palemia i le tausaga ua mavae, sa talosaga i ai le itumalo i lea talosaga. Ae taatia atu i lau Afioga, se i tagai ane pe le i ai sina auala se i faatopetope ai lea itu.

Ona oo atu lea i le Minisita mo le Soifua Maloloina, faamalo, o lo o tilotilo atu o lo o i ai se vaegatupe mo gasegase ave i fafo. Ia tuu atu i ina o lo o i ai foi talosaga a lenei itumalo i nisi foi o lo o manaomia lea fesoasoani. I

Lau Afioga i le Minisita mo Tina ma Tamaitai, Atinae o Nuu, Afioaga ma Agafesootai, e i ai lava se manatu e avatu i tulaga ia o pulenuu ma tamaitai pule o nuu.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ona o le tele o fonotaga a nuu, a fai fai lava ia le fonu a tamalii latou ma failauga, fai le fonu a tamaitai. Ia po o le a le mea e le fai ai se faiga ina ia taumafai ia fai faatasi fonu ia i le taimi e tasi. A le o lena, a uma talatalanoa ona toe fai ai lea o se fonu a pulenuu ma le pule tamaitai i mataupu o lo o fia manaomia.

Lau Afioga le Minisita mo Aoga, Taaloga ma Aganuu. O lena ua i ina le talosaga i le malae a lenei itumalo. Atonu e fai sina toatele foi o e o lo o talenia i so o se taaloga, o lo o mafai ona oo mai i le matou itumalo.

E momoli atu ai le faafetai tele ia outou afioga i Minisita, i galuega o lo o outou gapatia ai ma taumafai aua le faamalieina o le tatou atunuu. E momoli atu le agaga faafetai i lau Afioga i le Fofoga Fetalai mo le faatautaia o tatou Fonu. Faafetai i le Taitai o le Malo ma le Sui Taitai, ia ma lena itu atoa, ae faapea foi lea itu o le Palemene. Manuia le Fonu, faafetai.

FOFOGA FETALAI: Faamalo atu i le sui usufono mamalu ua maea ona saunoa mai i le itumalo o Siumu. Ia e i ai le manatu, a le toe i ai se isi sui usufono e fia saunoa, ia o le a tuu atu loa le avanoa i le Malo, e saunoa ai e tusa ai o mea sa laga mai e sui usufono mamalu.

E masalo e toe tapa se sui usufono o fia saunoa o le itu o lo o faapena ona aumai ai le faamuamua, ia afai e leai, ia e le nofoai foi le tatou Fonotaga ona e ao ona faagasolo. O le mea la lea, ou te tapa le itu o le Malo e tulai mai.

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga le Fofoga Fetalai, ou te tulai atu e momoli le faamalo ia i latou sa saunoa i le tatou Tala Faaopoopo o le Tupe, e le o se Tala tele, o se tamai Tala, na o nai seleni e toe faaopoopo, a o la lava e faagaoioi lava le Malo i le Tala Autu o le Tupe.

O lea foi ua uma ona aumai ia talosaga, o le tele lava o talosaga o lea ua faagasolo galuega a le tatou Minisita mo Galuega, ma e silafia foi o le tele lava o nei mea e subject i mea o tauofoga. O galuega ia e moomia ai ia le fausia o auala. O le tulaga i le vai, o lea lava e faagasolo ia polokalame, e le o taofia a tatou polokalame. A o le itu aupito sili ona taua i le Tala Faatatau o le Tupe leni, o le toe faamanatu mai ia i matou o le aiga Minisita e faatatau i le tele o talosaga ua uma ona faataoto i le Laulau a Fonu.

O le tulaga lava ia i le faatinoga o le galuega, e le mafai ona aveesea ia galuega amata i le tapenaina o mea o designs, faataotoina o fuafuaga o ata o galuega, ia faatoa mai ai lea ona faatino. Ae taoto mai pea le faatuatuaga, e umi lava le tatou lima tausaga, e le puupuu. Ma ou te fai atu o latou lava e fai nei auala ma isi mea, e oo atu i le isi lima tausaga ua le o toe manatua lava e se isi ia na mea. O le mea la lea, a faatuatuaai atu, e sili atu lena i lo le topetope atu nei, ia ona leai lea o ni mea e toe manatua e tagata. O le ala lena e tiga ona tele galuega e faia e isi sui usufono, ae fai atu lava le faigapalota, ua le omai. O lona uiga, ua galo i tagata mea sa fai ona o le faatopelau i le amataga.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O le a amata le matou galuega i le tulaga masani mai o i le faatasiusiuga, o a mea e totoe, ia ona ou toe tauavea lea i le faaiuga. Ia o le tala atu lena i lau Afioga i le Fofoga Fetalai.

FOFOGA FETALAI: Malo faafetai. Ia ua tulai mai le Minisita mo Fesootaiga, Faamatalaga ma Fesootaiga Vavave Faaneionapo e saunoa e tusa o mea sa laga e sui usufono mamalu, e ao ona agai tonu i mea sa laga e sui usufono mamalu e faagasolo ai le tatou galuega, faafetai.

Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo): Faafetai tele lau Afioga i le Fofoga Fetalai, e manatu foi o le a le toe tata i moana sa matou faamatalaga i paia ma mamalu o le Fonousu a Samoa o le tatou Palemene nei, o lea lava ua maea ona fofola le fala mai le amataga e oo mai i lenei taimi i sausaunoaga a sui usufono taitasi.

Ou te manatu, o le a ou agai tonu loa i le matou matafaioi o le Matagaluega o Fesootaiga. Afai ou te tomanatu i faamaumaua foi o lo o faamaumau ai ia saunoaga a sui usufono taitasi, ia e leai lava se tele o manaoga e fuafua i le tatou Fonotaga talu ai sa faapea ona faaalua ai finagalo eseese.

Ae ou te manatu, o le tele lava o finagalo e lagalaga, o le naunau lea ma le silasila e atinae aua le manuia i tulaga o faleaoga ma falemai i le soifua maloloina, tulaga tau aoaoga, aemaise foi o le silasila i le agai mai o tatou uaea i lalo o le tatou sami i fesootaiga. Ou te manatu la e momoli atu ai lau faafetai tele lava i sui usufono mamalu uma sa sausaunoa i ia tulaga. Ou te manatu, e leai lava se mea o a outou saunoaga o lo o faapea ona sese ese ma le tulaga o lo o faapea ona agai i ai le atinae o lo tatou Malo. O lo o taumafai pea e pei foi ona outou silafia, e le puupuu se taimi e faatino ai nei tulaga uma, ae o atinae faaaauu ma galuega faaaauu a le Malo i ona tulaga tau fesootaiga, o lo o agai tasi lava i faamoemoega ia e pei ona outou saunoa i ai, ina ia avefa fesootaiga e fesoasoani ai i le l lava o fomai, ina ia avefa fesootaiga e fesoasoani ai i le l lava o faiaoga. O lea sa outou saunoa i tulaga sa faatinoina i le la tausaga ua mavae, ia o lea la ua see atu i le isi faasitepu ina ia faapea ona faatinoina ma faataatia loa fuafuaga aua le faagaioiga o ia faamoemoe, a o tatou faatalitali ai foi mo le agai mai o le tatou uaea i lalo o le sami o le fesootaiga Tui Samoa, ia o lo o faapea foi ona toe faataatia le tatou National Broadband Highway e pei ona sa outou saunoa i ai i sona taatiaga lelei, ina ia mautinoa e taunuu mai le Tui Samoa, ia ua faapea ona faasafua ma taunuu atu e le gata i le talafatai o Apia nei, ia a o isi ooooga uma o le atunuu, e le gata o Upolu, a o Savaii foi ma motu i tua lona atoatoa ma lona lelei, ina ia faapea ona alu i lalo le tau o fesootaiga, ae ia faasilisili ona alu i luga lona faaogaina ma lona lelei, aua le oo atu ai o lona manuia i le lautele o le atunuu i sso o se itu.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Ona ou manatu lea, faafetai tele ia te outou i sui usufono mamalu sa lagalaga le mataupu nei, e pei ona outou faafofoga i le saunoaga a le Taitai, o galuega faaaauau, ia o lo o faapea ona faataatitia. O tulaga uma foi sa laga i tulaga tau fesootaiga tau telefoni, aemaise o tulaga tau faasalalauga tau TV ma leitio, o lo o faapea ona agai le polokalame i le taimi nei. O lea ua i ai nisi o afioaga sa lagalaga i le tatou fonu talu ai, o lena ua oo atu i ai faasalalauga. Ae o outou e le i oo atu, ia outou onosai mai, o lea lava e faagasolosolo atu a tatou galuega faaaauau aua le atoatoa, ina ia faapea ona faatulaga uma i lona tulaga e i ai le manuia o le atunuu i tulaga tau fesootaiga.

Ona faapea lea ona faamuta i i sau faamatalaga, lau Afioga i le Fofoga Fetalai ma le mamalu tele o le Fonousu a Samoa, ia faamalo faafetai mo galuega uma o lenei aso, ae faapea foi ona momoli atu lau faamalo i lenei itula isi ou itumalo ma lau tapuaiga, faafetai tele mo le tatalo mo le Malo ma le atinae o le atunuu ma le taitaiga foi o Samoa i lenei vaitau.

Manuia tele ia fuafuaga o totoe o tatou Fonotaga, faafetai.

FOFOGA FETALAI: Malo faafetai saunoa i lau Afioga i le Minisita mo Fesootaiga, Faamatalaga ma Fesootaiga Vavave Faaneionapo.

Ma o le avanoa foi lenei e tulai mai ai le Afioga i le Minisita mo Faamasinoga ma Pulega tau Faamasinoga e talifuaitau i nisi o mea sa laga e sui usufono mamalu.

Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga): Faafetai i lau Afioga Fofoga Fetalai mo le avanoa. I lau maitau atu i folasaga uma ia ua taoto i luma o le Maota, e leai lava se talosaga o tuu mai i le Matagaluega o Faamasinoga, ua na o le faafetai mai i le folasaga i le Taitai o le Malo ma le fuafuaga o lo o tau fuafua i ai le Faigamalo mo le faaleleia o le Faamasinoga. O lea la o lau tau maitau lena, e vagana ai ua misi se talosaga ia te au, a o lau maitau lena i ai i le paia ma le mamalu o le tatou Palemene.

Ma le faaaloalo lava i lau Afioga.

FOFOGA FETALAI: Faafetai. Ia ua tonu ma sao o lo o faapena foi ona maitauina e le Fofoga Fetalai ia tulaga o finagalo o sui usufono.

A o lea ua oo mai i le Afioga i le Minisita mo Aoga, Taaloga ma Aganuu.

Afioga Hon LOAU SOLAMALEMALO KENETI SIO (Minisita mo Aoga, Taaloga ma Aganuu): Ou te faafeteai atu i lau Afioga i le Fofoga Fetalai mo le avanoa. E vaai atu foi o lea ua tuuava vaatele ina ua tuula folauga. Ua faaifo foi le laaloa ona ua faapena ona tautai foi leí ..aua saunoaga ma fetalaiaga mai lena itu o le Maota o lo o faapena ona agaia ia le Malo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

E momoli atu ai le agaga o le faafetai i sui usufono foi sa faapena ona afea ia lenei Matagaluega i a latou saunoaga. I le maitau ma le manatu maualuga i le faataua o a outou Afioga o lenei Matagaluega e ala i a outou sausaunoaga i lenei taeao. E tusa ma le toaiva sui a usufono na faapena ona afea lenei Matagaluega e tusa ai ma a latou saunoaga i lenei taeao.

O lau toe tomanatu i ai ma le vaavaai totoa i ai i a outou sausaunoaga, e tele lava o sausaunoaga o le fautuaga, o a outou timaiga, o le tuualalo ina ia faapena ona mafai ona tapue ia ma faaleleia atili ia mea nei o aoaoga i totonu o si o tatou atunuu. O le ala lea e mitamita fai ae ai le agaga, ona o lo outou lagolagosua e ala i le galuega. E manatu foi e le toe po se lilo e tusa ai ma nisi o fuafuaga e pei ona i ai ia ni toatuga foi, po o ni faitioga foi ua faapena ona oo mai i le Matagaluega, e tusa ai o suega a alo ma fanau ua mavae atu, e pei ona afea i nisi o saunoaga o sui usufono o le Maota. Ma ou te talitonu ou te le alo foi i se ata o le laau, ia pe taumafai foi e sue se mea ou te lafi ai. O le upu moni, ia ua ela le vaai, ma ua sasi foi ia le Matagaluega e tusa i tu ma aga e masani ai, aua suega a alo ma fanau. Ia a o le taatiaga, o le aoga foi o le sasi, e toe tomanatu ai ma toe matimati ai le sa aua le agai i luma o isi tausaga. O le mea moni, e le i misi lava se tausaga, e mai lava i le 2013, 2014, 2015, 2016 lea ua oo mai ai, ia e i ai lava lape ona o le tele o fetuunaiga, e le gata i lea, o le fesuiaga mai o le Matagaluega i e o lo o faauluulu i ai i lea tausaga ma lea tausaga ma a latou foi faiga faavae ma fuafuaga, ia o le auga, ina ia agai i luma a tatou aoga. O le a la sa outou maitau foi i lenei tausaga i se lape o le Matagaluega, ia o lena ua ou fai atu. E le alo i se ata o le laau. Ua paela le vaai, a o le atoaga, e uma ifo le tausaga lenei, ua toe atoa aua suega a alo ma fanau e pei ona i ai ia nai faitioga foi.

O le mea la lea, e momoli le vaimalu i puega i le faafogafoga a lo tatou atunuu i se sasi a le tatou Matagaluega, o le tatou atunuu o le matua faitama, ioe.

Ona faasolo mai lea o se faamatalaga e tusa ai ma manaoga, e sao lelei. O fuafuaga alualu mamao ia o lo o faagasolosolo atu ai e uiga i a tatou faiaoga, e sao, e le o lava. O lea foi la ua vaavaalua e tusa ai ona saunoa le Afioga i le Minisita mo Fesootaiga, ia o fuafuaga alualu mamao na. E talosia ia vave mai le taimi ina ia i ai auala o fesootaiga ia faatekonolosi e fesoasoani aua ia nai aoga foi ma alo ma fanau o lo o maotua, ia faapena oo i ai tatou aoaoga, e ala i ia foi auala faatekonolosi. E le o toe mamao ae faatino le Tui, le Tui Afamasaga e pei ona outou faafogafoga mai i ai, aua le faamoemoe o le tatou Malo ina ia vave ona ola ia le auaunaga i nuu i tua i nai o tatou alo ma fanau e maotua i tua i nai o tatou afioaga i tua.

O malae taalo e pei ona talosaga mai ai, e sao lelei. O le auga foi lena o le faamoemoe, o lo o taumafai foi ina ia vave ma faatopetope se auala vave ia faaleleia uma ia tulaga, aua taaloga a alo ma fanau, ia siitia a tatou taaloga, o le mea moni, a le lelei a tatou malae taalo, ia e uma lava lenei olaga e le mafai foi ona lelei taaloga a tamaiti.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O fuafuaga foi na alualu mamao a lo tatou Malo e tauala i le Matagaluega o Aoga, ia faaleleia uma a tatou malae taalo aua taaloga a fanau ma siitia ai foi le tulaga o taaloga i totonu o le tatou atunuu.

O tatou faiaoga, e sao lelei e le o lava. O fuafuaga foi aua metotia e tatau ona faafoe ai ia fuafuaga o aoga tulagalua e pei ona taua e nisi o sui a usufono, e sao lelei, ua uma ona faamau, ua uma ona faatalatalanoa, ia o tulaga na o le a vaia matafaioi e tatau ona ausia e alo ma fanau e ala i matafaioi talafeagai e agai sao i ai faiaoga latou i le latou lea matafaioi. Ia o le a tilotilo i ai ina ia faapena ona faaleleia atoa ia aoaoga a tatou fanau i totonu o potu aoga.

Lau Afioga i le Fofoga Fetalai, ia se i vagana ai ua leai se isií .

Tofa Olo Fiti Afoa Vaai (Salega Sasae): Lau Afioga i le Fofoga Fetalai na o sinaí .

FOFOGA FETALAI: Ia malie lau Afioga i le Minisita, se i saunoa mai le sui usufono mo Salega Sasae.

Tofa Olo Fiti Afoa Vaai: Ia lau Afioga, ua misii mai i le saunoaga a le Afioga a le Minisita, o la e faafogafoga mai matua i tulaga o recount a o latou alo ma fanau lea ua toe fai i le taimi lenei, ae o lea o lo o faaletonu le masini foi po o le system a le Matagaluega, a o lea o le a pau le mamafa o le vaega lea i matua i le toe totogi o le \$50. Po o se mea e talafeagai pe leai?

Ma le faaloalo lava.

FOFOGA FETALAI: Se i tulai mai lau Afioga i le Minisita.

Afioga Hon LOAU SOLAMALEMALO KENETI SIO: Ia e faafetai i le uso a sui usufono e pei ona saunoa, e sao, e tasi lea avega o lo o faapena ona toe tilotilo i ai le Matagaluega, o le recounts, ia po o le remark. O le isi tamaitiiti e manao e toe fai atoa le makaina o lana pepa, o le isi tamaitiiti e manao e na ona toe count lava, ia ae ua lelei o lo o faapena ona tilotilo i ai. E sao lelei le fautuaga, o fautuaga lelei ina ia faapena ona toe tilotilo i ai, atonu o lo o faalogologo mai le Pule Sili, ia se i silasila ane i lena mea pe tatau ona fai, ae o lo o faapena ona tilotilo i ai le Matagaluega.

E pei na o le pau o nai vaega lau Afioga i le Fofoga Fetalai o lo o faapena ona aafia ai lenei Matagaluega e tusa ai ma saunoaga a sui usufono mamalu o le Palemene. E momoli atu ai foi le agaga faafetai i le Fonousu a le tatou atunuu, faafetai foi mo le amanaia o lenei Matagaluega ma afea i o outou finagalo. Ia o le a tilotilo totoa i ai ina ia aua ne i toe tupu le mea ua tupu.

Manuia tele le Fonotaga.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

FOFOGA FETALAI: Malo saunoa i lau Afioga i le Minisita, ua taliga e fia faalogo i le saunoaga a le sui usufono mamalu, malo faafetai. E le i fausia Roma i se aso e tasi e sau lava le fuauli e toa le moa, malo malele. Ia sosoo mai ai lea ma le Minisita o Tupe.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ma le mamalu o sui usufono o le Palemene, e muamua ona momoli atu le faafetai tele. E tele ia fautuaga taua ua tuuina mai ma o le aoga foi lena ma o le a faaoga e le Matagaluega o Tupe ia faapea foi ia i matou ina ia faapea ona tagatagai uma i itu sa fautuaina mai ai.

E momoli atu foi le faamalo ma le faafetai i le Komiti o Tupe, i latou sa iloilo ina ia le tatou Tala o le Tupe tusa ai ma lo outou lagolagoina o tupe foi ua faasoaina i Matagaluega taitasi ia ae faapea foi le tele o fautuaga na tuuina mai i nisi o vaega ina ia faapena ona faaleleia atili ai le fuafuaina ma le faasoaina o tupe i Matagaluega taitasi. E pei ona tou silafia le lauga o le Tala Autu o le Tupe i le tausaga talu ai lea sa faamanino ai le sini o le tupe i leni tausaga ia ma mafuaaga foi o faiga faavae ua fausia ai le Tala o le Tupe e le gata i le Tala o le Tupe Autu, ae faapea foi i le Tala Faatatau Faaopopo lea ua talanoaina nei o le tulaga lea e tatau ona consolidate. O le tulaga lea e tatau ona tatou vaavaai i tatou faiga faavae mo le puleaina ma le faasoaina o tatou tupe, ma tatou tilotilo foi i le tulaga i tatou tupe maua ma le tulaga o le fuafuaina aua e manino lava e le mafai ona tatou faaogaina ma faaluina ni tupe pe a leai ni a tatou tupe e faapea ona faatupe ai a tatou atinae ia. E pei foi ona outou silafia i le Tala Autu o le Tupe na ou lauga ai lea sa faapea ona faailoa atu ai o lea faatinoina i le taimi leni le toe iloilo ina uma o tatou tiute ma tatou lafoga ma tulaga faapena ona o le vaai taulai lava i le tulaga lea i le tele o manaoga mai i itumalo ma le atunuu ma e tatau ona lava tupe ma seleni a le Malo e mafai ai ona faataunuu ma faagaioi ia nisi o atinae taua. Ia ua taua foi e nisi le tulaga faapea o le tuai ona faagaioi ia tatou atinae ma polokalame tetele o lo o fesoasoani mai ai atunuu i fafo ia faapea foi le faaogaina o tatou tupe. Ia o le tasi lena o luitau o lo o feagai ma le tatou Malo i le taimi leni, o le tulaga foi lele o le capacity o Matagaluega ma Faalapotopotoga e mafai ona vave faagaioi ma faatino le galueaina o nei atinae. O le tulaga foi lea pei o lea sa talosagaina ai le Matagaluega o Galuega i le Afioga i le Minisita ia ni inisinia e fesoasoani i le Matagaluega. E pei ona silafia o le Matagaluega lea o latou na e faaautu lava latou auaunaga i le tulaga lea o le policy ia ma regulations. A o le faatinoina o galuega ma le faakonekarateina ia o lo o fai lea e le LTA ma isi pei ona taua ua tele ina faamatuu atu i le Private Sector le tulaga lea mo le faataufofo. Ia e manaomia e le Matagaluega le iai o ni inisinia e mafai ona aveatu ai le oversight i le tulaga lea i le faatinoina o faiga faavae ma regulations a le LTA ma latou na. E le mafai ona o atu ni inisinia mai le Ministry talanoa atu i le LTA o latou o lo o i ai inisinia ma o le tulaga lena o lo o i ai. E leai se faamoemoe faapea o le a toe foi i tua i le mea na i ai ia le Matagaluega o Galuega ae le i faia ia le toe fesuiaga.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

FOFOGA FETALAI: Malie le Minisita o Tupe, se i tulai mai le faauilavea.

Afioga Hon Faumuina Tiatia Faaolatane Liuga: Lau Afioga i le Fofoga Fetalai faafetai mo le avanoa.

Ou te le o fia faalavelave foi i le saunoaga matagofie a le Afioga i le Minisita. Ou te iloa e lelei pe a ou taua aua e le i faapea na laaloo ai le tulaga o le toe faatulagaina o le Matagaluega o Galuega. Na faia le faaiuga e ave se tagata e aoaoina faapitoa e faatupe e le Faletupe o le Lalolagi e aoao faainisinia ona o le tagata sa taitaiina le Matagaluega e le o se inisinia a o le administrator. O lena tagata na foi mai ua uma ana aoga, qualified as a top engineer e le i leva ona faigaluega i i ae alu i le Private Sector. O lona lua na toe ave foi le isi inisinia o le mea lava e tasi, e le i laaloo ia le vaai faapena. O le taimi lenei o lea ua CEO le tasi o inisinia faapitoa ma e i ai lou talitonuga ua lava le inisinia lea e civilize ina isi tulaga faapena e faaoga ai le Private Sector. A faaoga le Private Sector e more independent atu views a le Private Sector i lo inisinia i i. O le CEO lea i ai nei o lea e i totonu o le Board a le LTA e i ai lona conflict of interest, o lea foi e vaai i totonu o le sector lea e tasi. O lea e i ai uma a transport, aviation ma isi mau tulaga faapena ma le maritime lea i totonu uma o le sector lea. O lea o le a toe review lava e latou a latou galuega, e leai se review tutoatasi o faia ai.

Ma lou faaaloalo lava lau Afioga i le Fofoga Fetalai.

FOFOGA FETALAI: Ia se i toe tulai mai le Afioga i le Minisita o Tupe.

Afioga Hon SILI EPA TUIOTI: Faafetai i lau Afioga i le Fofoga Fetalai, ia o le taimi lea sa matou tapenaina ai le Reform a le Ofisa o Galuega o le taimi lena o lo o CEO ia le Afioga Isikuki Punivalu o ia o le inisinia. E sao lelei le sui usufono o le taimi foi lena sa auina atu ai i fafo ma faatupe e le poloketi a le World Bank ia se isi e toe foi mai e fesoasoani i le tulaga lea. Peitai o se vaega o le reform e le i maea ona fai o le faatulagaina lea o totogi o inisinia, masalo o se tasi lena o tulaga e le i toe tagai i ai le Malo i galuega ia i le Ofisa o le Public Service Commission ona o le tulaga lea ua standardize ia totogi faatusatusa i le Public Service. O le isi fautuaga malosi i lena taimi e toaitiiti a tatou inisinia e le mafai ona tatou taofia ona o le tulaga i le laiti o totogi. O le mea tonu foi lena lea ua tupu nei ua le mafai ona nonofo i totonu o le Public Service, e oo foi lava i le LTA i le taimi lenei e le umi lava ona i ai ia latou inisinia ae fia o i le Private Sector. Ia atonu o se tulaga lena e tatau ona toe tagai atili i ai ia le Matagaluega. A o le tulaga foi lea o le oversight responsibility o le Ministry e tatau lava ona iai se Inisinia e fesoasoani i le Pule Sili. E tatau ona toe tilotilo i le tulaga lea o le conflict of interest pe a alu atu le Faatonusili o ia e faia le policy ma faia le regulation ae alu atu toe saofai i totonu o le vaega o lo o faatalanoaina ai ia tulaga ia o le faakonekarate ma le toe vaai o le Pulega.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O lona uiga tasi lena suesuega o lo o fuafua e toe faagasolo nei mo le toe tagai lava lea i totonu o le Public Service Commission ma structures a Matagaluega ina ia faapena ona toe faatulaga i le tulaga na iai a tatou reforms. E pei ona silafia o le taimi lena sa tau faaitiitia ia le Public Service ae faatele ma outsource ia galuega i le private sector. O le mea lea ua vaai atu iai ua i ai ia Matagaluega fou ma Faalapotopotoga fou ua sili atu ona tetele ma toatele le aufaigaluega pe a fua i le vaitaimi o faatino i totonu o nisi o Matagaluega ia galuega ia ua latou faia nei. Ua uma ona faaleo atu i le lauga o le Tala Autu o le Tupe tasi lena iloiloga e toe fai o le toe tagai lea iai o le PSC i le faatulagaina o Matagaluega nei ia ma toe tilotilo ia le MPE i le tulaga o lo o faagaioi ai ia tatou state own enterprises. E le i i ai nií .

FOFOGA FETALAI: Tuu atu le avanoa i le sui usufono.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, ou te faafetai atu i le Minisita i le tulaga lea pei lava foi ona taua o tuualalo ma fautuaga e toe liuliu i ai le tofa. Lau Afioga i le Minisita, e i ai nisi auala e mafai ai ona faataugofie, o le mea lea o le a tupu o le a toe fula le tulaga o le tatou Public Sector a o lea i ai isi auala. O le mea lea e tupu i i o le fesili atu lava fai mai e le o lelei, ae ana faatu se central part e tau o le BMU e fuafuaina lenei mea, o le accumulation muamua e justify ona o galuega faaputupu ia ua i ai. O le tolu tausaga talu ai ou te iloa e oo i le \$350,000,000 le tupe le faaogaina mai i fesoasoani mai fafo. E le o lelei ona fuafua, e le o siakiina la o galuega a o le fuafuaga mo le faatinoina o galuega. E mafai ona fai le retain arrangement ma kamupani e develop ai le Private Sector ia mafai ona fesoasoani mai i le Matagaluega o Tupe ma fesoasoani mai foi i le Matagaluega o Galuega o lo o vaaia tatou galuega. E pei o le tasi lea auala e silasila i ai, aua o le tau o le inisinia e tasi pe a faatupe uma i ai mea e alu ai le \$200,000 i tausaga taitasi.

Ma lou faaaloalo lava.

Afioga Hon SILI EPA TUIOTI: Faafetai tele i lau Afioga i le Fofoga Fetalai. Ioe o tulaga uma na o lo o tilotilo i ai i le taimi lenei. E pei ona silafia e tele ia tatou atinae tetele o lo o faatupe mai e faalapotopotoga mai fafo po o le World Bank ma le ADB. O le tele foi o isi projects ia toeitiiti a tofu le project ma le BMU, o lo o i ai le tulaga o lo o tau vaavaai i ai le Ofisa o le Tupe, ina ia mafai ona centralize ai nisi o BMUs aemaise lava i le tulaga lea o le financial management ma le tulaga lea o le monitoring ma le evaluation. O le popolega foi o le mea lea sa fai ma ave i tua i Matagaluega sa taumafai ina ia faapea ona fesoasoani iai ia latou ia mai fafo e build up le capacity e up skill o tatou tagata na oo lea i le taimi e fai ai lava e tatou galuega e le toe aumaia nisi mai fafo. Ae o le tulaga lava ia e pei ona taua la ua faagasolo ia fuafuaga faapena o le a fesoasoani ai i le faatinoina o a tatou galuega.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ou te masalo o le taua tele o saunoaga a sui usufono mamalu o le Palemene i lenei aso o le faaali mai lea o tulaga ma vaega taua e ave ai le faataua i le tapenaina o le tatou Tala o le Tupe autu mo le 2017/2018. E pei ona ou taua o le Tala o le Tupe Faaopoopo lenei, Tala Faatatau Faaopoopo Muamua ona o le faaaauina ai o le Main Estimates, e laiti lava le fetuunaiga lea e fai ai nei. A o le faamoemoe atoa lava o tatou reviews ia e fai o tatou taxes ma tatou lafoga ma tulaga faapena e toe tilotilo lea i structures o Matagaluega e toe tilotilo e toe review mandates a Matagaluega ma o le tasi lena faafitauli o lo o i ai nei ua tetele Matagaluega e leai se tulaga foi lea o se coordination ma se sharing o information. Ia atonu foi o le isi tulaga e tatau ona toe tilotilo i le tulaga o le leadership i totonu o Matagaluega ma Faalapotopotoga ina ia vave ona faia faaiuga aua o le tasi lena mea o lo o tuai ai a tatou galuega ona o lea ua faamoemoe i ofisa i lalo e le o ni sinia ia ae faigata ona fai e latou se faaiuga e tatau ona aveatu i le faauluuluga. O le tulaga lena e tatau ona toe vaavaai iai e toe faia ni polokalame e talanoa i ai i faauluuluga o Matagaluega to be decisive. Ia avea i latou o ni tagata ua tofia o faauluuluga o Matagaluega ia faia e latou le faaiuga ma faapena ona talanoa i le Sui Pule ma i latou i lalo ia malamalama. A tupu mai se mea ae le o i ai le faauluuluga o le Matagaluega, ae ia mafai ona fai e se isi sinia e delegate i ai ia tulaga faapena. Ae ou te talitonu ua fesoasoani tele ia fautuaga na tuuina mai e le mamalu o le Palemene, e le gata i le Ofisa o Tupe mo le tapenaina o le isi tatou Tala o le Tupe i le tausaga fou, ia ae o le tulaga foi lea o le toe galulue ma isi Matagaluega ma lala o le Malo ina ia faaleleia atili le fuafuaina ma le faasoaina o tatou tupe, ma le mea taua ina ia faapena ona faalelei le faatinoina ma le faagaioiina o tatou galuega ina ia aua ne i toe tulai mai le tulaga lea ua uma le tausaga faaletupe a o lea e totoe a tatou lava tupe ma totoe foi ma tupe na aumai mai fafo e tatou te faaaogaina.

Faafetai tele i lau Afioga i le Fofoga Fetalai, e aveatu foi le faamalo ma le faafetai i sui usufono o le Maota nei mo fautuaga lelei ua taatia i luma o le Laulau i lenei aso, faafetai.

FOFOGA FETALAI: Malo faafetai, ia ua oo mai le faasologa i lau Afioga i le Minisita mo Tina ma Tamaitai, Atinae o Nuu, Afioga ma Agafesootai.

Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu, Afioga ma Agafesootai): Faafetai i le Afioga i le Fofoga Fetalai mo le avanoa, ia faamalo foi i le Fonousu a Samoa le lavapapale ua vela foi le fala. Faamalo i lau Afioga i le Taitai o le Malo le Sui Taitai ma le aiga Kapeneta ma Minisita Lagolago, aemaise o sui usufono mamalu uma o le Fonousu a Samoa lea ua atoa i i. Le faafogafoga mai foi a le tatou atunuu e faatalofa atu i ona vaega eseese o lo o taputapu mai, faafetai foi i faauluuluga o Matagaluega aemaise foi le Failautusi ma le Ofisa o le Fono o lo o faapena lava ona sologa lelei ai ia tualumaga o le tatou fonotaga.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

E le tele se tala a lenei Matagaluega aua e leai ni sui usufono se toatele sa laga lenei Matagaluega seia vagana ai le sui usufono mamalu mo Siumu lea sa faapea mai, pe a pe a fai e sao lelei lau faalogo, toe faasao mai au, pe a fuafua foi lele se faiga, fai se faiga ina ia faapena ona fono faatasi ai ia pulenuu ia ma tamaitai. Ia a le o lena, ou te faaluaina pe le mafai ona fono faatasi ia totonu o nuu. Ia o se tulaga lea, e fai faaeteete foi se faamatalaga a le Matagaluega o lo o faafogafoga mai nuu ma afioaga. E le o po se lilo, e eseese lava ia finagalo o lo o faapena ona taiala ai ia fono mamalu a alii ma faipule o lo o tua i ai lo tatou malo, ma o lo o toafimalie ai ia tulaga eseese e pei ona i ai mea o tutupu mai i lea taimi ma lea taimi, ia o le pule mamalu a alii ma faipule, e ave i ai le faamalo ma le faafetai a le Malo e tauala atu i lenei Matagaluega, o lo o feagai ma le atunuu, le community mai lava i alo ma fanau laiti o tamaiti aoga o lo o galulue faatasi ai ma le Ofisa o Aoga, o tupulaga talavou se i pai lava i le fono mamalu a alii ma faipule ia ma toelaiina ma loomatutua, se i tulou o lou gutu ma le afi o lo o faafogafoga mai, o le vaaiga taulai lea a lenei Matagaluega o le aotelega o Samoa ina ia soifua fiafia, soifua manuia i ona tafa eseese ma tulaga e tatau ona galue agai i ai le Matagaluega.

Mo se faamalamalama o la lea itu o lo o faapena lava ona amatamea le Matagaluega pei lava ona silafia, o lo o faafogafoga mai pulenuu, sui o nuu, sui o le malo, e fono faatasi le Matagaluega o Upolu atoa, fono faatasi. Ona matou malaga foi lea ma le Minisita Lagolago i Savaii, e faapena foi ona fono faatasi ma le tuualalo, o a uma auala e avatu ai ia faamanuiaga a le Malo e ala atu i aoaoga, o atinae, o polokalame eseese, o outou o pulenuu ma sui tamaitai o nuu ma sui o le malo, o outou ia o faitotoa, le ki ma le tatala e tatou te ui atu ai i totonu o nuu ma afioaga, e ala la i le pule mamalu a alii ma faipule. Ou te faafetai atu i le sui usufono mo Siumu, ua laga mai le mataupu ua maua ai se avanoa, e faailo atu ai foi le faaiuga o le tausaga lea na tea nei na launch ai leí .faataoto ai foi ia le fuafuaga autasi a lenei Matagaluega mo le isi 5 tausaga. Ma e o lea e faatalitali e faataatia se matou pepa i luga o le Kapeneta ia pe ioeina pe a, ia ae atonu o le la e faafogafoga mai ia nuu. O lo o i ai se musumusuga ia atonu o le musumusuga lea a le mana o le Agaga Paia, ia aua o tatou uma lava, o sui usufono mai o le atunuu Upolu ma Savaii, ina ia faataatia mai ai, o lo o i ai le pulenuu, sui tamaitai o nuu ma le sui o le malo, aemaise o Komiti eseese lea e masani ona faalagi mai. Ae i ai se vaivaiga o le Matagaluega i ana fuafuaga autasi, tatou galulue faatasi. Pe a pe a Taitaifono tatou uma, o sui usufono o le atunuu mai lea itumalo i lea itumalo, e Taitaifono le sui usufono o lo o i ai ia le pulenuu, sui o le malo, sui tamaitai o le nuu, o sui o le Komiti, e malosi ai lo tatou galulue faatasi agai i totonu o nuu ma afioaga. Po o a fautuaga ma polokalame e faagasolo atu, o la e faatali mai le faipule. O tatou nei i lona itumalo, e silafia lelei e le faipule, ia alagaoa o lo o i totonu o lona itumalo, o mea ia e o lo o sausaunoa mai ai e tatau ona faapea ma faapea le palasi atu, o ai lava Matagaluega pe o atu faatasi, tele ai le tupe faasao, ona kiliva lea o polokalame.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O lo o faafogafoga mai ou te le alo foi au ia ou te lafi i se, ae o lo o i ai lava nuu ia ma afioaga o lo o faafogafoga mai, e le o faia le galuega a nisi o pulenuu. Ma e atonu o la e faafogafoga mai nisi o pulenuu o autovaa mai i le Matagaluega ma aumai nei faitioga.

O le galulue faatasi o tatou ma o tatou afioaga ma tofi o tatou afioaga, ia o le manatu lea o le Matagaluega o lo o faapea ona tepa taulai i ai, ia pe afai foi o faapea ona finagalo i ai a outou Afioga. Pau lea o lau faamatalaga e eseese ia nuu ma a latou pulega, ae o le tuualalo o lo o fai nei mo alii faipule ia oo i totonu o le pule mamalu a alii ma faipule, ia sui nei o nuu, ma sui o itumalo e avatu i ai le amanaia le sao o tina i totonu o nuu ma afioaga.

Ia ou te tatalo atu foi au o au o le tina o lo o taitaia le Matagaluega o Tina ma Tamaitai, na ona faataatia atu lava i autafa, ae o lo o pule lava alii ma faipule ma faiganuu, ma lea nuu. Ae o se vaivaiga lena ua faataatia atu, ina ia faapena ona e tele ia o mataupu e talanoa ae mo lenei lava Matagaluega, maimau e, pe ana faalele a tatou upu ma fuafuaga ae mafai ona tatou galulue faatasi. E tele foi ina tuuaia le Malo aemaise foi e auala atu i lenei Matagaluega ma faapea mai, o lea foi ua toe aapa mai le Malo i faiganuu. I le pule mamalu la lea i totonu o nuu. E leai ma se mea faapea, o faapena ona faagasolo le talaiga a lenei Matagaluega o lo o feagai ma le atunuu. O lo o tutoatasi lava le pule mamalu i totonu o nuu ma afioaga e le o apaapa ai lenei Matagaluega. Ia ae tatou talosia ia le tatalo ia aua a tuuaia le Malo, o lata ita fesili. Ia o ai le Malo? Tatou uma lava, i latou uma na soifua mai i totonu o eleele o Samoa o tatou tofi na tofofi ai tatou e le Atua tatou te galulue ai ma o outou soifua ma o matou ola mai ai ma tatou galulue faatasi i soo se matata. Ou te talitonu lava ua o se taunuuga lena o se atunuu e fealofani ma galulue faatasi. E faamalo atu ai lava i tulaga foi i le Tala o le Tupe i le Afioga i le Minisita, ia aemaise foi o le Pule Sili ma le Matagaluega o Tupe mo le tatou Tala o le Tupe e lagolagoina e lo matou itumalo o Gagaifomauga Nu. 1 ia le Tala o le Tupe e pei ona malie i saunoaga a nisi foi o sui usufono, e pei foi o le autu lava sa tulimatai e pei ona tulai mai lau Afioga, ia tatou faasoa i tupe o lo o tatou maua. Faafetai tele mo la lea tulaga.

Ia manuteleina le Fonousu a Samoa lau Afioga i le Fofoga Fetalai ma le mamalu o le Maota, faafetai.

FOFOGA FETALAI: Ia faafetai, malo saunoa i lau Afioga i le Minisita. Ia ma o le avanoa lenei e tapa ma le faaaloalo lau Afioga i le Minisita mo Galuega, Felauaiga ma Atinae Eseese.

Tulai mai lau Afioga i le Minisita e saunoa.

Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eseese): Ia e faafetai atu i lau Afioga i le Fofoga o le Fetalai mo le avanoa. Ia e le i tali atu foi i ni mataupu po o ni faafesili foi sa laga mai i saunoaga i sui usufono mamalu.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

E muamua ona ou faatulou atu i le pau o le Maota o sasao nei i le afio a lau Afioga i le Fofoga o le Fetalai aemaise foi lau Afioga i le Palemia, paia o le Kapeneta, le mamalu o Minisita Lagolago aemaise ai foi ia sui usufono mamalu o le Palemene o Samoa. Ae e fia faamauina foi le agaga faafetai i le Afioga i le Minisita o Tupe, ia aemaise foi le Matagaluega o Tupe, faauluuluga ma le pulega ia ma le afaigaluega mo le tapenaina maeaea o lenei Tala Faatatau Muamua o le Tupe. Ia e le faaititia foi le agaga faafetai i le Komiti o Tupe Maua ma Tupe Totogi i le latou foi lipoti ua maea foi ona tapena. E avatu ai le faafetai i lau Susuga i le Taitaifono aemaise sui usufono o la outou Komiti.

Ae le i afea i se faamatalaga ia mataupu ia sa laga mai e sui usufono mamalu, e muamua lava ona ou tali puupuu atu lava i le Lipoti a le Komiti, ona o lea e pei e tau afea ai le Matagaluega o Galuega Tetele i ni mataupu foi o lo o faapena ona aumai ai se faamaoniga i se talosaga foi mo ni tagata faigaluega. E muamua la ona ou fia toe faamamafa atu i le tulaga lea e tatalo mo ni inisinia, ona o avanoa inisinia nei na manaomia e le Matagaluega e tusa o lana matafaioi, o le Regulatory role a le Matagaluega, e faatonutonu e pei ona finagalo i ai le Malo i ana taiala ma fuafuaga lea ua leva ona faataatitia mai. E faamatu uma atu i tua galuega ia i Private Sector, ae tatau lava ona i ai ni inisinia mo le Public Sector, i roles la nei e 3. O le Planning, fuafuaga o galuega a le malo, Infrastructural Planning, Regulatory role, mea o standards ma le supervising o galuega ia ma le pulega o tatou aseta, asset management. O vaega tetele la ia e 3 o lo o manaomia ai ni inisinia e tau tapena ai ni faiga faavae ona e i ai le talitonuga o le tele o galuega ia e faaletonu ona faatino e le Private Sector, e mafua mai ona e le o i ai se role a le Ministry, o latou o le Regulator role e time off ina ni galuega ma asiasi po o ausia uma standards e pei ona faataatia ai tulaga o le faatinoina o galuega.

Ua maitauina foi o le tele galuega ua toe fai, sa le lelei ona tapena ma faatino ia ona e le alo foi i se tuuaiga, ona e maitau foi sa i ai se faaletonu o le Ministry, ona sa tatau pea ona tapena le tulaga lea, ona ia mautinoa ia i ai se role a le Ministry, e silasila ma mautinoa ua maea tapena lelei uma galuega i mea o tatou infrastructure. Ia pei o le tulaga lena e moomia ai le toe tapena o se Vaega lea ia i ai ni inisinia e faatino ia tulaga. O le faiga o tatou auala, ua maea le review o standards o auala mo le silafia e lau Afioga ma le paia o le Palemene, ma ua maua ai, e eseese, e eseese ia o standards ia e faatino e konekarate. O standards a Niu Sila, standards Ausetalia, standards a Peretania, standards a Amerika, a sau lava se LTA e faatino ma fesoasoani i le faiga o galuega, e sau lava le LTA ia ma lana ia lava standards. O le mea la lea ua tulai mai, a tulai mai ni pefea i tatou galuega, ia e mafai ona alo le konekarate ona o le standard la lea. A i ai lava se set standards a le tatou lava Matagaluega, o le tatou Malo, e faatino ai le tulaga ia, ia atonu o le a foia le faafitauli ia o le leaga o le faiga o auala ia ma galuega uma a le Malo e faatino e le Private Sector. E pei o le tulaga la lea tau tapena, ae moomia la ni inisinia

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

FOFOGA FETALAI: Se i tulai mai le sui usufono mamalu mo Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga, faafetai foi i le saunoaga a le Afioga i le Minisita. O le tulaga lea i le faaaogaina o a tatou lava inisinia e alu lava i mafaufauga foi ia o mea faitele. O le faaaogaina o le Private Sector, e tatau ona aua ne i o tatou second guess le Private Sector ona o le Private Sector, o la e mafaufau i tupe la e i latou taga, e taua i ai latou le maua o pisinisi. Ou te le faapea atu o lea ou te naunau i le tulaga lau Afioga i le Minisita, ina ia tutoatasi. E leai se tutoatasi o tatou inisinia, o lena foi e ia te oe le sector atoa e faalogo uma inisinia i le mea e fai atu ai le CEO, po o le Minisita. Ave i se isi vaega latou te faia, e iloa ai le tutoatasi. Ne i e fesiligia le professionalism, a o le mea lava lea sa tele ai tatou, o le mea foi e sili ai o lea e iinei isi tamalii sa i ai i totonu o le vaega lea, na molimau lava i le faigata na ala ai ona mafua ona ave i tua. O le Afioga foi i le CEO sa i ai, ia na alu foi i tua. Ave le isi e toleni, alu ai tupe e tele, ae sau e le i uma, ae alu i tua. Toe sau foi le isi tagata talu ai, la foi ua alu i tua, a o inisinia le toatele o le LTA. Ua o uma i tua le au inisinia, lea ua saunoa le Afioga i le Minisita o Tupe, o le a faalelei totogi, manaia, ae le o le solution lena o tatou faafitauli lea e feagai nei. Ou te matua lagolagoina pe ana faapea e long term lona faaaogaina.

O le mea lea e i ai, e uma loa ia galuega faaputupu, ia ona isolated foi lea o nei tagata, ma maua ai ua bored ua leai ni a latou mea e faia, ma lou faaaloalo lava.

FOFOGA FETALAI: Tulai mai le Minisita mo Galuega, Felauaiga ma Atinae Eseese.

Susuga Hon PAPALIITELE NIKO LEE HANG: E leai e le o i ai se agaga e faaititia le professionalism o le Private Sector i auaunaga o lo o faatino e auauna ma fesoasoani ai i atinae tetele a le Malo. E pau o le tulaga lea e tau faailoa atu, ua tulai mai tulaga ia. E le fesiligia le tulaga lea o le professionalism, ae i ai lava le ituaiga professional e le atoatoa le faatinoina o lana galuega. O lea la e tai pei ai, e tatau lava ona i ai se tatou lava body, po o le regulatory la lea role, e faatino e le Matagaluega o Galuega, aua la le faaleleiina ma le faaatoatoaina o auaunaga ia o galuega a le Malo lea e faatino e le Private Sector. Ae leai se agaga faapea ua le talitonuina ia, ae ona o lea ua tulai mai ia tulaga ia ma mautinoa, ia e pei ona fai atu, e le atoatoa uma foi ia ni professional engineers e o mai e faatino ia tatou galuega.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Ma le isi mea lau Afioga i le Fofoga o le Fetalai, sa taua e le Afioga i le sui usufono le tulaga lea i le totogi e \$200,000. Sa saili le Matagaluega i ni konesale, inisinia konesale e fesoasoani ai la pe afai o le tulaga lea, e nao se vaitaimi. Ae o le talitonuga a le Matagaluega, e le na o se vaitaimi le faiga, suesuega ia. O le tulaga lea na saili ai totogi o le konesale, ia o le isi konesale pe \$400,000 ae na o se vaitaimi e le atoa se tausaga. O ituaiga totogi ia lea e maua e tatou inisinia a tatou ia, ona ua siitia le tulaga o latou foi auaunaga, ia ma ua taugata foi, ma o la e fua e latou, a faapea e o i atunuu i fafo, o ituaiga tupe ia latou te maua. Ae peitai ane, ia e le mafai ona faatino e le Matagaluega ia ituaiga totogi ona employ ni konesale taugata faapea. O lea la ua agai loa le Ministry e toe employ loa la ni tagata faapea, e puupuu e le faapea e faavaitaimi foi le tulaga faapea e tapena ai le Matagaluega. O se galuega e faifaipea, faifaipea, faifaipea, ma e moomia ai la ni tagata faapitoa inisinia i totonu o le regulatory role a le Malo lea i lalo o le Ministry ina ia faataunuu ma faamaopopo ai le tulaga lea aua lef .

FOFOGA FETALAI: Malie le sui usufono mo Palauli le Falefa, se i tulai mai le faauilavea a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai ona o lea ua ta le taimi e fai ai le tatou ti, ae le i break mo le tatou ti, se i fai atu lava si au tamai fagogo lea. Ua oo nei ina vevesi le suiga o auala o le a o tatou i le itu taumatau, misa loa inisinia, o le isi inisinia sa saofai i totonu o le vaega lenei. O le mafuaaga o le misa, fai mai le isi inisinia, o tatou auala sa fau faapitoa lava ia o taavale afi i le itu tauagavale. O lona uiga, a o nei i le itu taumatau, e toe tasua uma lava i luga auala ae tasui le mea e o ai leaga o tatou auala na fau faapitoa e o i le itu tauagavale. Ae fai mai le isi inisinia, faatoa ou faalogo lava lea i se mea faapea, e tasi lava le mea e fau ai auala, o le standard foi lea malosi, po o le a lava le auala pe tauagavale pe tu le ave i le taumatau pe tu le ave i le ogatotonu, e tutusa lelei lava le malosi o auala. Ou te manatu a faaauau le argument lenei, e ta le 13 tatou te le i o e fai le tatou ti. Ou te fautuaina tatou malolo ia.

FOFOGA FETALAI: Ia, ma o le faaiuga foi lea o lea finauga. E i ai le manatu leaga o lea ua tatou toai taunuu i le tatou malologa.

O le a faataatiaese Taualumaga a le Fono Aoaio Faitulafono mo lana malologa.

Na faataatiaese Taualumaga a le Fono Aoaio mo lana malologa masani i le itula e 4:46 i le afiafi ma toe faaauau i le itula e 5:22 i le afiafi.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Na toe faaauau felafolafoaiga i le faitauga faalua o le Tulafono Tau Faaofi o le Faatatauina o Tupe Faaopoopo (Nu. 1) 2016/2017.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Fautulafono. E faia le malologa o saunoa le Afioga i le Minisita mo Galuega, Felauaiga ma Atinae Eseeese.

Ou te tapa ma le faaaloolo lau Afioga i le Minisita mo lau saunoaga.

Susuga Hon PAPALIITELE NIKO LEE HANG: Faafetai i lau Afioga i le Fofoga Fetalai mo le avanoa e faaauau ai le tali atu foi i mataupu sa laga mai e sui usufono mamalu. E manatu foi ua sao i alo se taligasua i lau Afioga aemaise foi o le paia o le Palemene e toe faaauau ai le tatou galuega i lenei afiafi aua se faasiliga malosi. Ae toe tasi lava se mataupu lea ou te fia talanoa ai i le Lipoti lau Afioga, ona o se mataupu e tau ese ai sou manatu, o le tulaga lea e faapea e faaoga le CEO o le inisinia e faatino galuega ia ae aua le faafaigaluegaina ni inisinia. Pe o le sao lea o le fautuaga? E ese la sou manatu i le tulaga lea. Ua maioio lava le tulaga o le CEO ia i lana role as CEO, ua i ai foi lana ia job description ma e le tatau ona toe aafia tele ia i le tapenaga o mea ia, o ia e tatau ona vaia atoa le Matagaluega ma tulaga uma faapena. Ma e ese la sou manatu i le fautuaga ona o le tulaga lea.

Ona ou oo atu ai lea lau Afioga i le Fofoga Fetalai i ni manatu foi po o ni finagalo na faaalua e sui usufono mamalu. E muamua ona ou tali atu i le sui usufono mo le Itumalo Tu Taulaga i Sisifo le Afioga Faumuina, e tasi lava le mea lea e toe fia faamanatu atu, i le tulaga lava lea na laga mai i le finauga a le SLC ma le LTA, masalo e faavavau faavavau lava amene o fai lava. Ona e i ai lou manatu, o le tulafono lava ua taatia, o ai lava se land owner e faia se sub division, o le tagata foi lea po o le land owner lea e responsible i le faiga o auala, o eletise ma le suavai taumafa. Ae peitai la, o le tulaga lea na laga mai i Falelauniu, e i ai lava lou manatu, e le mafai ona tatou tamau pea i lea faiga faavae, ona e i ai lou vaivaiga, a faapea loa ua oia auala ia e ni pasi laupasese, taxi laupasese ma ni taavale a le mamalu o le atunuu, e i ai lou vaivaiga, o public roads mea nei. Ma e i ai la sou manatu, at the end of the day o le Malo e responsible i tatou auala. O ai lava le Matagaluega e responsible, o le LTA. O lea la a o faafofoga mai le tatou Matagaluega, se i silasila lava i le tulaga lea, aua tou te finau lava i lea tulaga, a ua leaga auala a le atunuu, e tatau ona fai se fuafuaga, ae paga lea lau Afioga i le Fofoga Fetalai, e le o i ai ni tatou tupe ua faaagaga mo ia auala. Ae tatou faamoemoe ia i le tatou Tala o le Tupe lea e lumanai, atonu o le a tele se fesoasoani mai le Afioga i le Minisita o Tupe aemaise foi e i ai miliona ia na saunoa i ai Faumuina, e aumai e fai ai tatou auala pe afai o le tulaga lea. Ia pei o le tulaga lea i le auala lea, ona e tele faifeau ua oo mai ia te au. Ua ou alu foi la vaai i le auala, pei o se auala i mea la e fai ai tuga a Isaraelu ma... ua malepelepe, ia ta te alofa i ai.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ae se i taumafai e toe silasila i tatou tulafono faavae ina ia aveese lea tulaga o mea tau public roads ona o sou manatu vaivai, a uia loa e ni pasi laupasese ma ni taxi laupasese aemaise foi o taavale a le mamalu o le atunuu, ia ua public roads auala nei, ma aveese ai le tulaga lea faapea e tatau ona fai e le SLC latou auala. Na fai e le SLC mai le amataga ona o le tulafono e tatau ona fai e latou auala, a o le faafitauli, e leai se latou maintenance programme, o le mea la lena ua faapea ai lava auala, ae le o aafia i le maintenance programme a le LTA i le taimi nei. O lea se i silasila i ai le Matagaluega aua se fesoasoani mo lea foi vaega o le atunuu, e le gata i Falelauniu, a o le tele o auala i le taulaga ua faaletonu. E pei la o lea na mamafa ai sau faamatalaga i le fautuaga lea e aumai ni inisinia se i taumafai e fai lelei tatou auala ina ia umi ona lelei ma aoga aua le femalagaaiga a le mamalu o le atunuu.

Ona ou oo mai lea i le mataupu lea sa laga mai e le sui usufono mo Vaisigano Nu.1, o le tulaga o le suavai taumafa o le a taatia atu i le Minisita mo le Soifua Maloloina e saunoa i ai po o le a le sao o lea lipoti. A o le tulaga o le vai mai lea sa talosaga mai ai le itumalo, ua faamaonia mai le Matagaluega, e mai le suavai o afioaga ia o Asau, Vaisala ma Auala. O lea la na aumai ai le tatalo a le itumalo, po o le a se faiga talafeagai ina ia maua se faamamaavega i le latou pili vai. Aua e i ai foi lou talitonuga its fair, e tatau ona totogi e latou se pili pe 50% se discount ona e mai le suavai taumafa o lo o taumafa e le itumalo ma o se tulaga foi ua talafeagai, a o lea ua tuu atu le talosaga i le Matagaluega se i silasila i ai latou pe talafeagai. A o lau fautuaga la e ave i ai, ua talafeagai ma e tatau ona fai.

Ona ou oo mai lea i le suavai i le Afioga Tapulesatele le sui usufono mo Vaisigano Nu. 2. O lea ua maua mai le faamaoniga mai le Pulega o le Suavai, e amata kilia le fanua i le vaiaso fou, ona faamoemoe lea a lelei loa le tatou masini vilivai, masalo po o Fepuari e fai ai le galuega ma vili loa, ua uma foi ona fai le suesuega ma saililiga, masalo e tele se suavai e maua mai i ina i lo outou afioaga i Sataua, o le a vili ai se borehole aua la se vaitaumafa mo le itumalo mo se fesoasoani foi a le Itu Asau. O se faamatalaga lena i le tulaga lea, ae pau lava le mea e tatalo atu ai ia outou onosai, ina ia faafoia faafitauli o lo o feagai ma lau Afioga ma le itumalo.

O le vai o Sagone pei ona tatalo mai ai le Afioga i le sui usufono, o le pamu ua le o toe i Sagone, ua leaga le pamuvai lea i Sagone. A o le pamu lea e i Fogasavaii o lo o faaoga e sapalai atu ai le afioaga mo lou silafia. Ae a faapea e le o le tulaga lea, ona toe logo mai lea o au ae se i toe talanoa i le SWA pe sao nei faamatalaga e tuuina mai e tali atu ai i lau Afioga.

O le tulaga lea i tatou vaa....

Tofa Olo Fiti Afoa Vaai: Lau Afioga i le Fofoga Fetalai, faamolemole lava o sina mea laitiiti.

FOFOGA FETALAI: Malie lau Afioga i le Minisita, se i tuu atu lava le avanoa i le faauilavea a le sui usufono mo Salega Sasae.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Tofa Olo Fiti Afoa Vaai: Lau Afioga i le Fofoga Fetalai na ona ou faamanatu atu lava i le Afioga i le Minisita, e lua pamu sa i ina i le itumalo, o le pamu lea e i Fogasavaii ma le pamu lea i Sagone. O le tulaga la e i ai i le taimi nei, ua tau polepole le itumalo foi lea ona na o Fogasavaii lea e sau ai le suavai ia faasopolia i le itumalo, aemaise foi o le itumalo o Palauli Sisifo, e pei o lena ua faaopoopo foi nai aiga o lo o faaaogaina le suavai i le isi pito o le itumalo lea e sosoo ma Salega Sasae.

Ma si mea lava lea e tasi sa ou tatalo atu ai i lau Afioga i le Tala o le Tupe Autu, e mai foi le vai o Salega, sa avatu ai foi se talosaga i luma lava ma totonu o le Palemene lenei, i se tau talafeagai. E pei ona e saunoa i ai i le itumalo o Asau, ae ou te iloa foi e faapena matou.

Ma le agaga faaloalo, faafetai.

FOFOGA FETALAI: Lau Afioga i le Minisita mo le faasaoina o lou taimi na o sau saunoaga lava i le vai o Fasitoota. E lelei nuu ia e maua le vai ae mai, a o Fasitoota, e leai se vai. Na ona e saunoa lava i ai a o la e faafofoga mai le itumalo.

Susuga Hon PAPALIITELE NIKO LEE HANG: E saolele lava le saunoaga a le Fofoga Fetalai, o lea foi e pologa le Afioga i le Fofoga Fetalai e le i maua lava se suavai i lona itumalo i Lepale ma Faleasiuuta, a o lea lava e taumafai le Matagaluega ina ia mafai ona faataunuu atu le suavai taumafa i le afioaga o le Fofoga Fetalai.

Ou te manatu foi o le mataupu lea e laga mai e le sui usufono mo Salega, ona sa ou faapea e le o maua se vai, a o la e maua le vai.

FOFOGA FETALAI: Tulai mai lau Afioga i le Minisita.

Susuga Hon PAPALIITELE NIKO LEE HANG: Faafetai mo le mataupu ua laga mai e le Afioga i le sui usufono mamalu, ma ua faamauina foi le tulaga lea pe a faapea ua tapena foi le Matagaluega o le Suavai e saili se isi punavai i le itumalo o Aeau pe a malie i ai Aeau.

Ona ou oo mai ai lea i le mataupu sa laga e Sulamanaia i le faatupeina o le taavale lea i le finance lease, ma ina ia manino, e le o se rental, o le mea lea o le isi lea ituaiga auala e faatupe ai taavale a le Malo pe a le lava le faasoa, ona le totogia lea i le taimi e tasi, ae totogi faavaitaimi. A leai la le totogi o le finance lease, ona motu mai loa lea o le taavale i le Malo. E pei o le tulaga lea, ae le o se taavale foi lea e alu ai foi se tupe o se rental car e faaoga e le Malo.

O le tulaga lea na saunoa i ai Toomata i le malaga i Savaii lea e faapea e taufetuli toeaia ma loomatutua, talu lava ona ou malaga au i Savaii, o la e savalivali lemu lava le mamalu o le atunuu e le o taufaoina le vaa, o le tulaga lea leaga e taua foi le tulaga lea, ona e i ai lava taimi e pisi ai femalagaiga i Savaii ona manatu ai lea o tatou e tatau ona aumai se isi vaa.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

A uma loa aso pisi kerisimasi lotu tamaiti, ma aso faapena, ona gaogao lava lea o malaga i Savaii. O le tulaga lena e popole ai i le faatopetope mai o se isi vaa, ona aumai foi lea tutu ae le maua ai se tupe foi lele ona e taugata nei mea o vaa e femalagaai ai le atunuu i Upolu ma Savaii. Ae pei o sau lena faamatalaga ona o lea e maitau atu o la e tapena le faaleleia o uafu, o la e tapena le kamupani uafu mo le fanua aua le atunuu femalagaai faapena foi i le uafu lea i Salelologa. O le taimi nei la o lea ua faaleleia tulaga ia, e faapena foi i tatou vaa, o la e maintain lava tatou vaa. E leai se vaa o faaletonu, e fai lava checks ia ia satisfy le laisene lea ia mafai ai ona feoai vaa laupasese i Salafai.

O le mataupu lea sa laga mai e le Afioga Leaana o Safata Sisifo i le kamupani vaa, lea sa fesiligia le faafaigaluegaina o le auvaa sailors i luga o vaa international, sa faapea ai e tasi le kamupani lea e recruit ina a tatou tama ia e aoga e o e faaauvaa vaa ia lau oloa ma meli. E leai, e lua kamupani ia e faatinoa lea galuega. O le Kamupani o le MSG Italia, e 248 sailor o lo o i ai i le taimi nei i le Kamupani lea o le MSG, ia ma le 28 tamaiti ave i malaga, a o le isi kamupani, o le kamupani foi lele o lea e fai nei le tatou joint venture, se i tau sue atu le igoa o le kamupani. E lua la kamupani lea e faaoga e tatou e recruit ai a tatou auvaa ia e koleni atu i inei e faaoga ai ia avanoa ia. Ae ona o avanoa e maua, o avanoa foi na e faatumu e o tatou tagata. O lo o tele foi le lisi faatali, ae ua agavaa foi ia tatou alo ma fanau o lo o tapena e sauni i avanoa e tulai mai ma faatumu atu avanoa ia. O le Neutron le kamupani lea uai

Afioga Leaana Ronnie Posini: Lau Afioga i le Fofoga Fetalai

FOFOGA FETALAI: Tulai mai le sui usufono mo Safata Sasae.

Afioga Leaana Ronnie Posini: Faafetai tele i le Minisita i lana mataupu lea aua sa ou laga. E moni lelei le Afioga i le Minisita, ae pei o le sailiga sa ou saili i ai, ona ou te maitau, o le tele ia o Kamupani Vaa Faava o Malo i fafo. A o lea la ua saunoa le Minisita na o le lua ia kamupani o lo o agai i ai a tatou tamaiti. Ae manatua foi lau Afioga e pei ona ou fai atu o lea e faitau selau ma ona tupu tamaiti e iu mai i lea tausaga ma lea tausaga i tausaga taitasi. A o lea e tau maitau atu na o le luaselau ma ona tupu a tatou tamaiti. Ae ou te talitonu e tasi lea tamaoaiga o le tatou atunuu, aemaise aiga. O le ala foi lea i lau tausailiga, mo le faatuina o se iuni a tagata o i ai agavaa faapitua, e amanaia mai ai e atunuu mamao mai fafo, ia ona tatala mai lea o le avanoa. Ae faafetai tele i lau Afioga i le Minisita mo le faamalamalamaga, faafetai.

Susuga Hon PAPALIITELE NIKO LEE HANG: Masalo e sao lelei le saunoaga a le sui usufono mamalu. E tele kamupani, ae lua lava kamupani ia ua fai ma o tatou faipaaga ona o avanoa. E le faigofie foi ona tapena i tatou i nisi o kamupani e le o faipaaga i tatou i le taimi nei.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Ae a silasila i ai e pei ona ou faamatalaina atu, e tele le lisi faatali lea e i ai. Ae ana maua nisi kamupani e le mafai ona taofiofia kamupani e ave pea i ai a tatou alo ma fanau o agavaa e o e fai lea auunaga, ma maua mai ai tupe, e le gata mo i latou o aiga aemaise lo tatou atunuu. O le tulaga lea na talosaga ai se organization, atonu o le matafaioi lava lea i auvaa. E fai lava e latou se latou faalapotopotoga faapea pe a finagalo latou i ai. Ae e le mafai ona faia e le Kamupani Vaa ia tulaga faapea e alu ai foi isi tupe.

Lau Afioga i le Fofoga Fetalai, masalo na ona pau ia o mataupu sa laga ma fesiligia ai le Matagaluega e sui mamalu, atonu foi ua...

Afioga Leana Ronnie Posini: Lau Afioga i le Fofoga Fetalai....

FOFOGA FETALAI: Lau Afioga i le Minisita, se i toe tuu atu lava le avanoa i le sui usufono mo Safata Sisifo. Tulai mai le sui usufono.

Afioga Leana Ronnie Posini: Faafetai tele i lau Afioga. E tasi lea mea o lea ua faaiuiu le saunoaga a le Afioga i le Minisita, e leai o le aoga foi lea sa ou taua o lea e faatino e le Kamupani Vaa lea a tatou, Samoa Shipping Corporation. E i ai le latou aoga faa-Sailor lea e fai. A o lau fautuaga na tuu atu i ai, e a pe a tuu le tatou aoga lea, o lea ua i ai la tatou Aoga Faava-o-Malo lea e fai i le NUS, e faasao ai foi nisi tupe a le Faalapotopotoga o Kamupani Vaa.

Ma le agaga faaloalo, faafetai.

Susuga Hon PAPALITELE NIKO LEE HANG: E faamalie atu i le sui mamalu ua galo ia te au, ua pau ia te au le fesili lea. E sao, e fai lava le aoga a le Kamupani Vaa e train ai ia local sailors, e faaauvaa ai a tatou vaa ia e femalagaai i Tutuila ma Savaii. A o isi trainings ia e fai i le Maritime, mo vaega lea e agavaa mo International Vessels, o le tulaga lena. Ae atonu se i toe talanoa pea i le Faalapotopotoga po o le a le tulaga ina ia mafai ona tuu faatasi, ina ia faasao tupe faasao ai foi resources e faaogaina. Ae faafetai mo le fautuaga.

O le isi tulaga lau Afioga pe e tele i lauga a sui usufono mamalu o auala. Pau lava le tatalo, tatou onosai, maumau pe ana tele ni tatou tupe e fai uma lava lava tatou auala. Na alu le asiasiga a lau Matagaluega, matou o fai le asiasiga i Upolu ma Savaii, e tele lava le seleni e manaomia, e faalelei uma ai o tatou auala. E faamalulu atu ai ma tatalo atu i le Afioga i sui usufono mamalu ua ia te au ia talosaga, ia tatou onosai, o lenei lava e le i oo atu lava se faasologa, o lea lava e tau tapenapena atu lava se tupe e totoe mai mo le faaleleia o tatou auala i le taimi nei. Ae maua loa se seleni ona faasoa atu loa lea, e manatu foi e tele lava ia manaoga, e anoanoai manaoga o itumalo i mea tau auala.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

A o le faafitauli lava, e le o lava se tatou seleni, ae tatalo i le Afioga i le Minisita o Tupe, ia se i tau faatele mai sina tupe i le isi paketi ina ia faamalieina ai finagalo o sui usufono mamalu o le Palemene, aua o lauga lava ia e fai i tausaga uma i le paketi, o auala o auala, ia o le tali lava lena. A le aumaia lava se tupe e le Minisita o Tupe e fai ai, ia e leai lava ni a tatou auala e faia.

Ma le faaaloalo tele i lau Afioga.

FOFOGA FETALAI: Ua oo mai le faasologa i le Afioga i le Minista mo Tagata Tafafao Maimoa Mai Fafo.

Afioga Hon SALA FATA LISATI PINATI (Minisita mo Tagata Tafafao Maimoa Mai Fafo): E faafetai atu i lau Afioga i le Fofoga Fetalai, ou te faatalofa atu foi i lau Afioga faapea foi le Palemia ma le Sui Palemia, le Kapeneta, Minisita Lagolago faapea le mamalu o sui usufono o le Palemene o Samoa. O lou tulai atu, ia e mamao lava lou nei tagata mai manaoga o itumalo eseese.

Ae avea ai lenei taimi e momoli atu ai le agaga o le faafetai, ma faafetai atu i le Komiti sa faapea ona latou talanoaina mataupu lea ua faapea ona i le Maota i faamasino ma i latou. Ou te faafetai atu foi i le Kapeneta aemaise le Palemia. Ou te manatu o le Atua o le Atua pule, o le Atua fai mea silisili, o le Atua e fai mea tonu. E i ai se manatu mai ia tausaga ua tuanai, ua tatou aulia mai lenei tausaga e le o mavae le agalelei o le Atua. E lagona le faafetai, aua e afua mai mauga manuia. Ou te faafetai ai i le taitaiga, le tapuaiga a Ekalesia e fia a Samoa, aemaise le taitaiga o le Malo e lau Afioga i le Palemia. O nei lava mea uma, e atagia ai le manuia o Samoa ona o le taitaiga. Ou te le selu atu foi, ae ia te au lava le ava ma le migao ou te faapea atu ai. Le Atua e pulepule tetele ia faapea ona e faamanuia mai i le Maota o Samoa, faamanuia foi isi o matou itumalo faapea ona tapuai mai, isi ou toalua o Peseta faapea foi le fanau ma le aiga, malo faafetai. Ou te faafetai atu foi i e sa lagolagoina lou nei tagata, mo lo outou silafia, ua na o se auauna faatauvaa. Ou te tu atu lava ae o au o Ae. O le a lava se mea ou te taumafai i ai, ou te faia lava ma le tonu. O lena foi ua outou silafia le agaga o lenei tagata. E lelei lava le motu o le pa ae ua outou silafia. O se taimi ua mavae sa ou faapea atu ai aemaise oe le tina o le aiga ma le fanau, ia faafetai i le Atua ua tatou aulia mai le tolu lenei o Paeaiga a o ou saofai mai i le tofi. O le ala lea e faaleo atu ai se lagona, o le toe taumafai atu lea i lenei lima tausaga, a maea ona ou faasee tuagalu lea ae tuu atu le tatou tofi o le tatou itumalo e filifili ai se e agavaa, aua le tautuaina o Samoa.

Ma e faauma atu ai se manatu, o le taimi lenei o le tagata ua i ai le lagona e fia tautua. O lau tautua o le taimi lenei, e te aumaia le suafa i totonu o le tatou itumalo. Fai mai le aumatutua, fili se ua mago, ua lava lana tautua. O i ina o le a tatou maua ai le agai i luma ma le sologa lelei o le tatou faiganuu.

Ia manuia Samoa ia manuia foi le tapuaiga a le Maota. Soifua ma ia manuia.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

FOFOGA FETALAI: Malo faafetai saunoa i lau Afioga i le Minisita. Ma ua oo mai le faasologa i lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai, le paia ma le mamalu o sui usufono a le Fonousu a le Fono Aoaofaitulafono a Samoa. O ou paia ma sa ma faiga, ua taoto faamaene o alititai. E talitonu o lea ua maea ona paelago ma e le toe faamatieina foi e sou leo faatauvaa. Ae ua i ai le lagona, o le a papaave loa ma sosoo le fau ma le fau i le faasologa o le matou matafaioi O le tali atu lea i mataupu o lea sa laga e sui usufono mamalu o le tatou Palemene.

Lau Afioga i le Fofoga Fetalai, ou te lagona lava ma le agaga faafetai tulaga o taualumaga o lenei Fonotaga, aemaise o le taitaiga malu a lau Afioga o lo o mamalu ai taualumaga o lenei Fonotaga. Peitai e poto lava le tautai, ae le atoa ia o lona sa. E i ai foi taimi e naunauta ai sui usufono mamalu, ona laaloa foi lea o se faamatalaga po o tulaga e solia ai le tatou va tapuia ma le tatou va taus. O le lagona lava o lenei sui usufono, e tatou te galulue felagolagomai ma e faatino foi le tatou galuega i le vafealoai ma le va-fetausiai. Peitai e momoe lava ma manu ae sau mala e atiae, e lama pea foi le fili, e lele lava le se ae lama le tiotala. E le atoa foi lagona i aso faapenei ona e le moe lava le fili. O le ala foi lea, tatou te folau lava ma le faaeteete ina ne i afaina le tatou faigamalaga ma o tatou faamoemoega i le malosi o le faaosoosoga a le tiapolo.

Ou te manatu lau Afioga o lenei taeao i le faalogologo, e momoli atu le faafetai tele i le tatou Palemene, o manatu faaalia ma saunoaga e molimoli ai foi finagalo ma manaoga o le itumalo. Atonu o lea ua uma ona saunoa nisi o uso a Minisita, e le faamalieina foi ia le tofa i le mamalu o le tatou Palemene i se tapenaga e matou te saunia. Aua e le mafai ona gafataulimaina i se aso se tasi ia galuega o se lima tausaga.

Ae o le a agai tonu lava lau o le fo ma agi faasulu foi se lagona i lenei taeao, i mataupu o lea sa laga e aafia ai lenei Matagaluega. O le mataupu lea i le tulaga o lea ua uma ona saunoa le Afioga i le Minisita mo Galuega Tetele a le Malo e aafia ai ma le Matagaluega o le Suavai. E pei lava o le tele o isi galuega a le Malo e galulue felagolagomai ma galulue faatasi, o lea sa fefaloai faapautolo a loi i le taeao nei, e tusa ai ma le saunoaga a le sui usufono o lo o aafia i tulaga o faaletonu o le suavai. Po o le fea tonu le Matagaluega o lea e feagai ma lana mataupu. O lea foi ua saunoa le Afioga i le Minisita, o lea ua lafo mai ia te au le tulaga lea i le quality o le vai. Aua o le mea moni lava, o lea ua maioio foi ia matafaioi ia a Matagaluega, o le vaega o le Suavai e nafa lea ma le tapenaina o le suavai ma le aumaia o le suavai mai le nofoaga o lo o maua ai le vai, seia oo atu i aiga taitasi o lo o faaogaina le vai.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O matafaioi a le Matagaluega a le Soifua Maloloina. O le tilotilo lea po o saogalemu le vai lea o lo o pamu mai pe momoliina mai i aiga taitasi e le Matagaluega o le Suavai. A mataituina se faaletonu o galuega ia, ona fautuaina lea o le Matagaluega a le Suavai, e fai se galuega e foia ai le faafitauli lea. O le faafitauli la lea e tulai mai i le suavai lea ua maua ai siama i totonu o le vai, ma o siama ia e ono afaina ai le soifua maloloina o e o lo o latou faaaogaina le vai. Ua uma ona faaalua e le Matagaluega i le itumalo e ala i le latou sui usufono, faapea foi le vaega o le vai o lo o feagai ma tulaga ia, ma ave i ai fautuaga i le tulaga e ono foia ai faafitauli lea. A o le i oo atu la sau faamatalaga i le foia o le faafitauli lea, e ao lava ona fesili. O fea e sau ai le siama? E pei ona mautinoa o vai ia o lo o pamu mai o vai ia o lo o faaaoga i le itumalo lea, o boreholes po o vai o lea e vili i lalo i le manava o le eleele ona pamu mai lea ma tufa atu i aiga latou te faaaogaina. E faapefea ona oo siama i lalo i le mea o lo tafe ane ai le vai? Po o le siama e aumai i le vaega e ulufale ai le vai i le paipa, po o le siama e mafua ona o le vaega e ulufafo ai le vai mai le paipa. Most likely, i lou talitonuga, o le vai e sau mai totonu o le vai lea e avane i luga e le paipa. O le fesili la lena, o fea la e omai ai ia siama? A o ai na tuua i ai ia siama i totonu i i? O le talitonuga lautele lava, o lea ua outou silasila nei, o lea ua faagasolo le polokalame lea e i ai le polokalame lea e faagasolo nei e le Malo, e aumai mai totonu o tatou lava. O le siama lea e maua mai i totonu o le tagata i otaota lafoai ma tulaga faapena ma manu tataa, ae ulufia le palapala ma oo atu ai i le mea o lo o tafe ane ai le suavai. O le a la e faapefea ona oo i ai? E tasi lava le faamatalaga o ia mea, o le polokalame lea .

FOFOGA FETALAI: Lau Afioga i le Minisita, se i tuu atu le avanoa i le sui usufono mo Vaisigano Nu. 1 faamolemole.

Tofa Lopaoo Natanielu Mua: Faafetai lava i le folasaga a lau Afioga, o lea ua ou vaavaai atu o lea foi ua alo la outou Matagaluega ma le mea e tatau ona fai. O le uiga o lau faamatalaga, na talosagaina e lou sui usufono se suesuega e fai ia Novema, ou tulituli atua le suesuega, ae maua mai le tali. O le mafuaaga na ou manao ai e fai le suesuega, ona o lea ou te iloa e mai le vai, e fia ave sau talosaga i le Afioga i le Minisita e tau tuutuu ifo i lalo le tofoga. Ae peitai ane, e o atu la outou Matagaluega e le i test ina mo le salinity level, ae na test ae maua ai le siama, o latou la lea na omai tau mai ia te au le siama. Ona ou fai atu lea, o le a la outou mea ua fai? Ona ou vaai lea i le imeli ma le fautuaga a i latou na suesuea, e tatau ona i ai se tatou faasalalauga e fai. Ona ou alu lea o au matou galulue ma le matou pulenuu ma tulaga faapea, ona fai lea o le matou manu i totonu o le afioaga. E faapuna le vai, ae sa talosagaina pea le Matagaluega, e fai se isi suesuega mautu. Fai nisi suesuega e fia iloa pe a faapea e i ai ni gasegase e tutupu mai i le siama lea. O le a? A o le a foi le fofoga?

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Lau Afioga i le Fofoga Fetalai, e oo mai i le taimi nei, e leai se mea o faia, nofonofono le Matagaluega a le Suavai. E pei ona fai atu lau faamatalaga i le amataga ia oulua Afioga i Minisita, e le o se mea lea e fai e lau Afioga, o le mea lava e tatau lava ona o e fai, e tupu loa le mea, o loa e vaai. Ua ou fiu lava e vaavaai mai i le vaitaimi o aso fiafia, se i vaavaai pe o atu aua e lagona e tagata i tua se lagona faagaetia pe a vaai mai, ua sii atu le fala siigata i le Matagaluega se i vaavaai po o le a le mea lea e tupu. E leai ma se mea na faia. E i ai le manatu foi lele lau Afioga, o le mea foi lena, afai foi ua tetele atu sau faamataga. E leaga o le soifua ma le ola o le itumalo lenei.

Lau Afioga i le Minisita ma lau Afioga i le Fofoga Fetalai e pei ona fai atu, e le faaeteete alo o lou itumalo. Ou te manatu foi lau Afioga, e faapena foi ona outou faaeteete i ai. O le ala lea lau Afioga e mamafa ai ia te au le tulaga lea. E toafa tamaiti o lo matou nuu, same age e maua i le cancer o le manava. Ou te le fai atu, o le mafuaaga lea. O le isi na maliu i le weekend lea na tea atu nei, tasi la e Niu Sila i lalo o le polokalame a lau Afioga, o le isi ua foi mai, o le isi la e sauni mai le talosaga. A o le uiga o lau faamatalaga, alofagia e le Matagaluega ma lau Afioga pe fai se suesuega ne i te i, ou te le o faapea ua ou tuuaia le vai, ae silasila pea ma vaavaai lau Afioga ma le Matagaluega, pe mata e ono i ai se fesootaiga ma mai nei.

Ma le faaaloalo lau Afioga.

FOFOGA FETALAI: Malo. Faaauau le saunoaga a le Minisita.

Afioga Hon TUITAMA TALALELEI TUITAMA: Faafetai lava mo le saunoaga a le sui usufono. O lea lava e matau atu o le mea lava e tasi. E pei lava ona ou fai atu, ua ala ona ou asiasi i le tulaga leaga o lea ua sii lau ta, ua tau foi lau ta. O le saunoaga i le taeao lenei, e le logomalie i Matagaluega uma e lua lea sa faafofoga, e ui lava ina faalautele lau saunoaga, a o lea ua aafia le afaigaluega, latou e faatinoa le galuega. O le ala lea, e tatau ona faamanino le mataupu leaga o lea e le o atoatoa lou silafia. O le aso 12 na faafesootai ai e oe le Matagaluega, 14 o Tesema na o ai le Matagaluega test le vai, aso 16 oo atu le lipoti ia te oe. O lea lava na fesootai lava outou ma le Matagaluega. O lea ua ou taumafai e faamalamalama. O lea ua ou matau atu nei, ua le gata i le salinity a o le contamination isi mea. O lea ou te concentrate i le contamination, aua foi o le salinity, its not our problem. E leai se faiga a matou e faamagalalo ai se vai ua mai. E le mafai e le Matagaluega, e le se matafaioi a le Matagaluega ona o e faasuka se vai ia alu ese le oona. E leai o le Matagaluega lena a le Suavai e o e vaai po o le a le mea ua ala ai ona mai le vai. Ae e le faia e le Matagaluega a le Soifua Maloloina le galuega lena. O lea ou te talanoa i le siama lea e i totonu i i, o le matou matafaioi lena.

FOFOGA FETALAI: Malie le Minisita, se i toe tuu atu le avanoa ona o le tulaga o le tiga i le fia taumafa vai.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Tofa Lopao Natanielu Mua: Faafetai atu i lau Afioga i le Fofoga Fetalai ma le mamalu o le Maota nei, ou te le o tuuaia le Matagaluega i le mai o le vai. O la e manino lelei le faamatalaga lea e fai atu. Ou te le o tuuaia le Matagaluega ae ou te tuuaia le Matagaluega i le le faia o le galuega e tatau ona fai. Aua a faapea foi o tiga le Matagaluega, sala tiga, aua o la e nofonofo e leai se mea o faia. O la e faafofoga mai lou itumalo, o la e nofonofo e leai se mea o faia. Ana saunoa mai nei lau Afioga o la ua i ai se tulaga ua fai, semeamanu e toe faafoi mai au upu ia na fai atu.

Lau Afioga, e tele lou faaaloalo i lau Afioga o le mea foi lena na ou taumafai atu ai, ae peitai e i ai lava le manatu, o le tatou Matagaluega a le tatou Malo, o le mea foi lena e tuuaia ai le tatou Malo i le tele o mea ia e fai a o lea tatou te faia galuega lelei.

Ma le faaaloalo lau Afioga e fesoasoani atu ai i le mataupu lea.

Afioga Hon TUITAMA TALALELEI TUITAMA: Lau Afioga i le Fofoga Fetalai ona o lea e fai ma faalavelave mai le sui usufono. Ae o lea ou te agai i le mea lea o lea e faamatala le galuega a le Matagaluega lea e fai. E le mafai ona uma faamatalaga pe afai e fai ma faalavelave pea ma faalavelave pea.

Lau Afioga o le siama lea ua tuuaia e tupu ai le cancer o le manava ma mea faapena. O lea o le a faaaauu lau tala i le siama. E pei ona ou fai atu, o le siama lea e le te i te i ulufale i i. O le a le mea ua ulufale ai le siama lea? O le polokalame lea ua agai i ai lo tatou Malo, ma isi Faalapotopotoga lea e fesoasoani mai ia tatou, o lea ua aumai tali, septic tanks plastic septic tanks, e malupuipua e le mama. O le masaloga, o le source lea o le contamination o tatou vai lea e tatafe i lalo, ona o le mama o a tatou tane sima ia e fai, e le malupuipua ona fai. Aua a lulu le mafuie nuti le tane lea e i lalo, e leai lava se isi e iloa atu le mama la e mama ai i lalo, seep through i le soil, contaminate le suavai e ala mai ai le suavai. O lea ua uma ona identify e le Matagaluega, o lo o contaminate le vai. O lea la ua uma ona tau ia i latou e faia le galuega lea. Fai le galuega lea. Silasila i le tusi lena na avatu ia te oe i le aso 16, o le lua fesootaiga ma le Pule Sili, o lo o avatu ai le recommendation, aua e tasi lava le recommendations a le Matagaluega e cure uma ai mea uma, tapuni le vai, aua le toe faaaogaina le vai. Ailoga e fiafia lo outou itumalo i lena mea? O lea la ua avatu le provision e mafai ai ona faaoga le vai, ina ia faapuna le suavai.

Tofa Lopao Natanielu Mua: E pei e taufaafefe le saunoaga a le Afioga i le Minisita.

Afioga Hon TUITAMA TALALELEI TUITAMA: O lea lava e fai le galuega a le Matagaluega. Faapuna le suavai. O lona luaf

FOFOGA FETALAI: Malie lava le sui usufono, onosai mai se i tau faamaea....

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Afioga Hon TUITAMA TALALELEI TUITAMA: Onosai mai se i faauma atu, a uma atu lava ua e malamalama.

Tofa Lopao Natanielu Mua: E irresponsible! O lea e fia fai atu sou manatu.

Afioga Hon TUITAMA TALALELEI TUITAMA: E le taulia le aso ae taulia le aao lea e avatu.

Tofa Lopao Natanielu Mua: A outou feita ona outou oso lea faapena. E le faapena, o se mea e lelei mo le tatou atunuu.

Afioga Hon TUITAMA TALALELEI TUITAMA: Lau Afioga i le Fofoga Fetalai, ua soli fono tele. E avatu se poloaiga e ave ai i fafo.

FOFOGA FETALAI: Ua ou faaaloalo atu, tulou i sala le gagana o se upu e to i le tagata, lau Afioga i le Minisita, o oulua ma le sui usufono mo Vaisigano Nu. 1, e faitau i ai le aumatutua ua sinasina o oulua lauao, ua tele foi ina tau leai ni o oulua lauao e faailoa ai le matutua ua ia te oulua.

Ona faapea lea, e leai e tau faamalie pea o oulua finagalo, ae masalo o lea ua malamalama le mataupu. Ae faamalie atu i le sui usufono mo Vaisigano Nu. 1, o le a lafo ia i le Minisita, ae ia alofa le Minisita se i silasila ma feutagai ma le isi Minisita ina ia vave foia le faafitauli, faafetai.

Afioga Hon TUITAMA TALALELEI TUITAMA: Lau Afioga i le Fofoga Fetalai, e tau ne lava pe a e saunoa i le sina, e tolu ituaiga sina lea sa define e le tamaloa foi lea o Tupuivao, ta te musu la e tolaulau atu, ae pau lava lata tala e fai atu, o lota ita sina, o le sina matua.

Lau Afioga i le Fofoga Fetalai, o le a taatia ia faapea, o lea ua uma ona vave le fautuaga a le Matagaluega leaga o lea ua tuuaia le Matagaluega e le i faia se galuega. Ae manatua foi, o mea ia e le o faapea foi lea alu e ati mai le afi, ona e alu lea ati mai le afi. O mea ia e i ai planning e fai, o lea ua lafo i le Matagaluega e ona le galuega ma ave i ai ma suggestion ma fautuaga e faapea ona foia le faafitauli lea i i, o la e galulue i ai, e le gata e galulue e source mai funds e faatino ai, a o le auala foi e fai ai, e involve inisinia aua e toe fai atoa le environment, o lea e involve atoa le distance e le na o se vaega se tasi o le nuu.

Ia o le ala lea lau Afioga, ae o le a ou see ese ma le tulaga lea, ae avanoa pea le Afioga i le sui usufono pei lava ona maua isi ona avanoa e asiasi atu ai ma faatalatalanoa le mataupu pe a fia maua pea se isi faamalamalama. Ae finagalo malie foi, o le a se taumafaiga e faamalamalama lau mataupu, o lea ua agai lava i le aa o le muia o le faafitauli, ina ia manino ai le mata o le vai e tusa ai ma lenei mataupu ne i aveseina ia galuega faatino a le afaigaluega, a o la foi e naunau latou, to do their best mo le Malo ma le tautuaina o ona tagata.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Lau Afioga o le vaega lea i falemai i tua, o le faamoemoega lava lea o le a silafia e le tatou Palemene ma le tatou atunuu ia fuafuaga alualu i luma a le Matagaluega, o lea ua toe fetuunai ai le faatinoga o le tatou galuega ina ia aapa atu i nuu i tua ma vaega i tua o le tatou atunuu, e taofia ia le faatupulaia o gasegase ma ia foia ai i tua e faatau lalata i o latou maota ma laoa, ma o latou nuu, nai lo le tau tulituliloa mai o le falemai tele i Apia ma Tuasivi, ia ma motusia ai foi mafutaga ma aiga ma fanau. O le agaga la lea, i le tulaga i Safotu, o le tasi lenei falemai ma lenei itumalo, e le o motusia i le vaaiga a le tatou Matagaluega, ona o le tasi lenei o itumalo e matua lagolago malosi i galuega faatino a le Matagaluega. E le o galo i le Matagaluega le tele o le sao o lenei foi itumalo i latou galuega faatino.

E faalua ona ou asiasi i tausaga i Savaii. O lau asiasiga talu ai, ou te taunuu atu o la e i ai le fomai, tumutumu lava tagata i totonu o le falemai, manaia foi mea uma, gaoioiga a tamaitai fomai. Mo le silafia, lea sa saunoa le isi sui usufono nei le taeao, o lea sa i ai le taumafaiga a le Malo i le tulaga foi lele o le connectivity o central services ma peripheral services, ina ia mafai ona talanoa mai ia le tagata i Savaii iinei e faapena foi i fomai, talanoa mai le mai i o i le fomai lea iinei Motootua, pe a leai, o lenei le service, lea ua faatino i le taimi lenei. Afai o le a se silasila a le sui usufono i le tulaga sa i ai Safotu, o lea e foliga mai, o lo o faatino e le teine tasi soifua ia gaoioiga o le faatinoga o togafitiga ua uma ona fesootai le tasi soifua i le fomai i Apia, po o Tuasivi e avatu ai le faatonuga. E le mafai ona faia se faatonuga, mo le silafia o mea ia o antibiotics, e le mafai ona faaoga e tasi soifua, se i vagana ua avatu i ai le faatagaga ma le fautuaga a le fomai, ave i ai le vailaau lenei, po o le tui lenei e ave e faaoga pe a uma ona faamatala mai le mai. Ia o le agaga lea, e tele foi ina le silafia e lo tatou atunuu, ae o le mea lenei lea e tupu. E 3 fesootaiga lenei e i ai, o le telefoni, o le mea foi lele o le uaealesi, ia ma komepiuta e imeli mai ai, o la e functional uma mea na e omai ai agai i i e connect mai ai i le fomai e avatu ai le fautuaga.

E faapea foi la le tulaga i le tatou falemai lea faaitumalo i Saanapu, ia o lea foi sa taua, o le agaga foi lenei o lo o i ai i le tatou Matagaluega...

Afioga Faaulusau Rosa Duffy-Stowers: Lau Afioga i le Fofoga Fetalai pe maua se avanoa?

FOFOGA FETALAI: Ia malie le Minisita, se i tulai mai le sui usufono mo le faauilavea, le sui usufono mo Gagaifomauga Nu .3.

Afioga Faaulusau Rosa Duffy-Stowers: Faafetai lava i lau Afioga i le Fofoga Fetalai mo le avanoa.

E leai lau Afioga i le Minisita, ia ou te talitonu ai po o le taimi lenei na i ai le fomai, ona o la ua silafia e le fomai o lea o le a afio atu lau Afioga i le falemai lea.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ia ma le lona lua foi o mea e pei ona e saunoa i ai, leai na ona, o le tuualalo lava. O le tuualalo lava, o lea ou te talitonu lava o lena lava e fai ma faatino galuega a le Matagaluega ae tau lava na ona faataatia atu i ina, e le o i ai se computer, e le o i ai lava ma ni na mea o i ai i o, o la e taumafai lava nai teine ia ona ua fai mai teine, ua tau leai lava ni fomai i Savaii. Ae lelei foi lava ua afea le vaega lea, e faailo ai le tulaga lea aua e leai lava ma ni fomai o toe i ai i Savaii, pe na o se toatasi ea, a toatele ua toalua. Ia a o le motu atoa o Salafai lea e aafia i i le vaega lea. Ia ae na o le tuutuu atu lava faapena i lau Afioga i le Minisita, ia ae te i ua oso ai se toto maualuga o se isi.

Ma lou faaaloalo faafetai.

Tofa Olo Fiti Afoa Vaai: Lau Afioga i le Minisita, ia na o le fesili atu lava leaga e pei e fou i lau faalogologo le mea lea o le talanoa atu o le fomai i le teine tausi ma fai ia vailaau e fai. Po o mafai e le talanoa lea ona connect ai le mea faalogo lea e faalogo ai le mai la e i o i Safotu? O faalogo atu le fomai i le tata o le fatu a le mai lea i o i Safotu, faamolemole? Faafetai.

FOFOGA FETALAI: E fautuaina e le Nofoa lau Afioga i le Minisita e aua le talia le fesili lea o le fesili fou, ae saunoa ae i le sui usufono lena mo Gagafomauga Nu. 3. Saunoa lau Afioga i le Minisita.

Afioga Hon TUITAMA TALALELEI TUITAMA: Lau Afioga i le Fofoga Fetalai, e leai foi sou agaga e tali lea fesili faavalevlea faapea. Ia ae e....

Tofa Olo Fiti Afoa Vaai: Lau Afioga i le Fofoga Fetalai, leai e le faavalevlea le fesili, e faavalevlea le faamatalaga la e aumai e le Minisita. O fea ni mai e prescribe atu iinei e le Doctor le mai la e i Safotu.

FOFOGA FETALAI: E faamalulu atu i le sui usufono mamalu, leaga e le o oe o se fomai. O lea e saunoa atu le fomai, ae o lea ua e tetee i le finagalo o le fomai.

Tofa Olo Fiti Afoa Vaai: O lea ou te fia faamalamalama, pe i ai se mea faalogo e tuu ai le uaea o lana telefoni e faalogo ai le tata o le fatu o le mai i Safotu.

FOFOGA FETALAI: O lea e saunoa atu le Minisita, aua o le Minisita o le fomai e sao, ia ona tatou talitonu lava lea e sao, aua e le o oe o se fomai, ae tulai mai lau Afioga e faaauau mai..

Afioga Hon TUITAMA TALALELEI TUITAMA: Ia e faamalulu atu i le sui usufono, e te le i sau iinei e te aoga faafomai ai. A e fia fomai ona e alu lea i fafo i le iunivesite.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Ia lau Afioga i le Fofoga Fetalai, o le tulaga la lea o lo o faagasolo i ai ia tatou polokalame, o le soifua maloloina ina ia mafai ona toe faatupulaia ia le fesoasoani lea, ona pau lea o le auala e ogatasi ai ia fuafuaga fai agai i luma ma le polokalame lea o lo o faagasolo nei, lea o lo o lagolago mai i ai ia le faalapotopotoga o le soifua maloloina o le lalolagi. Ae pei ua agiga soo foi i totonu o lenei Maota, o le pe a faasamoa, po o le tauaveina lea o le galuega e faaaogaina ai le tatou agaifanua ma le aganuu ma faalapotopotoga o nuu ma afioaga i tua.

Ia lau Afioga i le Fofoga Fetalai, ona ou oo mai lea i le faafesili lea a si ou uso lea i Vaimauga Sasae, ia o lea na taua ai le tulaga foi lea o a tatou gasegase e avatu i fafo. Ia ma le faaaloalo lava, o lea tulaga masalo o le faaaliga lea na ou talanoa i totonu o le Palemene. Ia ae le faitioina foi le uso lea sa fesiligia, leaga o lea e fou mai i le Palemene, e le i faalogo i ai i lea tulaga, a o le mea lea, e le fou. Ua uma ona, o le ogasami lea ua uma ona asa muamua ia ae le augata e toe alo foi lea tulaga, pe afai lava o finagalo i ai le sui usufono mo sona malamalama.

O le tamalii lea saí .

Afioga Sulamanaia Fetaiai Tauiliili Tuivasa: Lau Afioga i le Fofoga o le Fono pe maua se avanoa?

FOFOGA FETALAI: Ia o lea e tau tali atu lau mataupu ae o lenei ua e tulai mai.

Afioga Sulamanaia Fetaiai Tauiliili Tuivasa: O lea ua uma ona tali mai, ae pei e tuuaia lou fou, ia e le fou le Nofoa o le Vaimauga Sasae. Ia ae pei o le tulaga na avatu ai o le faaaogaina o tamalii o le atunuu i fomai i fafo. Aua e ala la ona ou talanoa atu, ona e leai se follow up o mai ia e ave i fafo. A avatu lava i fafo, uma taotoga aumai iinei, foeti ai lava, e le mafai ona toe o e fai ni follow up, po o le a? O le lagona lenei na ala ai ona tuuina atu se tuualalo pe sa fai se galuega a le tamalii lea i le Initia lea e faatoai i ai mai. Aua o le tulaga sa ou fesili ai, a avatu le mai iinei i le lipoti a tatou i le falemai mo le tuuina atu i fafo, e avatu i fafo, ae tali mai i o, leai, taatia pea i ina e faatalitali oti, ona o le a? Pei o le mea lenei lea e avatu ai sou manatu, pe mafai ona toe silasila i ai e toe iloilo le fomai lea e faatau i ai le tulaga lea. Ae le fou le Nofoa o le Vaimauga faamolemole lau Afioga i le Minisita.

FOFOGA FETALAI: Tulai mai lau Afioga i le Minisita e faaauau le saunoaga.

Afioga Hon TUITAMA TALALELEI TUITAMA: Faafetai i lau Afioga i le Fofoga Fetalai mo le avanoa o le uso, leai e le suia ai lava le fou o le sui usufono i le Maota, ae o le Nofoa lava ia ua leva.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Lau Afioga, o le tamalii lea o lo o taua, o le Afioga ia Papalii, Papalii Benjamin. Mo lou silafia, o le matai Samoa, lea o lo o galue mo Samoa. Na te faia le galuega lea, e fesootai ai tatou ma specialist i fafo ina ia agai tonu atu ia tatou mai, o lea la ua tapena uma ia mea uma, falemai, taimi o taotoga, taimi e vaai ai, ia aua ne i tele se taimi o tatou tagata e o atu i inei, e o atu toe faatalitali e pei o le mea lea na i ai muamua. E o atu o nofonofo ma faatalitali se i maua se avanoa e vaai ai pe maua se avanoa e fai ai le taotoga. O le fesootaiga lea, o lea o lo o faigofie ai ona maua avanoa, e avatu loa tatou mai i inei, e priority lava i nisi, e avatu loa, fai loa taotoga, vave le taimi e toe foi mai ai a tatou gasegase, ma le iloa o la e queue ia mai faapea, taotoga o fatu ma isi mai faigata i Niu Sila. O la e fai le queue, e o agai e fai ni avanoa e fai ai o latou taotoga, a o lea ua aumai le faamuamua i ai tatou, ona o le fesootaiga lea. O le isi la vaega o lea e taua faapea, ia o lea lava e tausisi pe ana i ai se tagata o tatou i o e faia. E ui lava ina ou tau atu, e le pau lea o le tagata o tatou o le matai lea. O le matai na fai e le Afioga i Le Ao o le Malo, i Lana Afioga Malietoa. Ia ma le isi tulaga e faamanino atu pea mo le silafia, e le i gata ai lana fesoasoani i o. E tusa ua oo nei i le 200 moega lea e auai mai, faasolosolo mai o le aisiga na alu i ai, lea e galue le tamalii lea, e lau mai moega, ua 200 moega. Ua uma ona taunuu mai faamalu e 250, lea la ua faaaoaga i le tatou falemai. Talu ai nei, na aumai ai foi ieafu ma taga aluga e 250 i le ituaiga. O lea la ou te talanoa atu, aua e ala la ona lagalaga tatou lagona faapea, ia ona o faamatalaga e tatou te falogologo i ai, ae o lea la ua ou tau atu le sao o le tulaga lea. Atonu o le a tuufilemuina ai nisi manatu e lagalaga ona o lenei tamalii, o lea o lo o galue mo tatou. Ae o le mea moni, sa i ai tatou tagata ia, ou te musu la e tau atu le mea lena, sa i ai o tatou tagata, ae na faaletonu ai tatou. O le tele ia o le afaina o le galuega lea, ina ua i ai tagata o tatou, o lea na see ese ai loa, ma faatino mai ai e le tamalii lenei, lea e tau mai i le aso, e leai lava se mea o faaletonu.

Lau Afioga i le Fofoga Fetalai, ia ua ou talitonu o le a faamuta ai i i se tala, ia ae o le a foi se faafofogaaga a le tatou Palemene, se leo ua paopapa, ia e potu lava le tautai, ae sese lava, o le tele o isi taimi e le o i ai se tonu i taimi o tatou felafolafoaiga, ae o le agaga moni lava, e faamalamalama tatou mataupu lea sa outou laga, ia ma le faamoemoe, ua lava foi se sao faatauvaa, e faamalamalamaina ai ma faamalieina ai le tofa ma le faautautaga a le tatou Maota, ia soifua ma ia manuia.

FOFOGA FETALAI: Ia malo, ia se i tulai mai...

Afioga Leana Ronnie Posini: Ia leaga o lea ua faaiu le saunoaga malamalama a le Afioga i le Minisita. Faafetai tele lava, o lea na tau maua atu, o e saunoa e tau taua ai le falemai lea i Saanapu. E talitonu lava lau Afioga, o la matou foi lea tuualalo atu lea i lau Afioga, silafia foi sa i ai le falemai lea sa i Fusi i totonu o le matou itumalo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Peitai ane o lea ua tapuni, ia o le ala foi lea o le matou tuualalo atu i lau Afioga, se i fai ifo ai le fua a lau Afioga i le Minisita, e pei lava ona ou taua, o le matou itumalo o se itumalo tele, ma le agaga faaaloalo, faafetai.

Afioga Hon TUITAMA TALALELEI TUITAMA: E faapea ita sa maua mai e le sui usufono lea sa ou talanoa i Saanapu. E tasi foi lea itumalo, e matautia le lagolago malosi i galuega tau soifua maloloina. E le faatamala foi le tatou Matagaluega i le falemai lea. O lea foi e i ai le faamoemoega e tele nisi mea e fia galue ai, e pei lava ona aumai lou finagalo, o le agaga foi lena o le Matagaluega, ae fuafua agai i le faasoaina o le tamaoiga, ae ua leva ona fia fai ni mea faapena i Saanapu, ma le agaga faaaloalo.

FOFOGA FETALAI: Faafetai, ia atonu ua manino le tele o nisi o mea sa fesiligia e sui usufono mamalu ma laga i a latou saunoaga. Malo faafetai i lau Afioga i le Minisita mo le Soifua Maloloina, ma ua oo mai le faasologa i lau Afioga i le Minisita mo Leipa.

Afioga Hon LAUTAFI FIO SELAFI PURCELL (Minisita mo Leipa ma Fefaatauaiga): Faafetai i lau Afioga i le Fofoga Fetalai, e muamua ona faatalofa atu i le paia o le Maota, e faatalofa atu foi i le faafofogaaga a Samoa i lenei afiafi, mai lava i mauga tetele seia paia maugaiti. E faatalofa atu i le faafofogaaga a si ou itumalo o Satupaitea mai lava i Malaeaoga seia paia Falepau, faafetai tele i lo outou taputapu mai, ma tui mai le mulipapaga, ia a o alofaiva la outou sui usufono ae tainane le Minisita e tauave le tofi o le tatou itumalo. O le naunautaiga lava, ina ia galue ma tautua i le mea e gata ai le tomai, ia aua ne i i ai se faaletonu o le tulai mai o le sui usufono mo Satupaitea i le Nofoa i lenei vaitau.

Lau Afioga i le Fofoga Fetalai, o lea foi ua tulai atu le isi ulu sinasina, ou te le iloa la po o le a le sina lea sa taua e le sui usufono mamalu ia faatoa uma atu. Ae e le fatusatusalia ia lou matua i le matua o lou uso a Minisita lea na faapea o sina o lona ao o sina matua. O lona uiga la o sina o lou ulu mo sina osovale, aua e le faatusatusalia maua ma le toeaina nei.

Lau Afioga i le Fofoga Fetalai, e le toatele ni sui usufono sa afea ia Matagaluega o i lalo o lau vaavaaiga, sa taua e le sui usufono o le itu palota Itumalo Tu Taulaga ia auala ia sa faia e le SLC. E faamalulu atu sa ma talanoa foi ma le Minisita sa tuanai atu, sa taumafai lava e soalaupule lea mataupu. Sa ou faapea la ua sololelei le mataupu lea ia a o lea la ua toe aliali mai ia lea ua uma ona fetalai atu le Afioga i le Minisita ua tulai mai nei ma ma talatalanoa i se faiga e tumau ai ma aua ne i toe fetotoai po o ai e tatau ona faia auala ia. Ia atonu o le a maua ai i se fofo o lea mataupu aua le agai i luma.

Sa taua e le sui usufono mo Vaimauga Sasae ia le faatauina o ni fanua mo lona pitonuu lea i Vailele ma Letogo ma le vaega uma lena. Ia ua uma ona saunoa atu le Afioga i le Palemia, e tau loa mea nei o fanua e faaeteete gata lava ia faaiuga e fai faavavevave i ai i tulaga ia.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ia ma o lo o galulue le Matagaluega ina ia taumafai e faamalieina lou itumalo aemaise pitonuu ia. O le mea ua aliali mai e fiu e taumafai e faamalie ae i ai lava i latou e malilie ae i ai foi isi e le malilie lava, po o le a lava le mea e fai atu. O lena ua tuu atu e le Matagaluega le 35 acre lena ua tuu atu e lease to own i autafa o le alatele i le tulaga foi lea e tumau lava o fanua faaleaganuu. O le isi vaega lena i uta, o lena ua tuu atu le 80 acre lease to own e tagata o lou itumalo, ia a o le isi vaega o eleele na o lo o finau mai ai lava le itumalo e aveatu ia latou, o lea sa fai lava foi fonotaga ma taumafai e faamalamalama, e tuu maia aua le isi 3,000 lea e nofonofo i le lisi faatalitali o tagata o le tatou atunuu o lo o tausaili ni fasi fanua e fau ai ni a latou fale ma nonofo ai aemaise lava i nuu i tua ma Savaii. E 3,000 le lisi lea ua oo i ai, o le naunautaiga la o tatou tagata ia maua sina fasi fanua. O le mea la lea a tagi mai loa ia nuu nei e aveatu ni tai fia acre ma latou, ia e faaeteete lava, ae o lo o taumafai lava le Matagaluega ina ia faamalieina finagalo o alaafaga o lo o nofoia fanua nei. Ae manatu foi ia le Matagaluega sei vaai mai foi ia itumalo nei e le na o lou itumalo, e i ai foi isi itumalo lea e faafogafoga mai e lavea ai foi i le tulaga lea. O lo o taumafai lava le Matagaluega e faamalie o latou finagalo i ni feutagaiga e fai, ae pei lava ona ou fai atu e malilie lava isi ae i ai lava isi e manao lava, manao lava, manao lava, ae 3,000 isi tagata ia e nofonofo ma tagi mai pea i aso uma, aso uma i se fasi fanua se i fai ai se latou fale e omai ai si ana fanua aoga ma le latou aiga mai le mea la e nofo lisi ai ua le lavava i le fetulinai o latou.

O le tulaga moni lena o lo o i ai o lea e taumafai le Matagaluega e fai ni auala e foia ai. Ae taatia mai lou manatu o lo o faaauau pea a tatou feutagaina ma le Matagaluega, ae o le talosaga foi lena a le Matagaluega se i silasila mai i le galuega faigata o lo o taumafai e fai, taumafai e faamalie. E tele foi nisi i totonu o le Maota lenei na aveatu a latou tusi talosaga sa aveatu i le tausaga lea na tea nei, ia a o lea ua o atu fai mai ua leva na aumai, na aumai i le 2016 lau talosaga i sou fanua, o lea e le i tali atu. E faamalulu atu pe a le i tali atu. A o se upu o se vave maua atu o se fanua, e pei ona ou fai atu, o le 2004, 2006 o lo o i ai isi tusi talosaga lea o lo o taumafai i ai le Matagaluega e sue ni fanua e vaevae e tufa atu. A o le mea ua tulai mai, ia ua tau leai ni fanua o le Malo i ni vaega e ono nonofo ai nisi e mafai ona vaevae, ae o lo o galulue pea. Lau Afioga i le sui usufono, fesoasoani ane i le Matagaluega ina ia femalamalamaai lou itumalo ma le Matagaluega.

O le sui usufono mai Falealii, faafetai tele lava mo fautuaga aua le faaleleia o tatou tulaga tau galuega. E pei ona e silafia o lo o tele lava gaoioiga a le Malo o lo o fai, e le faapea a tapuni loa le Yazaki ona uma ai lea. Ua leva foi ona silafia e le Malo o le a tapuni le Yazaki ma o lea ua leva foi ona taumafai auala uma lava ina ia aua ne i tele le impact o le tapunia o le Yazaki i o tatou tagata faigaluega ma tupe maua a o tatou tagatanuu. Ia o lo o i ai lava ia incentives tetele a le Malo lea e fai i le taimi nei, ina ia taumafai ia mauagofie galuega a o tatou tagata lea o le a leai ni galuega, ina ia aua ne i tele se tulaga foi lele ua faapoopo le au le faigaluega a le Yazaki i isi atu au le faigaluega.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O le tele ia o incentives lea e fai ia e pei ona silafia o mea lava tau galuega o le tatou RSE Scheme, o lea ua toe tuu mai foi nisi avanoa i luga atu e galulue ai tatou tagata faavaitaimi i Niu Sila lea faatoa tuu mai le isi faaopoopoga. O lea foi ua faaopoopo mai Ausetalia, o le a le gata i a tatou galuega ia tau apu ma tulaga faapena, ae o le a faasalalau atu i le agricultural sector i mea lava tau faifaatoaga pei o togafai, toga fala, toga moli, o povi tatau susu, se i tulou, o a uma lava mea o le a oo i ai le tulaga e ono agavaa ai o tatou tagata e faigaluega ai i tulaga ia. O lea foi na ta auai i le launch ina o le National Employment Policy a le Matagaluega, e faafetai atu i lau Afioga i lou auai atu i lena afiafi. O lea foi sa launch ai ma isi initiatives a le Malo o lo o taumafai i ai ina ia vave ai ona maua ni galuega. E pei la o lea ua i ai le online registry mo e le i maua ni galuega e lesitala ai ia ona o atu lea i totonu o le computer system lea ia le tagata o lo o fia sue ni tagata faigaluega. E o i ai i totonu o le system lea ma silasila ai i tagata la e iai ia ona fesootea lea o latou, o le taumafai lava ina ia vave ona maua ni galuega a tagata ma faafaigofie. O lea foi e taumafai lava e fai training mo tatou tagata sue galuega po o job seekers la e fai a toleniga ina ia taumafai e faafaigofie ona maua ni a latou galuega. O lea foi ua i ai lemarket information system aua ia tupulaga laiti lea ua galulue soosootauau ai ma le National Youth Council aua tamaiti ia e le o aoga i le formal sector ina ia taumafai ina ia tapue foi o latou tomai. O le naunautaiga lava ina ia i ai ia avanoa, to give them the opportunity to work or to start to be employed ma ia naunau o latou manatu ina ia maua ni galuega. E le o nofoai lo tatou Malo, e tele foi lava isi tatou faatosina, o le faaiuga o le masina nei e faamalosia ai le tatou Tulafono foi lea o le Citizen by Investment. Ia o le Tulafono lena lea ua pasia e taumafai ai e toso mai ni tagata e omai e atiae ma fai ni a latou pisinisi iinei ia ae o le tulaga lena o lea ua uma ona pasia e le Maota nei. Ia manatua foi a omai tagata mai fafo, o le policy a tatou o lo o i ai e tasi le tagata faigaluega e sau mai fafo ae toafa tagata Samoa e faafaigaluega i totonu o le Kamupani a le vaega lea o le a omai e faafaigaluega iinei. E tasi le tagata faigaluega mai fafo ae toafa tagata Samoa, tasi lena incentive tele lava ina ia maua galuega a o tatou tagata. Ae o lo o i ai lava mea masani o lo o i ai foi le fesoasoani a le Malo i le tatou SBEC aua le atinaeina o pisinisi laiti, o lo o i ai foi fesoasoani i concessions e taumafai ai ina ia atiae o tatou lava tagata faipisinisi. Ia o tulaga uma na ae le o nofoai le tatou Malo ae o lo o tilotilo lava i auala uma e mafai ona maua ai galuega a o tatou tagata. E leai lava se Malo e manao e le faigaluega o latou tagata, o lo o taumafai lava i le mafai e gata ai. Ia e faamoemoe foi i a tatou paaga mai fafo e aumai ni seleni e fesoasoani i le atiaeina o tatou tagata aemaise ia le tatou aufaipisinisi. O lo o taumafai lava foi ina ia atiae le tatou private sector ina ia maua galuega a o tatou tagata. Ia o se tali atu lea i le tulaga i le faafesili a le sui usufono mamalu.

O le isi sa taua ai le Matagaluega lea o le MPE, faapea ua toatele tele le aufaigaluega a le MPE. O le MPE faatoa lua tausaga talu ona faatu, ae na ala ai ona faatu le Matagaluega lenei e le Afioga i le Palemia, ioe o le Public Sector Reform lea na fai sa fai uma ai mea nei.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

O le tulaga ua tulai mai, na ona fai o le Public Sector Reform ae le i i ai se faataatiaga lelei o le puleaina o SOEs. E 28 SOEs lea ua i ai i le taimi lenei, lea na oo loa i le tausaga e 2014 ae tilotilo atu le Malo ua 13 tausaga talu ona fai le reform ae leai lava se impact tele o maua mai i SOEs. A o le investment a le tatou Malo lea na tuu iai o le matua tele lava, e faitau piliona ae le o lelei se return, e le o lelei foi le monitor ina o performance. Ioe, sa i ai le vaega lea o le SOEMD lea sa i ai i ina i le Matagaluega o Tupe, ia e le taitai ona talafeagai ma taumafai e faatusatusa mai galuega a le vaega lena i le Matagaluega i le taimi lenei. O le mea sa fai e le SOEMD e pei lava na o faamaumauga e fai i luga o le latou database o mea ia na lau mai e SOEs, na o le pau lava lena. A o le mea lea ua tupu nei lea ua i ai lava le Matagaluega ma tagata faigaluega e matua mataituina ia performance ma financial performance a Matagaluega tumaoti uma lava a le Malo lea e 28.

A outou silasila la i ai i le eseeseaga o le tulai mai a le Matagaluega lea ma le performace a SOEs, ia ona outou iloa lea e justify lava le numera lena o le aufaigaluega e i ai. E le o se numera foi lava na soona faatu, na uma foi lava ona ave le Organizational Structure lena i le PSC ma pasia mai foi e latou ma fetau lelei ai ma le mandate lea ua i ai nei a le Matagaluega lea. A outou silasila ane i Annual Reports o lo o i luma o a outou Afioga, e leai lava se Annual Report o toe tu mai ai se 2006, 2007 pei o le mea sa i ai, na o le 2015 ma le 2016 lena ua i ai. O galuega na a le Matagaluega lea o le uunaia o Matagaluega ina ia vave ona fai a latou audit reports ia ma pasia ma aumai loa i luma o a outou Afioga, tasi lena matatia a le Matagaluega lea. E talu ona faatu i le lua tausaga lea ua oo i le \$7miliona le tupe ua ao mai e le Matagaluega lea mai SOEs mai dividends, ae o le tulaga sa i ai sa leai lava ni tupe e maua mai. Pe na o le tasi lava na o le vaega lea a le SIFA ma le UTOS auua they are expected to produce a return, a o le isi vaega e leai se mea. O lea la ua tulai mai le Matagaluega lea o lea ua maua mai ia tupe a le Malo e fesoasoani i le paketi a le Afioga i le Minisita o Tupe, a o lea foi ua amata ona fai ma fai mai ua toatele tele le Matagaluega. E le o le taimi muamua lea, o lou popolega i tupu ane i le Maota lenei po o nisi foi lava o le public service le tulaga lea e tau o le tall poppy syndrome, o le mea lena e vaai atu loa ua tuputupu lelei se laau po o se fugalaau manao loa le tagata e ooti. E vaai atu loa ua lelei se galuega a se Matagaluega amata loa foi ona togi mai faaupuga e taumafai e sue ai se auala e faaleaga ai. E le faapena le agaga o le Matagaluega lenei, e le faapena foi le agaga o le Minisita lenei, pau lava le agaga ina ia galulue ma le faamaoni ina ia maua mai tupe a le tatou Malo ma fai galuega e pei ona tuu mai i lalo o le Tulafono.

FOFOGA FETALAI: Ia se i tulai mai le sui usufono.

Tofa Aumua Isaia Lameko: Faafetai mo le avanoa lau Afioga i le Fofoga Fetalai, sa aveatu lau tuualalo ma lau fautuaga e fuafua agai i le tatou Public Service sa i ai ma tatou reforms sa fai ina ia taumafai e tuuitiitia, ae ia multi skill le aufaigaluega i le faatinoina o le galuega.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

I le taimi sa i ai i lalo o le Matagaluega o Tupe ma le vaega lea o le SOEMD, o lau fesili i le taimi lenei, pe i ai se improvement mai le tulaga sa i ai i lalo o le Matagaluega o Tupe? Aua o tupe maua po o dividends ia e talanoa mai ai le Minisitaí .

FOFOGA FETALAI: Ou te faamalulu atu i le sui usufono mamalu e le faatagaina ni fesili fou, o le mea la lea o lo o i ai lava ia tatou Tulafono, a manao i se fesili ia ona faapena lea ona faapepa mai i tulaga masani. Ae mo le taimi nei, a i ai se mea sa taua i lau saunoaga e le o manino ma malamalama, ia ona faauilavea lea ae a leai, ia o lea o le a faaiu mai le saunoaga a le Afioga i le Minisita.

Tofa Aumua Isaia Lameko: E leai o lea sa taua i lau lauga ia le tulaga lea faatatau i le MPE ia ae a faapea o lou finagalo lea, ia faafetai.

Afioga Hon LAUTAFI FIO SELAFI PURCELL: Faafetai mo le avanoa lau Afioga, a lea sa ou taumafai e faamalamalama atu le eseese o le taimi lena ma le taimi lenei, e le gata i galuega fai a o mea ua faatino ma mea lea ua silasila ia ma tupe maua ia ua maua mai. Afai e le o faamalieina le sui usufono, ia e faamalie atu, alu atu ta talatalanoa i lou ofisa ona faamalamalama atili atu lea. Ia o le tulaga lena lau Afioga. Sa taua e le sui usufono mo Palauli le Falefa ia tupe e uiga i le falemai, o le mea na galo isi ou uso a sui usufono ua galo ona tau mai o le falemai lea e fau i Satupaitea te i ua faapea le Afioga Minisita o Tupe, ai foi o se falemai o le tou itumalo, e leai, o le tatou falemai fai toatolu, faafetai atu i lou faamanatu ma talosaga i ai mo sina seleni.

I le tulaga lea sa saunoa lau Afioga i le Private Sector development, ia o lo o i ai pepa lea na fai e le Matagaluega lea o le MPE. O lo o ua auina atu i le Kapeneta atonu e i ai se fonotaga lata mai ona talanoaina lea, e talanoa sao ai lava le tulaga lea faipaaga o le va o Matagaluega a le Malo ma Public Private Partnership. E taumafai ona galulue faatasi foi lea ia outsource atu ia galuega a Matagaluega a le Malo i le Private Sector, e develop ai le Private Sector. Atonu e i ai se taimi ona oo mai lea o se faatalanoaga a le Kapeneta i lea itu, a o lo oí .

Afioga Hon Faumuina Tiatia Faaolatane Liuga: Lau Afioga i le Fofoga Fetalai e fia maua se avanoa.

FOFOGA FETALAI: Ia tulai mai.

Afioga Hon Faumuina Tiatia Faaolatane Liuga: Faafetai. E leai e faafetai foi i le uso a Minisita mo le saunoaga matagofie. Leai o le sao o lau faaaliga i le tatou falemai, e tu i Satupaitea ae tautua ai Palauli le Falefa ma Palauli ma Satupaitea, ae tu i Satupaitea i le auala e tatou te i ai.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

O le faaaliga lea, ma o le falemai lea, e le na o le itumalo e serve ai e service ai ma le itu i Sisifo o Savaii. O lona uiga, e sau lava mai Vaisigano Nu. 1 e tau mai Salelologa ma o le ala foi e ala ai ona faalapoia pei o Tuasivi, ma lou faaaloalo lava.

Afioga Hon LAUTAFI FIO SELAFI PURCELL: Faafetai lava i lou uso a sui usufono ma le matou falemai lava fai toatolu.

Lau Afioga i le Fofoga Fetalai na o le pau ia o saunoaga sa afea ai, ae faamalulu atu foi i le mamalu o sui usufono, afai foi e i ai se leo ua le tau tamalii, ia malu ave i fale, o le taumafai lava e faamalamalama atu tulaga ina ia malamalama atili a outou Afioga.

Ia manuia le tatou Fonotaga i lenei afiafi, manuia Samoa, soifua.

FOFOGA FETALAI: Ou te tapa ma le faaaloalo lau Afioga i le Sui Palemia mo lau saunoaga.

Afioga Hon FIAME NAOMI MATAAFA (Sui Palemia, Minisita mo Punaoa Faalenatura ma le Siosiomaga): E faatalofa atu i le agaga faaaloalo i lau Afioga i le Fofoga Fetalai, e faapea foi sui usufono mamalu o le Palemene. Ou te iloa ua vela foi le fala toetoe ina atoa a tatou itula faigaluega o lenei aso ma le faamoemoe o le a faapuupuu atu se faamatalaga, aua lau Afioga i le Fofoga Fetalai, e leai ma se tupe o faaopoopo i lau Tala o le Tupe i le Tala o le Tupe lea a le Minisita o Tupe. Ae ui i lea, ia ai lava ona o le Tala o le Tupe Faaopoopo i luga o le Tala o le Tupe Autu, e le mafai lava ona tuua ai foi finagalo ua faaalua i sui usufono mamalu. Ae le toatele naua nisi sa saunoa i le Matagaluega o lo o i lalo o lau vaavaaiga. Pei se tulaga lautele lau Afioga aua o lea tatou te feofofoai i luga o faiga faavae a le Malo, i le mataupu lava tau fanua. I le taimi nei, o la ua faagasolo i le Kapeneta ia se galuega o lo o silasila ai le Malo i le atoatoaga o fanua e taua o fanua o le Malo. E pei ona outou silafia, e eseese ia Matagaluega po o itutino o le Malo o lo o nafa ma fanua nei, pei ona i ai le Faalapotopotoga o le SLC, o le STEC, ma fanua foi o lo o i lalo o le Fono Faatonu o Mataupu tau Eleele po o le Land Board.

Ma ou te manatu lau Afioga i le Fofoga Fetalai i se mafaufauga o lo o vaavaai ai le Malo, o se auala e mafai ai ona pulea ma faatino ia galuega e faasino i eleele, ina ia mafai pe tuutaasia ia se vaega po o se itutino o le Malo, ia ae e tataua ona ou faapea atu i lenei taimi, o se galuega lena o lo o faagasolo i lenei taimi. O lea o lo o saunoa foi nisi o sui usufono i eleele o lo o moomia e itumalo, o nisi sui usufono o lo o saunoa mai i le tulaga o le lisiina o fanua faale-Aganuu lea e faatino i lalo o lau Matagaluega o le Lands and Environment.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – felafolafoaiga i luga o le faitauga faalua**

Ou te talitonu o vaega ia o lea ua amata ona silasila lelei i ai le Malo ma toe faataatia nisi o ana faiga faavae e tusa lea ma eleele o le Malo. Ua leva foi ona faagasolo le galuega a le Komiti foi lea e tau o le CLAC, o lo o vaavaai i le faaaogaina o tatou fanua faale-Aganuu i se itu e faatupuina ai le tamaoiaiga. Ia o nei mea uma, o lo o luga ma lalo ai foi finagalo faaalua o vaega eseese o le atunuu, aemaise o se itu foi lea faapea, ua faapopoleina ai o le a faoa ia measina a aiga po o tatou eleele.

Ae lau Afioga i le Fofoga Fetalai, ailoga ea o ai se Faigamalo o le a mafai ona fai lena mea, o tatou eleele aemaise o eleele faale-Aganuu, o le isi a tatou tamaoiaiga mautu lea. Amuia foi lo tatou atunuu o lea lava o lo o nofo le Samoa ma lona faasinomaga i ona fanua ma ona eleele. E ui foi la o lea e saunoa le Afioga i le Minisita faatoa atu nei lana saunoaga, i le toatele o le tatou atunuu o lo o talosagaina ia ni fanua umia saoloto po o ni fanua e mafai ona faatau. Ae e ao pea ona tatou mafaufau i o tatou eleele nei faale-Aganuu. A faapea o lea ua toatele pe faatupulaia pea se finagalo o le atunuu e moomia ia fanua nei umia saoloto. O le a le uiga? Ae o ai o lo o pulea? O ai o lo o faaaogaina le 80 ma ona tupu pasene o le laueleele o Samoa?

E pei e taua ai ia mataupu ua laga mai e sui usufono, atonu o lea tatou te manatunatu faatasi uma lava i fesili e faasino i lea tamaoiaiga tele o le tatou atunuu.

O itu tau lisi o tatou fanua ia faale-Aganuu, ia ou te iloa aua o le Minisita o ia lea e fai lea ma sui o e e ona fanua, i le faafeagai lea ma e o lo o fia lisiina tatou fanua, ae ou te manatu, o se Tulafono foi lea ua leva, ma e ao foi ona toe auiliili po o atoatoa ia le faatinoga o lena foi ituaiga faagaioiga o tatou eleele e lisiina atu o eleele ia faale-Aganuu.

Lau Afioga i le Fofoga Fetalai, o le isi mataupu taua vaeane le Fono mamalu a le atunuu, o otaota aemaise le tatou motu i Salafai. Ou te faafetai atu i sui usufono o e ua faaalua mai le tulaga o lo o i ai le faafitauli, ma e le natia lau Afioga i le Fofoga Fetalai ma le mamalu o le Palemene o lo o faafogafoga mai foi le atunuu, o le isi lui tele lea o lea e feagai ma tatou. Pe faapefea ona tatou tali atu i le faatupulaia pea o le lapisi po o le otaota i totonu o lo tatou atunuu, e le gata i lapisi masani ma lapisi tiai o taavale o tino o taavale ma mea faapena, ae faapea ia otaota o tatou faleui, vaeane le faafogafoga mai a le atunuu. O se galuega tele, ma e le na o le Malo foi e ao ona galue i ai, e tataua ona tatou mafaufau faatasi uma i mea ia e tutupu, tatou faalogologo ma le totoai i le mataupu lea sa talanoaina ai i le afaina o vaitaumafa, ona ua oo atu i ai le siama. O mea uma la ia, e mafua mai o le tagata soifua, ioe. O ana gaioiga e fai, o maota ma laoa, a o isi foi itu o tatou faatoaga ma tatou manu, e faapena ona afaina ai pea lo tatou siosiomaga e oo ai i tatou vaitaumafa.

O lui ia e feagai ma tatou, aua o le mea e afaina ai lo outou soifua ma lo tatou ola i aso faipea. Ma e ou te faafetai i le laga mai o le tulaga lea i Savaii, ia o le faiga faavae lava lea e i ai Matagaluega i tulaga o lapisi e pei o le tele o isi a tatou Matagaluega, ua tuu atu i tua i le private sector, po o le aufaipisinisi ia foi vaega o le auaunaga mo le atunuu.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – felafolafoaiga i luga o le faitauga faalua**

Ae peitai, e le mafai ona aveesea ai ia le vaavaaiga a le Malo i le talafeagai o le faafoeina o galuega faapenei mai lea taimi ma lea taimi, ma e ou te manatu e ao ona oo atu se sailiiliga faapitoa po o le a le mea o lo o tupu i le tatou motu i Savaii. Ia lau Afioga i le Fofoga Fetalai, atonu na o le pau ia o nai mataupu sa laga mai i Matagaluega o lo o i lalo o lau vaavaaiga.

Ae ia manuia tele le Fonotaga a le atunuu, soifua.

FOFOGA FETALAI: Malo faafetai. Ou te tapa lau Afioga i le Palemia pe a i ai se faaopoopoga o le saunoaga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea ou te tau matau e leai lava ma ni mataupu o totoe, ae i le 4 minute lea e totoe, le iloa pe uma ai lava nisi Matagaluega se 3.

O lea ou te fautua atu ai tatou agai loa e auiliili le tatou Tala o le Tupe.

FOFOGA FETALAI: Malo faafetai. Ua maea nei felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 1) 2016/2017, ma o le a tuuina atu loa le fesili.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu. 1) 2016/2017 i lona faitauga faalua.

**TULAFONO TAU FAAOFI O LE FAATATAUINA O TUPE
FAAOPOOPO (NU. 1) 2016/2017 – iloiloga auiliili**

FOFOGA FETALAI: O le a sagai atu loa le Fono Aoao i le iloiloina auiliili o le Tulafono Tau Faaofi o le Faatatauina o Tupe Faaopoopo (Nu.1) 2016/2017.

I le faagasologa o le iloiloiga auiliili o le Tulafono Tau Faaofi e mafai ona saunoa faatepa sui usufono i mataupu o lo o tusia i le Tala Faatatau o Tupe Faaopoopo Muamua o Tupe Maua ma Tupe Totogi a le Malo o Samoa mo le tausaga faaiiina aso 30 Iuni 2017, faapea le Lipoti a le Komiti o Tupe Maua ma Tupe Totogi i le aso 30 Iuni 2016, faapea le Lipoti a le Komiti o Tupe Maua ma Tupe Totogi i le Tala Faatatau Muamua o Tupe Faaopoopo 2016/2017, P.P.2016/2017 Nu. 148.

E tusa ai ma Tulafono Tumau 135, e amata le iloiloiga auiliili o le Tulafono Tau Faaofi i ona Faamatalaga.

24 IANUARI 2017

**Tulafono Tau Faaofi o le Faatatauina o Tupe Faaopopo (Nu. 1)
2016/2017 – iloiloga auilili**

FAAMATALAGA MUAMUA

VAEGATUPE MA TALA FAATATAU

FAAOPPOPOGA I TUPE FAATATAUINA

MATAGALUEGA FAAMATALAGA AOFAI TUPE ALU

**FESOOTAIGA & FAAMATALAGA Aofai Tupe Alu Faaopopo \$709,885.
TEKONOLOSI**

Faamaonia.

AOGA, TAALOGA MA AGANUU: \$1,934,828.

Faamaonia.

TUPE: \$225,000.

Faamaonia.

MATAUPU TAU LE VA I FAFO MA FEFAATAUAIGA: \$353,570.

Faamaonia.

SOIFUA MALOLOINA: Aofai Tupe Alu Faaopopo \$825,080.

Faamaonia.

FAAMASINOGA MA PULEGA TAU FAAMASINOGA: \$125,000.

Faamaonia.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – iloiloga auilili**

**GALUEGA, FELAUAIIGA Aofai Tupe Alu Faaopoopo \$157,105.
MA ATINAE ESEESE:**

Faamaonia.

FONO AOA O FAITULAFONO: Aofai Tupe Alu Faaopoopo \$274,134.

Faamaonia.

**AUAUNAGA FAA-SOIFUA Aofai Tupe Alu Faaopoopo \$680,000.
MALOLOINA:**

Faamaonia.

AOFAI FAAOPOPOGA I TUPE ALU AOA O 2016/2017 \$5,284,602.

Faamaonia.

FAAMATALAGA LONA LUA

FAAITIITIGA I TUPE FAATATAUINA

MATAGALUEGA FAAMATALAGA AOFAI TUPE FAAITHITIA

TUPE: Aofai Faaitiitiga Tupe Alu \$(2,600,000).

Faamaonia.

**GALUEGA, FELAUAIIGA Aofai Faaitiitiga Tupe Alu \$(7,076,900).
& ATINAE ESEESE:**

Faamaonia.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – iloiloga auilili**

AOFAI FAAITIITIGA AOA O I TUPE ALU 2016/2017: \$(9,676,900).

Faamaonia.

FAAMATALAGA:

Faamaonia.

**FUAIUPU 2: Faamatuu atu ma le Faatatauina o le \$5,284,602 mai le
Faaputugatupe a le Matagaluega o Tupe.**

Faamaonia.

**FUAIUPU 3: Faaitiitiga o aofaiga na uluai faatatauina ma toe
faasoasoa atu i isi galuega faatino ma galuega faatino
laiti.**

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu. 1) 2016/2017.

Faamaonia.

*Na faagasolo le Tulafono Tau Faaofi o le Faatatauina o Tupe Faaopoopo
(Nu.1) 2016/2017 e aunoa ma se Teuteuga.*

**TULAFONO TAU FAAOFI O LE FAATATAUINA O TUPE
FAAOPOOPO (NU. 1) 2016/2017 – faitauga faatolu**

FOFOGA FETALAI: Ou te tapa lau Afioga i le Minisita o Tupe e tulai
mai mo se lafo.

24 IANUARI 2017

**Tulafono Tau Faaofi o le Faatatauina o Tupe Faaopoopo (Nu. 1)
2016/2017 – faitauga faatolu**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu. 1) 2016/2017 i lona faitauga faatolu.*

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo, Minisita mo Faamasinoga ma Pulega tau Faamasinoga ma le Minisita mo Aoga, Taaloga ma Agamuu.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

TOLOPOINA

FOFOGA FETALAI: Ia, ou te avea foi lenei avanoa e momoli atu ai le faamalo ma le faafetai, malo le onosai, malo foi le faamaumau i lenei aso. E le faigofie, e ui lava ina ua vela foi le fala ma api le uli i lo outou paia ma lo outou mamalu, e le gata i le tapuaiga a le paia i le Malo i le Palemia ma le Sui Palemia aemaise le Kapeneta, ae faapea foi le mamalu o Minisita Lagolago, o Taitaifono i lea itu o le Maota ma sui usufono mamalu o Komiti, ae le gata foi i lea o le mamalu o Ofisa Sili o Pulega ma Pule Sili o Matagaluega ma Faalapotopotoga a le Malo, aua le alofaiva o le Palemene. O lea ua maea le tatou galuega, o le mea sili lea ma le taua ua tuuitiitia ai galuega mo le amataga o galuega o lenei tausaga.

E i ai le manatu o lea ua tatou toai taunuu ua maea le tatou galuega faatulagaina, ou te tapa lau Afioga i le Palemia i sou finagalo a leai, o le a faaiiina le tatou Fono mo le tolopoina aua le aso a taeao.

Ua ou manatu ua tatou toai taunuu i le faaiuga o lenei aso i a tatou polokalame ma fuafuaga faataatitia o galuega o lo o feagai ai ma le Fono Aoa.

Ae tatou te le i tolopo ou te tapa lau Afioga i le Sui Fofoga Fetalai na te faaiiina le tatou Fonotaga i se tatalo faamolemole.

Na tolopo Felafolafoaiga a le Fono Aoa i le itula e 7:09 i le afiafi seia aulia le itula e 9:00 i le taeao o le Aso Lulu, 25 Ianuari 2017.